

Roma norĩ
Roma norĩ ma, Paru te te
ĩrob'ui'érézé
Ĩbaihâ wasu'uzé

Paru hã Corĩtu na 'ri nho'õmo nhisi ãma sãmra ré, ma tô ã ĩbaihâ na hã ãma rob'ui'ééré. Ma tô sima rosa'rata, Roma u tisiré ĩsazei'wa norĩ hã te te sabu za'ra da, te te po're pu'u za'ra da, 'Re ĩhâimana u'âsi mono ãma siptete sina 're nomro mono da. Morĩ õ ré hã, rob'ui'prazé hã te za a'â ti'â Zeruzarẽ u, ĩsazei'wa norĩ ma, Masédoniza hawi danhoprubzé hã. Paru hã ma tô wama waihu'u za'ra, 'Re ĩhâimana u'âsi mono, sa'êtẽ na wama 're ĩsõpru mono zéb zarina, ĩ'ra hã wazada dâ'â da, te te we ĩsõmrizém na hã. Paru hã ma tô duré wama waihu'u za'ra, âne: Zezusi hã da te dasina 're ĩ'umnhasi za'ra mono zéb zarina si, te za 'Re ĩhâimana u'âsi mono hã te te 're da'awësãmri, dawasédé hã te te oto da'ãma 're ĩ'ab'madá'â mono õ zéb zarina. ĩsimiroti 'rata na Mozési te te ãma ĩrob'ui'ééré hã da te 're ĩ'madá'â za'ra mono zéb zarina, te te 're da'awësãmri mono õ di.

Paru te te ĩdazawizé wasu'u

¹ Wa hã Paru, Cristu Zezusihi ma romhuri'wa, wa ãma aima rob'ui'ééré za'ra wa'wa, Roma na 'ri nho'õmo nhisi ãma 're aihâimana za'ra wa'aba mono norĩ ma. 'Re ĩhâimana u'âsi mono hã ma tô ĩpisutu, ĩsadawa wasu'u na te tãma 're romhuri mono da, Zezusihi wasu'u'uwẽ hã te te wama 're ĩ'awaihu'u mono hã te dama 're wasu'u u'âsi mono da, ĩsadawa para.

² 'Re ìhâimana u'âsi mono hã ma tô duréihã dama ropisutu siro, ìwasu'uwẽ na hã. Duréihã ìsadawa wasu'u 'rata 'wa norĩ hã, ma tô ãne na ãma rob'ui'ére sirõmo za'ra, ìbaihã na hã.

³ E 'wai wasu'uwẽ, ã hã. 'Re ìhâimana u'âsi mono 'ra, Wanhib'apito Zezu Cristuhu wasu'uwẽ. Ta hã Zezusi hã ti'ai ãma dahâiba na dasine 're ìhâimana mono na, wama waihu'u pese za'ra di, apito Daw-ihì nhihudu 're morĩ wa.

⁴ Duré 'Re ìhâimana u'âsi mono 'ra na, wama waihu'u pese za'ra di, dá'â uptabi nherẽ, Ìmama hã tiwaihu'u pese na te te hâiwa'utu wa. Duré Timama hawi we ìmorĩ na hã wama waihu'u pese za'ra di. Duré 're ìmorĩ wẽ na zama, wama waihu'u pese za'ra di.

⁵ 'Re ìhâimana u'âsi mono hã tinhoprubzéb zarina ma tô Cristuhu ma ìhâiba na roti, te te ìpisutu da, ìpire na te dama 're sadawa wasu'u mono da. Cristuhu ma, te 're romhuri wẽ mono da, ma tô ìpisutu, ìnhimiromhurizéb zarina dapoto mono bâ, da te 're sazei pese za'ra mono da, duré da te 're sazei pese za'ra mono wa, ìsimiroti si, da te 're 'madâ'â pese za'ra mono da.

⁶ A norĩ wa'aba ma zama, te 're sadawa wasu'u mono da, ma tô ìpisutu 'Re ìhâimana u'âsi mono hã, wasiré Zezu Cristuhu nhìb'a'uwẽ oto 're anomro aba mono da, te te 're ì'apisutu za'ra wa'aba mono norĩ ma hã.

⁷ 'Re ìhâimana u'âsi mono ma, asawi pese za'ra wa'aba di. Taha si ma tô aipisutu za'ra wa'wa, ìsib'a'uwẽ si oto 're anomro aba mono da, tãma. Taha wa, wa ãhãna aima ãma rob'ui'ére za'ra wa'wa, Roma na 'ri rho'õmo nhisi ãma 're aihâimana za'ra wa'aba mono norĩ ma.

Wamama ma, wa ai'ãma 're ïmreme u'âsi za'ra wa'wa, 'Re ïhâimana u'âsi mono ma, duré Wanhib'apito Zezu Cristuhu ma zama, ïsimizawizé hã ai'ãma 're hâimana u'âsi za'ra wa'aba mono da, rowê u'âsi, ãma 're anomro aba mono da.

Roma u, Paru hã datême ïsisatôrîzé wasu'u

⁸ Æhãna, wa za ïnhib'apito ãma uimrehêne ïwata, ïmreme na, 'Re ïhâimana u'âsi mono ãma, Zezu Cristuhu nhimipawaptobzéb zarina 're sazei pese za'ra wa'aba mono wa, aiwasu'u za'ra wa'wa hã daro mono bâ da te 're wapari za'ra mono wa.

⁹⁻¹⁰ Wa hã 're ïsihâiba zawi mono ãna, wa 'Re ïhâimana u'âsi mono ma, te 're romhuri u'âsi, ï'ra wasu'uwê hã te dama 're ïwasu'u mono zém na hã. Wa ai'ãma 're ïsipo're pu'u u'âsi za'ra wa'wa. Wa duré ai'ãma 're ïmreme u'âsi za'ra wa'wa, 'Re ïhâimana u'âsi mono ma. Tô sena, wa ãne na aima rowasu'u za'ra wa'wa, 'Re ïhâimana u'âsi mono ma, ãne hã tâma waihu'u pese uptabi wa. Taha wi si, wa nasi ïsima rowaptêrê u'âsi Æhãna hã, te te sima ïwêzéb uwaibaba te te ïma ãma uwaimrami da, ãma atême ïmorï za'ra wa'aba da.

¹¹ Te asabu su'u za'ra wa'aba da si, wa tô ïsima rowê si'aba'rê, 'Re ïhâimana u'âsi mono, Tipê'êzani na rowê te te dama 're ï'apisutu mono zém na, te ãma aipawaptob za'ra wa'aba da, asiptete sina ãma 're anomro aba mono da.

¹² Atême ãma ïwisi za'ra wa'aba wamhã, wa za aihîni wasipawaptob za'ra ni, Zezusi wa te 're ïsazei pese za'ra mono zém na, wanhiptete na ãma 're wanomro mono da.

¹³ ïsisãnawã norï, ãne na aima ïsiwasu'u za'ra wa'aba da, wa tô ïsima wê, waihu'u za'ra wa'aba da. Wa tô te ïsima 're rosa'rata u'âsi, te asabu za'ra

wa'aba da. Tane nherẽ, atẽme ãma ãmorĩ su'u aba da nherẽ, te marĩ hã ãma 're hãimana u'âsi, õne u'âsi. Zudezu'õ norĩ hã ãdaro mono bâ 're ãsi'ubumroi mono hã, ãwasu'uwẽ hã te tãma 're ãwasu'u za'ra mono zém na, te te 're saze za'ra mono wa, wa tô te 're awaibu, 'Re ãhãimana u'âsi mono ma. Tane da, wa tô duré te ãsima 're rowẽ, airo wa'aba ãma asiré zudezu'õ norĩ hã te duré tãma 're awaibui mono da, tame.

¹⁴ E marĩ wa, wa tô ãsima wẽ, ãne na te aipawaptob za'ra wa'aba da. Wa hã uburé te 're da'apawapto mono da, 'Re ãhãimana u'âsi mono te te ãpisudu. Taha wa, wa za tô te 're da'apawaptob u'âsi, 'ri nho'õmo mono bâ 're ãdahãimana za'ra mono norĩ hã, duré marã 'rowi 're ãdahãimana za'ra mono norĩ hã, duré rowaihu'u pese 'wa norĩ hã, duré rowaihu'u'õ'wa norĩ hã. Ta norĩ hã wa za uburé te 're apawaptob u'âsi, dawaptêrẽ mono bâ.

¹⁵ Taha wa, wa ãma atẽme ãsima rowẽ uptabi za'ra wa'wa, Roma ãma 're aihãimana za'ra wa'aba mono norĩ ma, ãwasu'uwẽ na tame te duré aima 're rowasu'u za'ra wa'aba mono da.

Zeusihí wasu'uwẽ nhiptede

¹⁶ Wa hã, Zeusihí wasu'uwẽ hã te dama 're wasu'u tã mono da, 're ãnhisé mono õ di. E marĩ wa. 'Re ãhãimana u'âsi mono hã siptete uptabi wa, ãwasu'uwẽ na te te ãma 're da'anho'reptui mono da, Zeusí te te sina 're ã'umnhási za'ra mono norĩ hã. Zudezu norĩ si ma tô ãsãna'rata hawimhã te te 're sã'reptu za'ra aré. Tane nherẽ, te oto ãhãna hã zudezu'õ norĩ zama te te 're anho'reptu.

¹⁷ Zeusihí wasu'uwẽ hã e marĩ, wa za wa te ãma 're waihu'u za'ra. 'Re ãhãimana u'âsi mono, da te 're saze za'ra mono wapsi, dawasédé hã te te

oto da'ãma 're ã'ab'madâ'â mono õ zarina, te te 're ãda'awẽsãmri mono zé, taha wasu'u. Duréihã Habatuti hã, 'Re ãhãimana u'ãsi mono zadawa wasu'u 'rata 'wa hã ma tô ãne na ãma rob'ui'ére:

“Ni'wam norĩ hã, 'Re ãhãimana u'ãsi mono te te 're saze za'ra mono wamhã, ta norĩ si te za te te 're awẽsãmri, 'Re ãhãimana u'ãsi mono hã, ãwasédé hã te te oto ãma 're ã'ab'madâ'â mono õ zarina, po're'õ nherẽ, te te 're hã za'ra mono tõ da. Ta norĩ si te za duré rowẽ u'ãsi, ãma 're hãimana za'ra.”

Ãne na ma tô ãwasu'u na ãma rob'ui'ére.

Dapo're ãna 're ãdanomro mono na rowasu'u

¹⁸'Re ãhãimana u'ãsi mono hã ma tô ãne hã wama waihu'u sirõmo za'ra, dapo're'õ na 're ãdanomro mono norĩ hã za te te 're ãda'ahã za'ra mono zém na. Ta norĩ hã te tipẽ'ẽ na te te sima 're rosa'rata wasété u'ãsi za'ra. Hãimana wasété uptabi na, te duré dama 're hãimana u'ãsi za'ra. Ta norĩ hã tiwasété si te te 're 'manharĩ za'ra mono wa, te 'Re ãhãimana u'ãsi mono nhimiroti tô sena uptabi hã te te dawi 're 'wa'rutu za'ra, ãne na roti ãwẽ hã da te 're waihu'u za'ra mono tõ da.

¹⁹'Re ãhãimana u'ãsi mono 're ãhãimana mono zé hã, da te 're ãwaihu'u za'ra mono zéb da hã, dama waihu'u pese di. E marĩ wa. 'Re ãhãimana u'ãsi mono hã dawi 're si'udã mono õ wa. Uburé marĩ hã te te ãapoto mono hã sõ'awi da te 're ãmadã'ã za'ra mono zéb zarina, te da te 're waihu'u za'ra, 're ãhãimana mono zé hã. Taha wa, da te 're ãwaihu'u za'ra mono zéb da hã dama waihu'u pese nherẽ, dapo're ãna 're danomro mono wa, te 'Re ãhãimana u'ãsi mono hã te te 're da'ahã za'ra.

20 Duréihã ãsãna'rata hawimhã, 'Re ãhãimana u'ãsi mono, ma tô te te ro'apoto, tiwaihu'u pese na. Tiwaihu'u pese na te te ro'apoto mono wa, ta hawim haré te ãsimiwaihu'u pese zém na, duré tô sena 're ãhãimana mono na, da te ãma 're waihu'u pese za'ra, ãhãiba hã da te 're 'madã'ã waihu'u za'ra mono õ nherê. E marĩ zarina tawamhã, 'Re ãhãimana u'ãsi mono, 're ãhãimana mono na te za tô sena na da te ãma 're waihu'u pese za'ra. 'Re ãhãimana u'ãsi mono hã uburé marĩ hã te te ã'apoto mono hã da te 're ã'madã'ã za'ra mono zéb zarina, te oto da te ãma 're waihu'u za'ra, ãwaihu'u pese na, duré tô sena õne u'ãsi 're ãhãimana mono na. Taha wa, tô sena 're hãimana mono nherê, da te dasiwi 're udã waihu'u za'ra mono õ di za, 'Re ãhãimana u'ãsi mono hã.

21 Ta hã tô sena 're ãhãimana mono na, da te dasiwi 're waihu'u za'ra mono nherê, tô sena da te dasiwi 're ãhãimana wazé mono na, da te tãma ãma 're uwaimrami za'ra mono õ di, 'Re ãhãimana u'ãsi mono ma hã. Duré sõprub uptabi nherê, ãma 're dawata za'ra mono õ di. Taha upana, te marĩ na si siwa'ru da te 're rosa'rata wasété za'ra. Dapê'ê 're, robra u'ãsi 're dahãimana za'ra mono wa, te danhimirosa'rata na da te 're upa za'ra.

22 Dapo're'õ na 're ãdanomro mono norĩ hã uburé marĩ hã te te 're waihu'u pese za'ra mono newa, te taré sina 're wata za'ra, dama. Tane nherê, te ta norĩ hã simiza'rese ãna 're nomro.

23 'Re ãhãimana u'ãsi mono upana, te ta norĩ hã rob'manharĩ ãma si 're wata za'ra, a'uwê na dahãiba 'manharĩ ãma, duré si hãiba ne 'manharĩ ãma, duré abaze hãiba ne 'manharĩ ãma, duré di'i na 're ãnomro mono norĩ hãiba ne 'manharĩ ãma.

24 Ta norĩ hã simiza'rese'õ uptabi na 're hãimana

u'âsi za'ra mono wa, ma tô 'Re ãhâimana u'âsi mono hã te te sima ãma 're aroti, ãne: “Ta norĩ hã po're za'ra õ wa, wa za oto rême za'ra. Te tãma 're roti za'ra mono õ di za oto. Si'uihã na te za oto 're hãimana za'ra.” ãne ma tô 'Re ãhâimana u'âsi mono hã te te sima ãma 're aroti, ta norĩ ãma hã. Taha wa, te oto marĩ ãwasété si te te sima 're ãwẽ u'âsi za'ra mono zéb zarina, te te 're 'manharĩ u'âsi za'ra, ta norĩ hã. Tihãiba na zama te duré 're siwasété uptabi za'ra oto, si'uihã na.

²⁵ 'Re ãhâimana u'âsi mono nhimiroti hã tô sena nherẽ, te ãmreme upana aimawi si te te 're wapari za'ra, tô senai'õ hã. Ropoto'wai upana, te ãsimipoto ãma si 're wata za'ra, ta norĩ hã.

'Re ãhâimana u'âsi mono ãma si, 're dawata u'âsi za'ra mono za. Õhõ si, tô sena hã.

²⁶ Tawamhã dapo're'õ na 're ãdanomro mono norĩ hã, Ropoto'wa nhimipoto ãma si 're dawata za'ra mono wa, ma tô oto 'Re ãhâimana u'âsi mono hã te te 're da'arême, dawasété si da te dasima 're ãwẽ za'ra mono zéb zarina si, dahãiba na 're dasiwasété za'ra mono da, dasi'uihã na. ãne da hã, 'Re ãhâimana u'âsi mono hã te te dama 're apisutu mono õ nherẽ, te dasi'uihã na pi'õ si'uiwa na dasina 're dawasété za'ra.

²⁷ Tane aibã norĩ hã pi'õ na dasina 're ãdamro za'ra mono zéb upana, te aibã si'uiwa na si te te sina 're rosa'rata wasété uptabi za'ra, pi'õi upana, aibã si'uiwa 're ãsi'ruiwapari za'ra mono na. Dasi'uihã na te aibã si'uiwa na dasina 're dawasété za'ra. Taha wa, te za 'Re ãhâimana u'âsi mono hã te te 're da'ahã za'ra, dapo're'õ si, da te dasi'ãma 're ãmanharĩ za'ra mono zéb uwaibaba, 're danomro mono wa.

28 Dapo're'õ na 're ĩdanomro mono norĩ hã, 'Re ĩhâimana u'âsi mono nhimiroti tô sena hã te te siwi 're wě'õ pese za'ra mono wa, te za 'Re ĩhâimana u'âsi mono hã te te 're arẽme, si'uinhã na te te sima 're ĩrosa'rata wasété za'ra mono zéb uwaibaba si, tiwasédé hã te te 're 'manharĩ u'âsi za'ra mono da.

29 Ta norĩ hã wasété uptabi na te 're hâimana za'ra. Marĩ zô si te te sima 're rob'ruiwapari za'ra. Te duré te te dama 're rob'manharĩ wasété za'ra. Marĩ na te te 're da'ruiwapari u'âsi za'ra. Te duré te te 're danhimro. Siti'ru sina, te ta norĩ hã dazô 're nomro, te te dama 're nharĩ za'ra mono da. Sadawa nhipese uptabi na, te 're hâimana za'ra. Niha te te dama 're rob'manharĩ za'ra mono da, te da'ãma te te sima 're rosa'rata wasété u'âsi za'ra. Taré te te sima 're dabâsi wasété u'âsi za'ra duré.

30 Daza're'ra nherẽ, te duré ta norĩ hã te te sima 're dabâsi wasété za'ra. 'Re ĩhâimana u'âsi mono hã te te duré siwi 're 'ruiwapari. Te duré te te dama 're nharĩ wasété u'âsi za'ra. Danhipai u dama pire na dama 're hâimana za'ra mono newa, te 'rãwi tipẽ'ẽ na sina 're wata za'ra. Taha wa, te sô'awi timreme na dama 're siwasu'u za'ra, marĩ tãma ĩwaihu'u pese za'ra na. Marĩ te te 're ĩwaihu'u za'ra mono zéb zarina si te te 're 'manharĩ za'ra, marĩ ĩwasétére hã. Timama norĩ nhimiroti hã te te 're waparĩ za'ra mono õ di duré.

31 Marĩ ĩwasété zô si, te ta norĩ hã sima 're sôpré. Simiroti na saprĩ ahã na te 're hâimana za'ra. Da'ãma 're pẽ'ézé za'ra mono õ di. Duré da'ãma 're siwamri za'ra mono õ di.

32 'Re ĩhâimana u'âsi mono hã ma tô ãne na da'ãma sima roti siro, dapo're'õ na 're danomro mono wa, ĩsiré ĩ'rata za 're ĩdahâimana u'âsi za'ra mono õ na hã. Dapo're'õ norĩ ma hã, ãne hã tãma waihu'u pese

za'ra di. Tane nherẽ, te tihâimana wasété si te te sima 're 'ruiwapari u'âsi za'ra, te te 're rẽme za'ra mono ãna. Tane nherẽ, uburé tiwasédé hã te te 're ã'manharĩ za'ra mono zém nhipai u, te duré marĩ ãwasédé hã te te 're 'manharĩ za'ra. Ni'wam norĩ hã ãsine 're hâimana wasété za'ra mono wa, te ta norĩ si te te 're wẽsãmri za'ra.

2

Ïpo're'õ norĩ, 'Re ãhâimana u'âsi mono te te siwi 're ãawẽ'õ mono zé wasu'u

¹ A norĩ wa'wa hã, dapo're'õ na 're ãdanomro mono norĩ ãma, ãwasédé hã ãma 're sa'ra za'ra wa'aba mono wamhã, te za 're aiwasété za'ra wa'aba mo. E marĩ wa. Dasine aiwasédé hã 're 'manharĩ za'ra wa'aba mono wa, aiwa. Taha wa, dasine 're aihâimana za'ra wa'aba mono nherẽ, dawasédé hã da'ãma 're sa'ra za'ra wa'aba mono wamhã, te za 'Re ãhâimana u'âsi mono hã te te 're aiwẽ'õ pese za'ra wa'wa dasiré. Taha wa, aiwasété ãna 're aihâimana za'ra wa'aba mono zém na 're asi'madâ'â waihu'u za'ra wa'aba mono õ di za.

² 'Re ãhâimana u'âsi mono hã dapo're'õ na 're ãdanomro mono norĩ hã te te 're ã'awaihu'u mono zéb zarina, te tô te te 're awẽ'õ pese, ã'uwaibaba si. ãne hã, uburé wama waihu'u pese za'ra di.

³ Tane nherẽ, a norĩ wa'wa hã dawasédé hã da'ãma 're ãsa'ra za'ra wa'aba mono na, te aiwasédé hã 're ã'manharĩ za'ra wa'aba mo. E 'Re ãhâimana u'âsi mono nhimihâzé wi, 'rãwi 're asisõ'reptu za'ra wa'aba mono da bâ, te ãne 're ã'manharĩ za'ra wa'aba mo.

⁴ ãté te za ãne asima 're ãnharĩ za'ra wa'aba mo: “'Re ãhâimana u'âsi mono hã simizawi pese uptabi di. Dasi'uihã na dawasédé hã da te 're 'manharĩ

u'âsi za'ra mono nherẽ, da'ãma 're wa'a su'u mono õ di. Taha wa, ãwasédé te 're 'manharĩ mono nherẽ, te te 're ã'ahãri su'u mono õ di.” ãne hã asi'uihã na asi'ãma 're rosa'rata za'ra wa'aba mono õ di za. 'Re ãhãimana u'âsi mono hã aiwasété wi 're aipizari za'ra wa'aba mono da si, te simi'ẽ na te te 're ai'madã'ã za'ra wa'wa, simizawi pese uptabi na. E ãne hã zahadu aima waihu'u za'ra wa'aba õ di bété.

⁵ A norĩ wa'wa hã aipẽ'ẽ tete u'âsi, te 're aihãimana za'ra wa'aba mo. Taha wa, 'Re ãhãimana u'âsi mono hã te za ropsi'utõrĩzéb u hã nimahã na bãdã hã ãwa ãwaptã'ãzéb ãma, dazu aihã za'ra wa'wa, dawasété wa, za te te ãda'awẽ'õzéb ãma hã. Tame te za oto tinhimihãzé hã dama ãma uwaimra, ã'uwaibaba si.

⁶ Marĩ hã da te 're ã'manharĩ za'ra mono zéb uwaibaba, te za 'Re ãhãimana u'âsi mono hã te te dama 're awa'ãbã, ãwẽ na hã duré ãwasété na hã.

⁷ Ni'wam norĩ si te marĩ hã simi'ẽ na te te dama 're 'manharĩ u'âsi za'ra, ãwẽ hã. Ta norĩ hã 'Re ãhãimana u'âsi mono si te te 're wẽsãmri za'ra mono da, te sina 're simipari za'ra, duré ã'rata 're ãsi'ubumroi u'âsi mono zé, te te tãma 're apisutu mono da. Ta norĩ ma si, te za tô 'Re ãhãimana u'âsi mono hã te te 're apisutu, 're ãsi'ubumroi u'âsi mono zéb da hã, ã'rata.

⁸ Duré ni'wam norĩ hã sima si te marĩ na te te 're rosa'rata za'ra, hãiba pisutu ãma 're hãimana za'ra mono da. Ta norĩ hã uburé marĩ ãwẽ hã te te siwi 're wẽ'õ za'ra, marĩ ãwasété na si 're hãimana za'ra mono da. Ta norĩ si te za 'Re ãhãimana u'âsi mono hã sa'ëté te te 're ahã za'ra, po're õ wa.

⁹ Uburé dawasété si, da te 're ã'manharĩ za'ra mono norĩ hã te za te te 're robzépata za'ëté za'ra,

zudezu norĩ hã, duré zudezu'õ norĩ zama.

¹⁰⁻¹¹ E ni'wam norĩ hã taré zudezu na 're hâimana za'ra mono wa, te za tinhimihâzé hã te te tãma 're ba'a za'ra, 'Re ãhâimana u'âsi mono hã. Mare di. Taha zarina, tinhimihâzé hã te te tãma 're ba'a za'ra mono õ di za. Duré e ni'wam norĩ hã taré zudezu na 're hâimana za'ra mono wa, te za ãwẽ hã te te tãma 're anhomri, danhipai u. Mare di. Uburé aiwapsi 'Re ãhâimana u'âsi mono ma hã, dapoto mono bâ. Tane nherẽ, uburé ãwẽ si te te 're ãmanharĩ za'ra mono norĩ ma si, te za 'Re ãhâimana u'âsi mono hã ãwẽ hã te te tãma 're anhomri, zudezu norĩ ma, duré zudezu'õ norĩ ma zama. Rowẽ uptabi si, te za ta norĩ ma si te te 're apisutu. Ta norĩ si te za te te 're awẽsãmri.

¹² 'Re ãhâimana u'âsi mono nhimiroti na, duréihã Mozési te te ãrob'ui'érezé hã zudezu'õ norĩ ma, tãma 're hâimana za'ra mono õ di. Tãma 're hâimana za'ra mono õ nherẽ, tiwasété na si 're hâimana za'ra mono wamhã, e 'Re ãhâimana u'âsi mono 'rata 're ãsi'ubumroi u'âsi mono zéb da hã, te za te te sina 're uwaimrami za'ra. Mare di. Te te sina 're uwaimrami za'ra mono õ di za. 'Re ãhâimana u'âsi mono nhimiroti 'rata na rob'ui'ére hã zudezu norĩ ma si, te 're hâimana za'ra. Taha wa, ta norĩ hã tiwasédé te te 're 'manharĩ za'ra mono wa, te za 'Re ãhâimana u'âsi mono hã tinhimiroti na rob'ui'ére zarina, te te tãma 're arowairébé, ãwasété na te te 're ãawaihu'u mono zéb uwaibaba.

¹³ E 'Re ãhâimana u'âsi mono nhimiroti 'rata na rob'ui'ére hã, taré dapo're na da te 're wapari za'ra mono nherẽ, te za 'Re ãhâimana u'âsi mono hã te te 're da'awẽsãmri. Mare di. ãsimiroti zarina 're dahâimana wẽ za'ra mono wapsi, te za te te 're da'awẽsãmri, 'Re ãhâimana u'âsi mono hã.

¹⁴ 'Re ãhâimana u'âsi mono nhimiroti na Mozési

te te ĩrob'ui'érézé hã zudezu'õ norĩ ma, tãma 're hãimana za'ra mono õ di. Tãma 're hãimana za'ra mono õ nherẽ, si'uihã na ĩsimiroti zarina 're hãimana wẽ za'ra mono wamhã, 'Re ĩhãimana u'âsi mono ma, te za te te tãma ãma 're uwaimrami za'ra, tãma 're hãimana za'ra mono õ nherẽ, 'Re ĩhãimana u'âsi mono nhimiroti na ĩbaihã hã.

¹⁵ Ta norĩ hã si'uihã na 're hãimana wẽ za'ra mono wamhã, 'Re ĩhãimana u'âsi mono nhimiroti hã ĩpẽ'ẽ 're, tãma 're ĩhãimana u'âsi za'ra mono zé, te wasu'u. Duré ĩwẽ hã te te dama 're 'manharĩ za'ra mono wamhã, 'rãwi te za tipẽ'ẽ na 're sisaze za'ra. Duré marĩ ĩwasédé hã te te 're 'manharĩ za'ra mono wamhã, 'rãwi te za tiwasété na 're sisãmri za'ra. Taha wa, tipẽ'ẽ na 'rãwi 're sisaze za'ra mono wamhã, duré 'rãwi tiwasété na 're sisãmri za'ra mono wamhã, 'Re ĩhãimana u'âsi mono nhimiroti, ĩpẽ'ẽ 're, tãma 're ĩhãimana u'âsi za'ra mono zé, te wasu'u.

¹⁶ Æne hã ĩwasu'uwẽ na te dama 're ĩrowasu'u mono zéb zarina, te za tã nimahã na tiromhãiba, 'Re ĩhãimana u'âsi mono nhimipisutuzéb zarina, Zezu Cristu hã da'ãma ĩsipo'ozéb da hã. 'Rãwi dasima si da te 're ĩrosa'rata za'ra mono na te za oŧo da'awaihu'u. Taha zarina te za dama arowairébé oto, Cristu hã.

Mozési hã 'Re ĩhãimana u'âsi mono nhimiroti na te te ĩrob'ui'érézém na rowasu'u

¹⁷ Zudezu norĩ, ãhãna wa za ai'ãma rob'ui'éré za'ra wa'wa. A norĩ wa'wa hã, danhipai u 'Re ĩhãimana u'âsi mono te te 're asawi pese uptabi za'ra wa'aba mono na, te dama 're asiwasu'u za'ra wa'aba mo, ĩsib'a'uwẽ 're anomro aba mono wẽ te. 'Re ĩhãimana u'âsi mono nhimiroti na Mozési te te ĩrob'ui'érézé hã, aima wa'aba si 're hãimana za'ra

wa'aba mono wě te, te ato sina 're anomro aba mo, aima wa'aba si 're hâimana za'ra wa'aba mono wa, 'Re ãhâimana u'âsi mono hã te te 're aiwěsãmri za'ra wa'aba mono da newa, aiwasédé hã te te oto ai'ãma 're ã'ab'madâ'â za'ra wa'aba mono õ zarina.

18 'Re ãhâimana u'âsi mono te te aima 're ã'apisutu aba mono zéb zarina 're ã'manharĩ za'ra wa'aba mono zéb da hã, aima waihu'u pese za'ra wa'aba di. Duré 'Re ãhâimana u'âsi mono nhimiroti 'rata na rob'ui'ééré hã ma tô 're ãwaihu'u za'ra wa'aba mo, ãma 're anomro wě wa'aba mono da.

19 ãne na te duré asi'ãma si 're ãrosa'rata upa za'ra wa'aba mo: “Wa norĩ si datob'a ne 're ãdanomro mono norĩ hã, wa wa te 're simro, tô sena. Robra u'âsi 're ãdanomro mono norĩ ma, wa wa te 're rowa'a za'ra.

20 Duré 're ãdahâimana wě za'ra mono zéb da hã, da te 're ãwaihu'u za'ra mono õ norĩ ma hã, wa wa te 're roti za'ra ãwě na, duré ai'uté ne hâimana nhimiza'rese ãna 're ãhâimana za'ra mono norĩ ma zama.” ãne na te asi'ãma 're ãrosa'rata upa za'ra wa'aba mo. Duré 'Re ãhâimana u'âsi mono nhimiroti 'rata na rob'ui'ééré hã aima 're hâimana za'ra wa'aba mono wě te, te duré ãne na asi'ãma 're ãrosa'rata upa za'ra wa'aba mo: “Wa norĩ ma si, wama waihu'u pese za'ra di, uburé roti ãwě hã tô sena uptabi hã.” ãne na te duré asi'ãma 're aiwata za'ra wa'aba mo.

21 E marĩ wa, a norĩ wa'wa hã dama 're roti za'ra wa'aba mono nherě, 'rãwi duré asima zama 're roti za'ra wa'aba mono õ di. Marĩ na dawi 're danhipsaihuri za'ra mono tã da, dama 're roti za'ra wa'aba mono nherě, te a norĩ wa'aba zama marĩ na dawi 're asipsaihuri za'ra wa'aba mo.

22 Duré damro na dasiwi 're danhipsaihuri za'ra

mono tō da, dama 're roti za'ra wa'aba mono nherē, te duré a norī wa'wa hã aimro na asiwi 're asipsaihuri za'ra wa'aba mo. Duré uburé romhãiba 'manharī hã 'Re ãhãimana u'ãsi mono upana, ãma 're ãdawata za'ra mono zé hã asiwi 're wē'ō pese za'ra wa'aba mono nherē, te 'ri para 're ãsimasa mono zéb u 're asisisi aba mo, marī, 're simi'uri za'ra wa'aba mono da.

²³ A norī wa'wa hã zudezu na da te 're aiwaptērē za'ra wa'wa, 'Re ãhãimana u'ãsi mono nhimiroti 'rata na rob'ui'ére hã aima wa'aba si 're hãimana mono wē te, te dama asina 're ãwasu'u za'ra wa'aba mo. Tane nherē, ãsimiroti si 're 'madã'ã za'ra wa'aba mono ò di. Duré asiwi 're wazéb za'ra wa'aba mono ò di. Taha zarina, zudezu'ō norī ma hã tãma wē za'ra ò di, 'Re ãhãimana u'ãsi mono hã.

²⁴ ãne ma tō duréhã ai'ãma rob'ui'ére sirōmo za'ra wa'wa, 'Re ãhãimana u'ãsi mono zadawa wasu'u 'rata 'wa hã:

“A norī wa'wa hã zudezu na 're aihãimana za'ra wa'aba mono, 'Re ãhãimana u'ãsi mono nhimiroti zarina si 're aihãimana za'ra wa'aba mono ò wa, te zudezu'ō norī hã 'Re ãhãimana u'ãsi mono ãma te te 're wasété za'ra.”

ãne ma tō duréhã ai'ãma rob'ui'ére za'ra wa'aba ni, ãbahã na hã.

²⁵ 'Re ãhãimana u'ãsi mono nhimiroti 'rata na rob'ui'ére hã 're 'madã'ã pese za'ra wa'aba mono wamhã, ã'uwaibaba te za 're asisihãiwata nhihãri za'ra wa'aba mo. Tane nherē, ãsimiroti si 're 'madã'ã pese za'ra wa'aba mono ò wamhã, sihãiwata nhihãri ãna 're ãnomro mono norī ne, te za tãma 're aihãimana za'ra wa'aba mo, 'Re ãhãimana u'ãsi mono ma hã aiwa.

26 Zudezu'õ norĩ hã sihâiwata nhihâri ãna 're nomro mono nherẽ, Ìsimiroti 'rata na si 're hâimana wẽ za'ra mono wamhã, Ìsib'a'uwẽ ne, te za 'Re Ìhâimana u'âsi mono hã te te 're 'madâ'â za'ra, zudezu norĩ ne.

27 A norĩ wa'wa hã zudezu na 're aihâimana za'ra wa'aba mono hã, 'Re Ìhâimana u'âsi mono nhimiroti 'rata na rob'ui'ére hã 're 'madâ'â pese za'ra wa'aba mono õ di, Ìbaihã na rob'ui'ére hã aima 're hâimana za'ra wa'aba mono nherẽ, duré asihâiwata nhihâri ré 're aihâimana za'ra wa'aba mono nherẽ. Tane nherẽ, ni'wam norĩ hã zudezu'õ norĩ hã sihâiwata nhihâri ré, 're hâimana za'ra mono õ nherẽ, te 'Re Ìhâimana u'âsi mono nhimiroti 'rada hã te te 're 'madâ'â pese za'ra. Taħa zarina te za 'Re Ìhâimana u'âsi mono hã te te siwi 're aiwẽ'õ pese za'ra wa'wa, te te 're aihã za'ra wa'aba mono da, zudezu'õ norĩ si Ìsimiroti hã te te 're 'madâ'â pese za'ra mono wa, ai'upana za'ra wa'aba.

28-29 A norĩ wa'wa hã, e asihâiwata nhihâri ré 're anomro aba mono wa, te 'Re Ìhâimana u'âsi mono nhib'a'uwẽ uptabi na 're aihâimana za'ra wa'aba mo. E danho'a uburé marĩ hã zudezu hâimanazéb zarina si 're 'manharĩ za'ra wa'aba mono wa, te za 'Re Ìhâimana u'âsi mono nhib'a'uwẽ uptabi hã 're anomro aba mo. Mare di. ãne hã Ì'uwaibaba nherẽ, Ì'uwaibaba õ di, 'Re Ìhâimana u'âsi mono ma hã. 'Rãwi aipẽ'ẽ 're, Ìsimiroti hã aima 're hâimana u'âsi za'ra wa'aba mono wapsi, tawapsi te za Ìsib'a'uwẽ uptabi na 're aihâimana za'ra wa'aba mo, 'Re Ìhâimana u'âsi mono pẽ'ẽzani nhimipawaptob zarina si. 'Re Ìhâimana u'âsi mono nhimiroti 'rata na rob'ui'ére hã danho'a 're Ìwapari za'ra wa'aba mono zém na, tawamhã, Ìsib'a'uwẽ uptabi na 're anomro aba

mono õ di za. 'Râwi aipẽ'ẽ 're, ĩsimiroti hã aima 're hãimana u'âsi za'ra wa'aba mono wapsi, tawapsi te za ĩsib'a'uwẽ uptabi na 're aihãimana za'ra wa'aba mo. ĩsib'a'uwẽ uptabi na 're ĩhãimana za'ra mono norĩ hã ti'ai ãma ré, da te 're wẽsãmri za'ra mono dai õ nherẽ, te 'Re ĩhãimana u'âsi mono si te te sima 're wasu'u wẽ za'ra.

3

'Re ĩhãimana u'âsi mono hã, tô sena na te te dama 're ĩ'aropisutu mono zém na rowasu'u

¹ Tawamhã zudezu na 're ĩ'aihãimana za'ra wa'aba mono zé hã, e taré, te bété asihãiwata nhihãri ré 're anomro aba mo. E taré, 'Re ĩhãimana u'âsi mono ma hã.

² Mare di. Tô sena tãma hã, zudezu na 're aihãimana za'ra wa'aba mono zé hã. Tãma wẽ di, 'Re ĩhãimana u'âsi mono ma hã. E niha, wa za tawamhã ãne hã waihu'u za'ra ni, zudezu norĩ 're ĩhãimana za'ra mono zé hã. Duréihã 'Re ĩhãimana u'âsi mono hã ma tô zudezu norĩ si te te sima 're awẽ, ĩsimiroti na rob'ui'ééré 'rada hã uburé da'udãna te te 're 'madãâ pesé za'ra mono da, dawí simani tã da.

³ Tane nherẽ, ni'wam norĩ hã zudezu norĩ hã 'Re ĩhãimana u'âsi mono nhimiroti zarina 're ĩnomro mono na hã te te tãma ãma 're uwaimrami za'ra mono õ di. E tawamhã 'Re ĩhãimana u'âsi mono hã asa te te tãma ãma 're uwaimrami za'ra mono õ di za, uburé marĩ na te te tãma ãma 're ĩropisutu za'ra mono zéb zarina.

⁴ Te za tô te te tãma ãma 're uwaimrami u'âsi za'ra, te te tãma 're ĩ'aropisutu mono zéb zarina. Uburé ti'ai ãma dazadawa nhipese na dasima 're dahãimana za'ra mono nherẽ, 'Re ĩhãimana u'âsi

mono si, sadawa nhipese ò di, tô sena. Duréihã ma tô ãne na ãma rob'ui'ééré Dawi hã, 'Re ìhâimana u'âsi mono ãma hã:

“A hã marĩ na dama 're roti mono wamhã, tô sena asadawa nhipese ò na te za da te 're aiwaihu'u za'ra, tô sena asimiroti hã. Duré ni'wam norĩ hã asadawa nhipe te te ai'ãma 're sa'ra mono wamhã, ta norĩ si ìsadawa nhipese na te za da te dasiwi 're waihu'u za'ra, ai'upana.”

Ãne na ma tô duréihã rob'ui'ééré Dawi hã, ìbaihã na hã.

⁵ Ni'wam norĩ hã te ãne na te te si'ãma 're rosa'rata upa za'ra: “Wa norĩ hã wahâimana wasété na si, wa za oto 're wahâimana za'ra, 're ìwanomro wasété uptabi mono na, da te 're wawaihu'u za'ra mono wa, 'Re ìhâimana u'âsi mono si wasété ãna 're ìmorĩ wē uptabi na, da te 're waihu'u za'ra mono da, wanhipai u. Tawamhã, wahâimana wasété na 're wahâimana za'ra mono nherẽ, e te za te te 're wa'ahã za'ra, 'Re ìhâimana u'âsi mono hã. Mare di. Te te 're wa'ahã za'ra mono ò di za.” ãne te ni'wam norĩ hã te te si'ãma 're rosa'rata upa za'ra.

⁶ E tawamhã ì'uwaibaba te ta norĩ hã ãne na hã te te 're rosa'rata za'ra. Mare di. ì'uwaibaba ò di. 'Re ìhâimana u'âsi mono hã te tô ì'uwaibaba si te te 're da'ahã za'ra. ì'uwaibaba na si te marĩ na te te dama 're arowairébé. ãne zarina te te dama 're arowairébé mono ò 'wa'ãhã, aré te te da'awē'ò waihu'u ò di, za da'ãma ìsipo'ozéb ãma hã, 'Re ìhâimana u'âsi mono hã.

⁷ Áté ni'wam norĩ hã te za duré ãne na te te si'ãma 're rosa'rata upa za'ra: “Wa norĩ hã wawasédé, wa te 're 'manharĩ za'ra mono wamhã, áté te za

ãne na da te wa'ãma 're rosa'rata za'ra: 'Õ norĩ hã wasété uptabi na te 're nomro. 'Re ãhãimana u'ãsi mono si, te wẽ uptabi na 're hãimana, õhõ si siwaprosi.' ãne na te za 'Re ãhãimana u'ãsi mono si 're ãmorĩ wẽ uptabi na, da te dasiwi 're waihu'u za'ra, wawasété si, wa te 're ã'manharĩ za'ra mono na, da te 're ãwawaihu'u za'ra mono zém na hã. E tawamhã ã'uwaibaba, 'Re ãhãimana u'ãsi mono, wawasédé te te wa'ãma 're ã'aza'ra mono zéb da hã. Mare di. ã'uwaibaba õ di." ãne na te duré ni'wam norĩ hã te te si'ãma 're rosa'rata upa za'ra.

⁸ Taha zarina te duré te te sima 're nharĩ za'ra: "Wawasété si, wa za tô wa te 're 'manharĩ u'ãsi za'ra, 'Re ãhãimana u'ãsi mono si ãwẽ uptabi na, da te dasiwi 're ãwaihu'u za'ra mono zéb da hã." Ni'wam norĩ hã ma tô ãne na ãnhimiroti wasédé hã ã'ãma sa'ra, ãsi'uihã na ãne hã te ãma ãwaihu'u za'ra newa. Ma tô ã'ãma wasété za'ra. Taha wa, te za 'Re ãhãimana u'ãsi mono hã ta norĩ si siwi wẽ'õ pese za'ra, ã'uwaibaba.

Dahãimana wasété na 're ãdahãimana za'ra mono na rowasu'u

⁹ Tawamhã wa norĩ hã zudezu norĩ hã e taré zudezu na 're wahãimana za'ra mono wa, te za, zudezu'õ norĩ hãimanazém nhipai u, te te 're wa'awêsãmri, 'Re ãhãimana u'ãsi mono hã. Mare di. Uburé aiwapsi tãma 're ãdahãimana za'ra mono zé hã. Uburé dahãimana wasédé hã da te 're ã'manharĩ za'ra mono na si te 're dahãimana za'ra, zudezu norĩ hã duré zudezu'õ norĩ zama. Dawasété hawi, dasi'uihã na 're dawairébé waihu'u mono õ di, dama siptete wa, dawasédé hã. ãne, wa tô aima waihu'u pari za'ra wa'wa.

10 Duréhã ma tô ãne na ni'wam norĩ hã ãma rob'ui'éré za'ra:

“Ni'wam norĩ hã si'uihã na 're ãnomro wẽ mono zém na, 'Re ãhãimana u'ãsi mono te te 're ãwasu'u wẽ za'ra mono zéb da hã, robaba di. Uburé 're ãdanomro wasété mono na si, te 're dahãimana za'ra.

11 Duré ni'wam norĩ hã ãne te te waihu'u za'ra õ di, dawẽ na 're ãdanomro mono zé hã. Duré ni'wam norĩ hã 'Re ãhãimana u'ãsi mono zó 're sópré mono õ di, ãhãimanazém na te te 're ãwaihu'u za'ra mono zéb da hã. ãne hã tãma robaba uptabi di, 'Re ãhãimana u'ãsi mono ma hã.

12 A'uwẽ mono bâ ma tô 'Re ãhãimana u'ãsi mono wi, 're dasipizari za'ra.

Dasi'uihã na marĩ ãwẽ hã da te 're 'manharĩ waihu'u za'ra mono õ di. Taré ma tô 're danomro. Ni'wam norĩ hã marĩ ãwẽ hã te te 're 'manharĩ za'ra mono õ di. Mare uptabi di.

13 Uburé danhoto hã wasété di. Wasété uptabi di. Danhoto wasété na te dazadawa nhipese na, da te dasima 're nharĩ wasété za'ra.

Duré wahi hã te te 're dahãzu mono wa, ti'wa wa'u na te te 're ãdanhimroi mono ne, te damreme na da te dasima 're nharĩ wasété za'ra, rowẽ hã da te dasiwi 're uprosi za'ra mono da.

14 Damreme ãwasété uptabi na si te dasi'ãma da te 're wasété za'ra.

15 Dasi'aba'ré na te duré 're dasi'u'a za'ra. Dasi'aba'ré na te duré 're dasisimro.

16 Daro mono bâ 're danomro mono sidãpãsi, te da te dasiwi 're rowamnarĩ u'ãsi za'ra. Taha wa, te dasisa'u hã robzei'õ u'ãsi 're dahãimana za'ra.

17 Rowẽ na 're ãdahâimana za'ra mono zéb da hã, marĩ hã ãwẽ hã da te dasima 're 'manharĩ waihu'u za'ra mono õ di.

18 'Re ãhâimana u'âsi mono zama, da te dasiwi 're hâimana wazé mono õ di."

Ãne na ma tô 'Re ãhâimana u'âsi mono nhimiroti na da'ãma rob'ui'ééré sirõmo za'ra.

19 Duréihã 'Re ãhâimana u'âsi mono nhimiroti na ma tô Mozési hã rob'ui'ééré, zudezu norĩ ma, õhõ na si ãma 're hâimana za'ra mono da. Taha wa, 'Re ãhâimana u'âsi mono nhimiroti 'rata na rob'ui'ééré hã 're hâimana sirõmo mono wa, ni'wa hã tiwẽ na 're ãmorĩ wasété õ na dama 're siwasu'u waihu'u mono õ di. Uburé dawasété na 're dasisãmri za'ra mono da si, te dama 're hâimana, rob'ui'ééré 'rada hã, duré 'Re ãhâimana u'âsi mono, dawasété na te te 're ãda'awẽ'õ mono zé hã da te dasina 're waihu'u za'ra mono da.

20 E 'Re ãhâimana u'âsi mono nhimiroti 'rata na rob'ui'ééré zarina, marĩ hã da te 're ã'manharĩ wẽ za'ra mono na, te za te te sima da'ãma 're aroti, dawasédé hã te te oto da'ãma 're ab'madâ'â tõ mono da, taha zarina te te oto 're da'awêsãmri mono da, dapo're'õ nherẽ, te te 're da'ahã za'ra mono tõ da. Mare di. Taha nai õ di. Uburé marĩ hã da te 're ã'manharĩ wasété za'ra mono na, 'rãwi 're dasiwaihu'u za'ra mono da si, te dama 're hâimana, rob'ui'ééré 'rada hã.

'Re ãhâimana u'âsi mono te te 're ãda'awêsãmri mono zém na rowasu'u

21 Tane nherẽ, 'Re ãhâimana u'âsi mono ma tô oto dama waihu'u, te te 're ãda'awêsãmri mono zém na hã, sõ'awi da te oto 're ãwaihu'u za'ra mono zéb da hã. 'Re ãhâimana u'âsi mono hã te te sima da'ãma 're aroti mono õ di, uburé marĩ hã da te 're ã'manharĩ wẽ za'ra mono zéb zarina, dawasédé

hã te te oto da'ãma 're ã'ab'madã'ã mono õ zéb da hã, taha zarina te te oto 're ãda'awësãmri mono zéb da hã. Duréhã 'Re ãhãimana u'ãsi mono nhimiroti 'rata na rob'ui'ééré'wa norĩ hã ma tô ãne na ãma rob'ui'ééré za'ra, 'Re ãhãimana u'ãsi mono te te 're ãda'awësãmri mono zém na hã.

²² Zezu Cristu, Danho'reptui'wa na da te dasina 're ã'umnhasi za'ra mono zém na si, ma tô 'Re ãhãimana u'ãsi mono hã te te sima da'ãma 're aroti, dawasédé hã te te oto da'ãma 're ab'madã'ã tõ mono da, taha zarina si te te oto 're da'awësãmri mono da, dawasété na 're danomro mono nherë, te te oto 're da'ahã za'ra mono tõ da. Uburé Zezu Cristu te te 're ãsaze za'ra mono norĩ si, te te oto 're awësãmri. ãne hã aiwapsi te uburé tãma 're hãimana za'ra, zudezu norĩ hã, duré zudezu'õ norĩ zama.

²³ A'uwë mono bâ te uburé dawasété na 're danomro. Taha wa, te 'Re ãhãimana u'ãsi mono nhiti 're dahãimana za'ra, 're ãmorĩ wë uptabi nhiti.

²⁴ Tane nherë, 'Re ãhãimana u'ãsi mono nhiti 're dahãimana za'ra mono nherë, Zezusi te te 're ãsaze za'ra mono norĩ hã te te 're awësãmri, da'ãma 're ãpë'ëzé mono zéb zarina, asa tãma 're ãdasiwa'ãbã za'ra mono zéb zô, sina 're simnhasi mono ãna. Cristu Zezusi hã tidã'ãzém na ma tô da'awa'ã. Taha wa, ma tô dawasété hawi te te 're da'awaibu. Taha na si te oto 'Re ãhãimana u'ãsi mono hã te te 're da'awësãmri, dawasédé hã za oto te te da'ãma 're ã'ab'madã'ã mono õ zéb zarina.

²⁵ 'Re ãhãimana u'ãsi mono hã ma tô Zezusi hã pisutu, dazada ãdã'ãzém na dawasédé, da te 're ã'manharĩ za'ra mono zé hã te te dama 're apari mono da, taha zarina tiwi 'rusimani da, ãwa'rãmi da'ãma 're pë'ëzé mono da. Duré taha na si te te 're ãda'awësãmri mono zé hã, 'rãwi da te dasina

're waihu'u za'ra mono da, ma tô ãne da pisutu, Zezusi hã. Zezusi hã da te 're sazei pese za'ra mono wapsi, te za dawasédé hã te te dama 're apari. 'Re ãhãimana u'âsi mono hã da'ãma 're wa'a su'u mono ô wa, dawasédé hã te te da'ãma 're ab'madâ'â mono ô di aré.

²⁶ Tane nherë, ãhãna hã dawasédé hã da te 're ã'manharĩ za'ra mono zém na, te te da'ãma 're ab'madâ'â mono ãna 're hãimana mono ô di oto. Te oto te te ãma 're da'ab'madâ'â u'âsi, uburé marĩ hã ã'uwaibaba si te te 're ã'ab'manharĩ wë mono na, da te dasina 're waihu'u za'ra mono da, duré uburé Zezusi hã da te 're ãsazei pese za'ra mono norĩ hã te te 're ãda'awësãmri mono na, da te dasina 're waihu'u za'ra mono da.

²⁷ E tawamhã wasi'uihã na, wa za wawë na wasina 're wawata za'ra, 'Re ãhãimana u'âsi mono te te 're ãwa'awësãmri mono na hã. Mare di. E marĩ wa. 'Re ãhãimana u'âsi mono nhimiroti si, wa te 're ã'madâ'â pese za'ra mono na, te te sima wa'ãma 're aroti mono ô na dâ'ãsina, taha zarina wawasédé hã te te wa'ãma 're ab'madâ'â tō mono da. Taré, Zezusi hã wa te 're ãsazei pese za'ra mono na, te te sima wa'ãma 're aroti, taha zarina wawasédé hã te te oto wa'ãma 're ab'madâ'â tō mono da, taha zarina te te 're wa'awësãmri mono da.

²⁸ ãne hã wa tô wasina waihu'u pese za'ra ni oto. Tô sena, Zezusi hã da te dasina 're umnhasi za'ra mono wapsi, te za tô 'Re ãhãimana u'âsi mono hã te te sima da'ãma 're aroti, dawasédé hã te te oto da'ãma 're ã'ab'madâ'â mono ô zéb zarina, te te oto 're ãda'awësãmri mono zéb da hã. Ta hã te te sima da'ãma 're aroti mono ô di, ãsimiroti na rob'ui'éré 'rata zarina, marĩ hã uburé da te 're ã'manharĩ wë za'ra mono na, dawasédé hã te te oto da'ãma 're

ĩ'ab'madâ'â mono õ zéb da hã, taha zarina te te duré 're ĩda'awěsãmri mono zéb da hã. Āne wasu'u zarina, wa tô wa norĩ hã wasina waihu'u pese za'ra ni oto.

²⁹ E zudezu norĩ nhĩb'apito si, te 'Re ĩhâimana u'âsi mono hã 're hâimana. E zudezu'õ norĩ ma hã, 're hâimana mono õ di bété. Ta norĩ ma zama te duré 're hâimana.

³⁰ 'Re ĩhâimana u'âsi mono hã tô sena, misire uburé Danhib'apito uptabi hã. Zezusi hã te te 're ĩsazei pese za'ra mono zéb zarina si, te za te te sima âma 're aroti, ĩwasédé hã te te oto âma 're ab'madâ'â tō mono da, taha zarina si te te oto 're awěsãmri mono da, zudezu norĩ hã, duré zudezu'õ norĩ zama.

³¹ Zezusi hã da te dasina 're ĩ'umnhasi za'ra mono zém na si, 'Re ĩhâimana u'âsi mono hã dawasédé hã te te oto da'âma 're ab'madâ'â tō mono da, te te sima da'âma 're aroti mono wamhã, e tawamhã, 'Re ĩhâimana u'âsi mono nhimiroti 'rata na rob'ui'ééré hã, wama hã taré hã. E wa te 're 'madâ'â pese za'ra mono õ di za. Wa za tô taha zama, wa te 're 'madâ'â pese za'ra, tô sena wa.

4

Abra'ãhã wasu'u, 'Re ĩhâimana u'âsi mono te te 're ĩsazei pese mono zém na

¹ Āhãna hã wasiré zudezu norĩ hi'rada, wa za aima wasu'u za'ra wa'wa, Abra'ã hã.

² Ta hã uburé marĩ hã te te 're ĩ'ab'manharĩ wě mono na, 'Re ĩhâimana u'âsi mono, ĩwasédé hã te te oto âma 're 'madâ'â mono tō da, te te sima âma roti 'wa'ãhã, duré taha zarina Abra'ã hã 'rãwi tiwě na sina 're wata mono 'wa'ãhã, te aré tô sena 'rãwi sina 're wata. Tane nherě, marĩ hã te te

're ã'ab'manharĩ wẽ mono na, 'rãwi sina 're wata waihu'u mono õ di Abra'ã hã, taha zarina 'Re ãhãimana u'ãsi mono hã te te sima ãma roti õ wa, ãwasédé hã te te oto ãma 're ã'madã'ã mono õ zarina, te te ãwẽsãmrizéb da hã.

³ Duréihã Abra'ãhã wasu'u na, ma tô ni'wa hã ãma rob'ui'ééré, ãne na hã:

“Abra'ã hã 'Re ãhãimana u'ãsi mono si, ma tô te te sina 're umnhasi u'ãsi, te te tãma ãropisutuzém na hã. Taha ãma si, ma tô sasõ. Taha wa, ma tô 'Re ãhãimana u'ãsi mono hã sima ãma roti, ãwasédé hã te te oto ãma 're 'madã'ã tõ mono da, duré taha zarina si te te oto wẽsãmri da. Taha wa, tãma wẽ uptabi di, 'Re ãhãimana u'ãsi mono ma hã.”

Ãne ma tô Abra'ãhã wasu'u na ãma rob'ui'ééré ni'wa hã, ãbaihã na hã. Á hã Abra'ã hã, marĩ hã te te 're ã'ab'manharĩ wẽ mono na, 'rãwi sina 're ãwata mono õ zé wasu'u.

⁴ Ni'wam norĩ hã te te dama 're romhuri za'ra mono wamhã, da te 're ãpawa'ãbã za'ra mono ré, te 're hãimana za'ra. E sõpru wa, te za taré ãsib'apito hã rob'ui'prazé hã te te tãma 're sõmri za'ra. Mare di. Sõpru wa, te te tãma 're sõmri za'ra mono õ di. Te te tãma 're ãromhuri za'ra mono zé wa'rãmip si, te za te te tãma 're sõmri za'ra, ãpawa'ã hã.

⁵ Tanei õ di, 'Re ãhãimana u'ãsi mono hã. Marĩ hã da te 're ã'manharĩ wẽ za'ra mono na, te 'rãwi 're dasi'madã'ã ze za'ra, taha na si 'Re ãhãimana u'ãsi mono hã dawasédé hã te te oto da'ãma 're ã'ab'madã'ã mono õ na, te te sima da'ãma 're aroti mono newa. Tane nherẽ, te te sima da'ãma 're aroti mono õ di, taha na dawasédé hã te te oto da'ãma 're ab'madã'ã tõ mono da, taha zarina te te oto 're ãda'awẽsãmri mono zéb da hã. 'Re ãhãimana

u'âsi mono hã da te dasina 're umnhasi za'ra mono wapsi, te za te te sina 're da'awësãmri, dawasédé hã za oto te te da'ãma 're ab'madâ'â mono õ wa, duré dawasété na 're danomro mono nherẽ, te te 're da'ahã za'ra mono tõ da.

⁶ 'Re ãhãmãna u'âsi mono te te sima da'ãma 're aroti mono õ di tõ, uburé marĩ hã da te 're ãmanharĩ wẽ za'ra mono zéb zarina, dawasédé hã te te oto da'ãma 're ãab'madâ'â mono õ zéb da hã, taha zarina te te oto 're ãda'awësãmri mono zéb da hã. Da te 're ãsaze za'ra mono zém na si te oto te te 're da'awësãmri tõ. Taha zarina, dama 're ãrowẽ uptabi za'ra mono zém na hã, ma tõ Dawi hã ãne na ãma rob'ui'éré, duréihã:

⁷ “Ni'wam norĩ ma hã, 'Re ãhãmãna u'âsi mono hã ãwasédé te te oto ãma 're 'madâ'â za'ra mono õ wamhã, ta norĩ ma si, tãma 're rowẽ za'ra mono di za, ãwasété na oto ãma 're po're pu'u za'ra mono õ wa, ta norĩ ãma hã.

⁸ 'Re ãhãmãna u'âsi mono hã ãwasédé hã te te oto ãma 're sa'rata za'ra mono õ wa, tãma 're rowẽ za'ra mono di.”

Ãne na ma tõ Dawi hã ãma rob'ui'éré, dama 're ãrowẽ uptabi za'ra mono zém na.

⁹ Ãne hã, e sihãiwata nhihãri ré 're ãnomro mono norĩ si, te za rowẽ uptabi na 're nomro. E ã norĩ si, te wasu'u, Dawi hã. Mare di. Sihãiwata nhihãri ãna 're ãnomro mono norĩ zama, te wasu'u. Ãne na, wa tõ aima waihu'u pari za'ra wa'wa, Abra'ãhã wasu'u na rob'ui'éré hã, duréihã:

“Abra'ã hã 'Re ãhãmãna u'âsi mono si, ma tõ te te sina 're umnhasi u'âsi, te te tãma ãropisutuzém na hã. Taha ãma si ma tõ sasõ. Taha wa, ma tõ 'Re ãhãmãna u'âsi mono hã sima ãma roti, ãwasédé hã te te oto ãma 're

'madâ'â tō mono da, duré taha zarina si te te oto wēsāmri da. Taha wa, tãma wē uptabi di, 'Re ìhâimana u'âsi mono ma hã."

Ãne, wa tō aima waihu'u za'ra wa'wa.

¹⁰ E tawamhã Abra'ã hã sihâiwata nhizâri sirōmo, ma tō 'Re ìhâimana u'âsi mono hã sima ãma roti, te te wēsāmri da. Mare di. Sihâiwata nhizâri õ ré, ma tō wēsã.

¹¹ 'Re ìhâimana u'âsi mono hã, Abra'ã hã te te sina ì'umnhasi pese zém na si, ma tō wēsã, sihâiwata nhizâri õ nherê. Taha wa, sihâiwata nhizâri õ ré, Abra'ã hã, 'Re ìhâimana u'âsi mono te te ìwēsâmrizém na hã, te wama wasu'u, tō sena na uburé da te 're ìwaihu'u za'ra mono zéb da hã. Taha wa, Abra'ã hã uburé 'Re ìhâimana u'âsi mono, da te dasina 're ì'umnhasi za'ra mono norĩ hi'rada, ta hã. Sihâiwata nhihâri õ nherê, 'Re ìhâimana u'âsi mono te te 're ì'awēsâmri mono norĩ hi'rada.

¹² Duré, ìsihâiwata nhihâri ré norĩ hi'rada, zudezu norĩ hi'rada. E tawamhã sihâiwata nhihâri ré 're hâimana za'ra mono wa, te ta norĩ hi'rada hã 're hâimana, Abra'ã hã. Mare di. Abra'ã hã sihâiwata nhizâri õ ré, 'Re ìhâimana u'âsi mono te te ìsazei pese ne, ìsine te te 're ìsazei pese za'ra mono norĩ hi'rata si, te 're hâimana, Abra'ã hã.

Abra'ãhã ma, 'Re ìhâimana u'âsi mono te te ìropisutuzé wasu'u

¹³ Duréihã 'Re ìhâimana u'âsi mono hã Abra'ãhã ma, ma tō ropisutu, uburé danhipti'ai mono bâ te te tãma 're anhomri mono da, ìsihudu norĩ ma ropibu ma, ìsihudu sidâpâsi. E ìsimiroti hã uburé te te 're 'madâ'â pese uptabi mono wa, duré nimahã na marĩ na misi ìsimiroti na te te upai õ wa, ma tō ãne na tãma ropisutu. Mare di. Taha wab õ di.

'Re ìhâimana u'âsi mono te te ìsazei pese na, te te wēsâmri wa, ma tô âne na tâma ropisutu siro.

¹⁴ 'Re ìhâimana u'âsi mono nhimiroti 'madâ'â'wa norĩ hã zudezu norĩ hã, ìsimiroti te te 're ì'madâ'â pese za'ra mono zéb zarina, 'Re ìhâimana u'âsi mono, ta norĩ ma, uburé danhipti'ai mono bâ te te tâma 're ì'anhomri mono da hã, te te ropisutu 'wa'âhã, taré te aré da te 're saze za'ra, 'Re ìhâimana u'âsi mono hã. Marĩ dai õ di aré. Taré te aré 'Re ìhâimana u'âsi mono hã dama ropisutu, daro hã te te dama 're ì'anhomri mono zém na hã. Dama hã, aré marĩ õ di.

¹⁵ 'Re ìdahâimana wẽ za'ra mono zéb da hã, dasi'uihã na da te dasima 're ìpisutu za'ra mono zé hã dama 're hâimana za'ra mono õ 'wa'âhã, aré da te âma 're upai waihu'u za'ra mono õ di. Tane, 'Re ìhâimana u'âsi mono nhimiroti na Mozési te te ìrob'ui'érézé hã dama 're hâimana za'ra mono õ 'wa'âhã, aré da te âma 're upai waihu'u za'ra mono õ di duré. Tane nherẽ, te tô dama 're hâimana, ìsimiroti na rob'ui'éré 'rada hã. Taha wa, da te 're waihu'u pese za'ra mono nherẽ, da te 're 'madâ'â pese za'ra mono õ wamhã, 'Re ìhâimana u'âsi mono te te 're ìda'ahã za'ra mono zé, te wasu'u.

¹⁶ Tawamhã e marĩ hawi, ma tô 'Re ìhâimana u'âsi mono hã Abra'ãhã ma ropisutu, ìsihudu norĩ ma ropibu ma. Abra'ã hã te te ìsazei pese zém hawi, ma tô tâma ropisutu. Te te tâma ìropisutuzé wa'rãmi, asa tâma ìsiwa'âbâzéb zô 're ìsimnhasi mono õ na, da te dasina 're ìwaihu'u pese za'ra mono zéb da hã, ma tô 'Re ìhâimana u'âsi mono hã Abra'ã te te ìsazei pese zém hawip si, tâma ropisutu. E Mozésihi nhimi'ui'éré 'madâ'â'wa norĩ ma si, te 'Re ìhâimana u'âsi mono nhimiropisutuzé hã tâma 're hâimana

za'ra, zudezu norĩ te te 're ĩsazei pese za'ra mono norĩ ma si. Mare di. Abra'ã hã, 'Re ĩhâimana u'âsi mono si te te sina ĩ'umnhasi ne, uburé 're ĩdahâimana za'ra mono norĩ ma zama, te tãma 're hâimana za'ra, 'Re ĩhâimana u'âsi mono nhimiropisutuzé hã. E marĩ wa. Abra'ã hã uburé wahi'rata wa, uburé wasiré ĩsazei'wa norĩ hi'rata wa.

¹⁷ Duréihã ni'wa hã ma tô ãne na 'Re ĩhâimana u'âsi mono mreme na rob'ui'ééré, Abra'ãhã ãma hã: “Wa hã wa tô aipisutu, daro mono bâ da te dasina 're ĩ'umnhasi za'ra mono norĩ hi'rata na, da te 're asisi za'ra mono da.”

Ãne ma tô 'Re ĩhâimana u'âsi mono nhimipisutuzém na ãma rob'ui'ééré. 'Re ĩhâimana u'âsi mono nhimiropisutuzé hã, tô sena. Pire uptabi di. E marĩ wa. Ô hã tô sena, 're hâimana mono wa. Taha si, ma tô Abra'ã hã te te sina 're umnhasi u'âsi. Taha si, 're dadâ'â za'ra mono nherê, dahâiwa'utu'wa hã te 're hâimana. Taha si marĩ ô ré, Ropoto mono 'wa hã.

¹⁸⁻¹⁹ Duréihã Abra'ã hã 100 na ãma ĩwahubzéb u hã romhutu na ma tô 'Re ĩhâimana u'âsi mono hã tãma ropisutu, ãne: “Asihudu sidâpâsi, da'ahâ uptabi di za.” Ãne rob'ui'ééré 'rata na ĩwasu'u hã. Abra'ã hã romhutu na ma tô tidâ'âzé hã sina waihu'u, ĩhâiba sib'uware na hã oto. Timro zama ma duré waihu'u, 'ra waihu'u ô na, Sara hã. Tane nherê, siptete sina ma tô 'Re ĩhâimana u'âsi mono si saze, za ĩ'ra te te tãma ĩsômrizém na hã. Te te 're wawãi mono ãna, te sô 're simipari u'âsi, 'Re ĩhâimana u'âsi mono nhimiropisutuzéb zô hã, marĩ hã tãma hâimana ô nherê, sô 're ĩsimipari mono zéb da hã. Taha wa, ma tô 'Re ĩhâimana u'âsi mono hã pisutu, daro mono bâ da te 're ĩsazei pese za'ra mono norĩ hi'rata na, da te 're sisi za'ra mono da.

20 'Re ìhâimana u'âsi mono te te tãma ìropisutuzém na hã te te ãma wawãi ò di. Ìmreme hã te te ìsazei pese zéb zarina, ma tô siptete uptabi na 're hâimana. Te duré ãma 're wata u'âsi.

21 'Re ìhâimana u'âsi mono te te tãma ìropisutuzé hã za te te tãma ãma ì'uwaimramizéb zô, te te 're sazei pese u'âsi. Te te sazei utôri ò di, Abra'ã hã.

22 Taha wa, te te ìsazei pese na ma tô sima ãma roti 'Re ìhâimana u'âsi mono hã, ìwasédé hã te te oto ãma 're 'madâ'â mono tã da, taha zarina te te wêsãmri da, duré po're'ò nherë, za te te azâri tã da, dame.

23 Duréihã rob'ui'ééré 'rata na Abra'ãhã wasu'u hã, 'Re ìhâimana u'âsi mono te te ìwêsãmrizém na hã, taha wasu'u si ò di.

24 Wa nori zama, wa te wasina 're ì'umnhasi za'ra mono nori hã te za duré te te 're wa'awêsãmri, Wanhib'apito Zesusihi hâiwa'utu'wa, wa te wasina 're ì'umnhasi za'ra mono nori hã.

25 'Re ìhâimana u'âsi mono hã ma tô Zesusi hã dama tisõ, da te dasiwi wiri da, wawasété na 're wanomro mono wa. Ma tô duré hâiwa'utu, taha na te te 're wa'awêsãmri mono da, wawasédé hã te te oto wa'ãma 're ab'madâ'â tã mono da, 'Re ìhâimana u'âsi mono hã.

5

Cristuhu zazei'wa, toi u'âsi 're ìnomro mono zé wasu'u

1 Wanhib'apito Zesu Cristu hã ma tô wazada tidâ'â za'ra, wa'upana. Taha wa, 'Re ìhâimana u'âsi mono hã ma tô te te sima wa'ãma 're aroti, wa te 're ìsazei pese za'ra mono na, wawasédé hã te te oto wa'ãma 're ab'madâ'â tã mono da, taha zarina si te te duré 're wa'awêsãmri mono da, wawasété na 're wanomro mono nherë, te te 're wa'ahã za'ra

mono tō da. Taha wa, rowē u'âsi, wa oto âma 're wanomro, 'Re ãhâimana u'âsi mono âma hã.

² Zezusi hã wa te wasina 're umnhasi za'ra mono wa, te 'Re ãhâimana u'âsi mono hã ãwē si te te wama 're ab'madâ'â. Taha na si, wa oto wa norĩ hã 're wahâimana za'ra. Niwapsi te za 'Re ãhâimana u'âsi mono hã te te wama 're apisutu, ãwaihu'u pese zarina ãhâiba na rowa'a za'ētē na ãsiré 're wahâimana u'âsi za'ra mono da, rowē uptabi na. Taha wa, wato sina, wa sô 're wanhimipari za'ra, wa te 're sazei utōrĩ za'ra mono âna.

³ Duré Cristuhu zazei'wa, 're wanomro mono 'ru te, da te wama 're rob'manharĩ za'ra mono wa, wa te 're robzépata za'ra mono ré, wa watoi u'âsi 're wahâimana za'ra õne haré, wa te 're ãrobzépata za'ra mono zéb zarina, õhõ âma si wanhiptete sina 're ãwahâimana za'ra mono zéb da hã, wa te wasima âma 're sa'ētē za'ra mono wa. ãne hã wa te wasina 're waihu'u pese za'ra mono wa, wa za watoi u'âsi 're wahâimana za'ra.

⁴ Tawamhã wanhiptete sina, âma 're ãwahâimana za'ra mono zéb da hã, wa te tãma âma 're uwaimrami za'ra mono wamhã, te za 'Re ãhâimana u'âsi mono hã wa'âma 're wata za'ra. Tawamhã wa'âma 're ãwata za'ra mono zém na, wa te wasina 're waihu'u za'ra mono wamhã, marĩ te te wama 're ã'apisutu mono zéb zô, wa te 're wawã za'ra mono âna, wa za wasina 're wanhimipari u'âsi za'ra.

⁵ ãne zô si 're wanhimipari za'ra mono wamhã, taré sô 're wanhimipari za'ra mono õ di za. Taré, wa te wasina 're umnhasi baba za'ra mono õ di za. E marĩ wa. 'Re ãhâimana u'âsi mono hã Tipē'ēzani te te wama 're ã'anhomri mono na, tinhimizawi pese zé hã te te wama 're awaihu'u mono wa, taré, wa te wasina 're umnhasi baba za'ra mono õ di za. Taha

wa, taré sô 're wanhimipari za'ra mono õ di za, marĩ ãwẽ hã te te wama 're ã'apisutu mono zô hã.

⁶ Duréihã 're ãdahãimana za'ra mono na'rata zém hawimhã, marĩ da te 're ã'manharĩ wẽ za'ra mono zém na hã 'Re ãhãimana u'ãsi mono te te da'ãma sima 're arotĩ mono õ di, taha zarina dawasédé hã te te oto da'ãma 're ab'madã'ã tã mono da, duré dapo're'õ nherẽ, te te 're da'ahã za'ra tã mono da. Ta hawim haré, dahãimana wẽ zém na 'rãwi 're dasi'madã'ã waihu'u za'ra mono õ di, dawasédé hã te te da'ãma 're ã'ab'madã'ã mono õ zarina, te te 're ãda'awêsãmri mono zéb da hã, 'Re ãhãimana u'ãsi mono hã. Taha ré, ma tã Cristu hã dazada dãrã, uburé dawasété na 're ãdahãimana za'ra mono norĩ zada, 'Re ãhãimana u'ãsi mono, bãdã te te ãma ãpisutuzé hã ãwa ãwaptã'ãzém na.

⁷ Ni'wa hã uburé danhimiroti wẽ hã te te 're 'madã'ã pese mono nherẽ, taha upana ãda'matã'ã da hã, mare di. Ni'wa hã da'ãma 're ãsiwamri mono, 're 'maihãimana mono wamhã, taha upana si ãda'matã'ã da hã, ãté te za 're si'madã'ã za'ra.

⁸ Tanei õ di, 'Re ãhãimana u'ãsi mono nhimizawizé hã. Wa norĩ hã wawasété na 're wahãimana za'ra mono nherẽ, ma tã Cristu hã pisutu, wazada dã'ã da, wa'upana. ãne hã ma tã 'Re ãhãimana u'ãsi mono hã te te wama 're awaihu'u, te te 're ãwa'azawi pese mono zém na hã.

⁹ Zezusi wazada ãdã'ãzém na, ma tã 'Re ãhãimana u'ãsi mono hã te te 're wa'awêsãmri, wawasédé hã te te oto wa'ãma 're ã'ab'madã'ã mono õ zarina. ãne wa, te za duré Zezusi hã tidã'ãzém na te te 're wa'anho'reptu, 'Re ãhãimana u'ãsi mono nhimihãzé wi, ro hã za ãsi'utõrĩzéb ãma hã.

¹⁰ 'Re ãhãimana u'ãsi mono nhitob'ru, wa aré 're wanomro. Tane nherẽ, ti'ra dã'ãzém na ma

tô wa'ãma 're siwadi za'ra oto. Tawamhã ãsiwadi oto 're wahâimana za'ra mono wa, te za tô oto Zezusi hã te te 're wa'anho'reptu, dâ'â nherẽ, apã hãiwa'utu wa, dâ'â ãna 're hâimana u'âsi mono wa za oto.

¹¹ Tane nherẽ, taha si õ di. 'Re ãhâimana u'âsi mono ãma, wa duré watoi u'âsi 're wahâimana za'ra, Wanhib'apito Zezu Cristu dâ'ázém na, wa'ãma 're siwadi za'ra mono wa oto.

Adãhã wasu'u, Cristuhu wasu'u me

¹² Tawamhã e ma hawi, ma tô dawasédé hã tinhana'rata. Adã hã ma tô duréihã tiwasété 'rata. Ta hawimhã ma tô dawasédé hã te te ropé, uburé dapoto mono bâ. Ta hawim haré, te aihĩni 're dadâ'â u'âsi za'ra, dawasété na 're danomro mono wa.

¹³⁻¹⁵ Dawasété ãna 're ãdahâimana za'ra mono zéb da, 'Re ãhâimana u'âsi mono nhimiroti hã dama 're hâimana za'ra mono õ nherẽ, dawasédé hã te te da'ãma 're aza'ra mono õ di, 'Re ãhâimana u'âsi mono hã. Tane nherẽ, duréihã Mozésihi ma, tinhimiroti hã te te waihu'u õ ré, duré te te rob'ui'ére õ ré, te dawasété na si 're dahâimana u'âsi za'ra. ãsimiroti na rob'ui'ére hã dama 're hâimana za'ra mono õ nherẽ, dawasété na si 're dahâimana za'ra mono wa, ma tô Adãhã wasété na'rata hawim haré 're dadâ'â u'âsi za'ra, 'Re ãhâimana u'âsi mono nhimiroti hã dapê'ẽ 're, dama 're hâimana za'ra mono nherẽ, da te dasina tãma ãma 're uwaimrami za'ra mono õ wa. Mozésihi ma, za oto 'Re ãhâimana u'âsi mono, tinhimiroti te te ãwaihu'uzéb u hã, dawasété na si 're danomro u'âsi mono wa, ma tô 're dadâ'â u'âsi za'ra. Adãhã wi, 'Re ãhâimana u'âsi mono, rob'rã te te sawi nherẽ, te te sadawa 'madâ'â ãna, ma tô tiwasédé hã 'manha. ãne hã

Adãhã wasété ne, aiwa da te 're 'manharĩ za'ra mono õ nherẽ, ma tô aihĩni 're dadâ'â u'âsi za'ra, 'Re ãhãmãna u'âsi mono te te dama ãrotizé hã, sô'awi dama 're hãmãna za'ra mono õ nherẽ.

Adã hã wasété na'rata wamhã, ma tô ãpire uptabi hã 'manha, tiwasédé hã. Taha uirĩ na si, ma tô Zezusi hã marĩ ãpire uptabi hã 'manha duré ãwẽ hã, ti'ai ãma 're morĩ ré. Taha wa, Zezusihi ne Adã hã, marĩ ãsine ãpire hã te te 'manharĩ wa. Tane nherẽ, aiwab õ di, ãsimi'manharĩzé hã. 'Re ãhãmãna u'âsi mono hã ãwẽ te te dama 're ã'anhomri mono hã, Adãhã wasété nei õ di. Adã hã tiwasédé te te ã'manharĩzém hawi, ma tô oto uburé 're dadâ'â u'âsi za'ra, tô sena. Tane nherẽ, 'Re ãhãmãna u'âsi mono hã ãwẽ hã te te dama 're ã'ab'manharĩ mono zé hã ãpire uptabi di, Adã hã tiwasédé te te ã'manharĩzém nhipai u. Wẽ uptabi di. E marĩ tawamhã, 'Re ãhãmãna u'âsi mono, ãwẽ hã te te dama 're ã'ab'manharĩ mono zé hã. Zezusi hã sisawi ãna tihãiba na te te 're ãda'azawi pese mono na, ma tô te te dama 're ab'manharĩ wẽ, tinhoprubzéb zarina.

¹⁶ Adã hã tiwasédé te te ã'manharĩzém hawim haré, te dawasédé hã da te 're 'manharĩ u'âsi za'ra oto. Taha zarina, ma tô 'Re ãhãmãna u'âsi mono hã te te siwi 're da'awẽ'õ pese, dawasédé hã te te da'ãma 're ã'awaihu'u mono zéb zarina. Tane nherẽ, ta hawim haré, dawasédé hã da te 're 'manharĩ u'âsi za'ra mono nherẽ, dama ãsõprubzém na te oto da'ahã na te te 're da'awẽsãmri 'Re ãhãmãna u'âsi mono hã, ã'ra dazada ãdã'ázém na. ãne wa, 'Re ãhãmãna u'âsi mono, dama 're ãsõpru mono zé hã, ãpire uptabi di, Adãhã nhimi'manharĩzé ma hã.

¹⁷ Tô sena aibã hã misi, tiwasédé te te ã'manharĩ na'rata hawi, ma tô oto 're dadâ'â u'âsi za'ra.

Tane nherẽ, Zezu Cristu hã aibã misi nherẽ, ãsimi'manharĩzẽ hã pire uptabi di, aibã tiwasédẽ te te ã'manharĩ na'rata zẽm nhipai u. Wẽ uptabi di. 'Re ãhãimana u'ãsi mono hã ãwẽ uptabi hã te te tãma 're ã'apisutu mono norĩ si, te za hãimana pire na ãsirẽ 're hãimana u'ãsi za'ra, tinhoprubzẽ hã te te tãma 're ã'anhomri mono norĩ si. ãsõprubzẽ hã te te 're ãda'awẽsãmri mono zẽ, te wasu'u. Cristu ãdã'ãzẽm na te za hãimana pire na ãsirẽ 're hãimana u'ãsi za'ra.

¹⁸ Aibã hã misi tiwasédẽ hã te te ã'manharĩzẽm hawi, ma tã 'Re ãhãimana u'ãsi mono hã uburẽ te te 're da'awẽ'õ pese, dawasédẽ hã te te da'ãma 're ã'awaihu'u mono zẽb zarina. Tane, misi Zezusihi nhimi'manharĩ wẽ zẽm na, te za oto 'Re ãhãimana u'ãsi mono hã te te 're da'anho'reptu, dapẽ'ẽ 're, dadã'ã u'ãsi ne 're ãdanomro mono zẽm hawi, ã'rata 're dahãimana u'ãsi za'ra mono da oto.

¹⁹ Aibã hã misi nherẽ, 'Re ãhãimana u'ãsi mono te te ãwãpari õ hawimhã, ma tã oto uburẽ dawasétẽ na si 're dahãimana za'ra. Tane durẽ, aibã hã misi nherẽ, 'Re ãhãimana u'ãsi mono te te ãwãpari pese zẽm hawi te za oto 'Re ãhãimana u'ãsi mono hã te te 're da'awẽsãmri, Zezu Cristu te te ãwãpari pese zẽm hawimhã.

²⁰ Durẽihã 'Re ãhãimana u'ãsi mono hã ma tã Mozésihi ma tinhimiroti hã waihu'u, te te ãma rob'ui'ére da, ãma 're dasipo're pu'u za'ra mono wa, dawasédẽ hã da te oto dasina 're waihu'u za'ra mono da. Tane nherẽ, ma tã dawasédẽ hã da te dasima 're sa'ëtẽ u'ãsi za'ra. Tane nherẽ, dawasédẽ da te dasima 're ãsa'ëtẽ za'ra mono zẽm nhipai u, ma tã 'Re ãhãimana u'ãsi mono hã te te dama 're arob'manharĩ wẽ, da'ãma 're ãsiwãmri u'ãsi mono zẽb zarina.

21 Æne na rowasu'u na, wa za oto aima 'rāsutu za'ra wa'wa. Dawasété na si 're danomro u'âsi mono wa, ma tô aré dapě'ě 'remhã, dadâ'â ne 're dahâimana u'âsi za'ra, 'Re ãhâimana u'âsi mono nhiti. Tane nherẽ, tinhimizawi pese zéb zarina, ma tô 'Re ãhâimana u'âsi mono hã Wanhib'apito Zezu Cristu dá'ázéb zarina te te sima 're wa'awě, taha zarina si rowě uptabi na 're wanomro u'âsi mono da oto.

6

'Re ãdanomro mono zép té wasu'u

1 'Re ãhâimana u'âsi mono hã, simizawi pese uptabi di. Te wa'ãma 're pě'ězé u'âsi. Taha wa, wawasédé hã wa te 're 'manharĩ za'ra mono nherẽ, tinhimizawizé hã te te wawi 're azawi mono õ di. Wawasédé, wa te 're ã'manharĩ za'ra mono zé hã, te duré te te wama 're apari. E tawamhã, wawasédé, wa te 're ã'manharĩ za'ra mono zé hã te te wama 're apari mono nherẽ, wa za wawasédé hã duré apâ wa te 're 'manharĩ u'âsi za'ra, apâ te te duré wama 're apari zahu mono da. E taha da, wa za wawasété u'âsi 're wahâimana za'ra.

2 Mare di. 'Re dadâ'â za'ra mono wa, marĩ zô, da te oto 're ãrob'ruiwapari za'ra mono õ ne, wa norĩ hã wawasété zô, wa te oto 're rob'ruiwapari za'ra mono õ di za. Taha wa, wawasédé hã wa te duré 're 'manharĩ zahu za'ra mono õ di za oto.

3 Wa norĩ hã â dawabzuri, wa te 're 'manharĩ za'ra mono wamhã, Cristu Zezusihi siré, 'râwi oto 're ãwanomro mono zé, te wasu'u, simisutu. ãsiré oto 're ãwanomro mono ne, wa tô duré ãsiré 're wadâ'â

za'ra, simisutu. ãne hã aima waihu'u pese za'ra wa'aba di.

⁴ Tawamhã, â dawabzuri hã oto wa te 're 'manharĩ za'ra mono wamhã, â da te 're ãwanhamra mono zé, Cristuhu siré 're ãwadâ'â za'ra mono zé, te wa'ãma simiré'é. Ab're 're, ãsiré da te 're ãwanheme mono zéb zama, te wasu'u. E marĩ da, wa tô Zezusihĩ siré 're wadâ'â za'ra. Cristu hã dâ'â nherë, ãmama hã tiwaihu'u pese na te te ãhãiwa'utu ne, 're ãwanomro mono zép tém na si, oto 're ãwahãimana za'ra mono zéb da hã, wa tô ãsiré 're wadâ'â za'ra, wa norĩ hã. ãne wa'ãma ãsimiré'ézé hã.

⁵ Wa norĩ hã Cristuhu siré, wa tô 're wadâ'â za'ra, wawasété zô, wa te oto 're rob'ruiwapari za'ra mono ô wa, 're dadâ'â za'ra mono wa, marĩ zô, da te oto 're ãrob'ruiwapari za'ra mono ô ne. ãne hã simisutu ma tô 'Re ãhãimana u'âsi mono hã wahãiba na atob za'ra, Cristuhu tême. Duré Cristu hã dâ'â uptabi nherë, ãmama te te ãhãiwa'utu ne, te za duré wa norĩ hã te te 're wa'ahãiwa'utu. Taha na te za duré Cristuhu tême wahãiba na atob za'ra, 'Re ãhãimana u'âsi mono hã.

⁶ Wawasété na 're ãwanomro 'rata mono zé hã, tâibã oto. Cristu hã wedepo'o nhonhi'rãmi na ãdâ'â ne, ma tô 'Re ãhãimana u'âsi mono hã te te wama 're a'uprosi, 're ãwanomro 'rata mono zé hã. Marĩ ãwasétére si, wa te wasima 're ãruiwapari u'âsi za'ra mono zém hawi, te te 're wa'anho'reptui mono da, ma tô te te wama 're a'uprosi, 're ãwanomro 'rata mono zé hã. Wawasédé hã wa te 're sahãri waihu'u za'ra mono ãna, 're wanomro mono tã da, ma tô te te wama 're a'uprosi. ãne hã wama waihu'u pese za'ra di.

⁷ 'Re dadâ'â za'ra mono wamhã, dawasédé hã da te 're 'manharĩ waihu'u za'ra mono õ di oto. Tane, 're idâ'â za'ra mono norĩ ne, Cristuhu siré 're wadâ'â za'ra mono wa, wawasédé hã wa te 're 'manharĩ u'âsi za'ra mono õ di za oto.

⁸ Taha wa, Cristuhu siré 're wadâ'â za'ra mono wa, wa za wa te wasina 're waihu'u pese za'ra tô sena na, za ĩsine 're ĩwahâiwa'utu za'ra mono zéb da hã, duré ĩsiré za 're ĩwahâimana u'âsi za'ra mono zém na hã.

⁹ Āne na, wa tô duré wasina waihu'u pese za'ra ni. Cristu hã dâ'â uptabi nherẽ, 'Re ĩhâimana u'âsi mono te te hâiwa'utu wa, taha wa, niwamhã tidâ'â na te te sahu õ di za, idâ'âzé hã sib'uware wa oto, Zezusihi ma hã.

¹⁰ Dâ'â wamhã, misi haré ma tô dawasété nhiptetezé hã uprosi. Taha wa, oto dâ'â parimhã, Timama ma, te oto 're hâimana u'âsi, Cristu hã.

¹¹ Taha wa, te za āne na asi'āma 're ĩrosa'rata za'ra wa'aba mo: “'Re dadâ'â za'ra mono wa, marĩ zô, da te oto 're ĩrob'ruiwapari za'ra mono õ ne, wawasété zô, wa te oto 're rob'ruiwapari za'ra mono õ di za, wa norĩ hã. 'Re ĩhâimana u'âsi mono ma, wa te oto 're ĩromhuri za'ra mono da si, wa za oto 're wahâimana za'ra. Cristu Zezusihi āma si, wa za oto 're wahâimana za'ra.” Āne si te za asima āma 're ĩrosa'rata za'ra wa'aba mo.

¹² Râwi marĩ na asima 're ĩrosa'rata wasété za'ra wa'aba mono zé hã 're 'madâ'â za'ra wa'aba mono tō da, te za aiwasété wi asina 're asiptete za'ra wa'aba mo, aipě'ě na.

¹³ Marĩ ĩwasédé hã 're 'manharĩ za'ra wa'aba mono tō da, te za aihâiba hã 're ĩ'madâ'â pese za'ra wa'aba mo, aihâiba hawim na marĩ 're 'manharĩ za'ra wa'aba mono tō da. 'Re atâ'â za'ra

wa'aba mono wa, 'Re ìhâimana u'âsi mono te te 're ì'aihâiwa'utu za'ra wa'aba mono ne, te 're aihâimana za'ra wa'aba mo, 're anomro aba mono zép tém na hã. Taha wa, te za 'Re ìhâimana u'âsi mono ma si, 're asisômri za'ra wa'aba mo, misi haré. Taha ma si, te za aihâiba hã 're ìsômri za'ra wa'aba mo ône haré, marĩîwê si âma 're ì'manharĩ za'ra wa'aba mono zéb da hã.

¹⁴ 'Re ìhâimana u'âsi mono nhimiroti 'rata na rob'ui'ééré hã asina tâma âma 're ì'uwaimrami za'ra wa'aba mono zéb zarina, aiwasédé hã te te oto ai'âma 're ab'madâ'â aba mono tō da, 're asi'madâ'â za'ra wa'aba mono ô di za. Tin-himizawi pese zém na si, ma tō 'Re ìhâimana u'âsi mono hã ai'âma 're pē'ézé za'ra wa'wa, aiwasété na 're aihâimana za'ra wa'aba mono nherē. Taha zarina si, ma tō te te 're aiwēsâmri za'ra wa'wa. Taha wa, te za aiwasété wi asina 're asiptete u'âsi za'ra wa'aba mo oto.

'Re ìhâimana u'âsi mono ma, 're ìdasisômri za'ra mono zé wasu'u

¹⁵ Tawamhã âté âne te za asima 're ìnharĩ za'ra wa'aba mo: "'Re ìhâimana u'âsi mono nhimiroti na Mozési te te ìrob'ui'éérézé hã wa te 're ì'madâ'â pese za'ra mono zéb zarina, te te sima wa'âma 're aroti mono ô di, taha zarina wawasédé hã te te oto wa'âma 're ab'madâ'â tō mono da, taha zarina te te 're wa'awēsâmri mono da. Tinhimizawi pese zéb zarina si, ma tō te te 're wa'awēsâmri, wawasété na 're wahâimana za'ra mono nherē, wa'âma 're pē'ézé za'ra mono wa. Taha wa, wa za wawasédé hã duré apâ wa te 're 'manharĩ u'âsi za'ra ône u'â, 'Re ìhâimana u'âsi mono hã dawasété nherē, simizawi pese wa." Âne na asima 're rosa'rata za'ra wa'aba mono ô di za. Tō'ã.

16 A norĩ wa'wa hã dama 're romhuri za'ra wa'aba mono da, aihâiba hã dama 're sômri za'ra wa'aba mono wamhã, taha nhimiwada'uri na si, te za tô 're aihâimana za'ra wa'aba mo. ãne hã aima waihu'u pese za'ra wa'aba di. Tane, aihâiba hã aiwasété ma, 're sômri za'ra wa'aba mono wamhã, te za tô ãma 're asiwasété za'ra wa'aba mo. Taha zarina te za atâ'â u'âsi ne, 're aihâimana za'ra wa'aba mo, aipě'ě 're, 'Re ãhâimana u'âsi mono nhiti. Tane nherě, 'Re ãhâimana u'âsi mono ma, aihâiba hã 're sômri za'ra wa'aba mono wamhã, taha nhimiwada'uri na si te za 're aihâimana za'ra wa'aba mo. Tawapsi te za oto te te 're aiwěsãmri za'ra wa'wa.

17 Aiwasété na si, ma tô aré 're aihâimana u'âsi za'ra wa'aba mo, 're sahâri waihu'u za'ra wa'aba mono ãna. Tane nherě, ãne 're aihâimana za'ra wa'aba mono õ di oto. 'Re ãhâimana u'âsi mono te te aima 're ãroti za'ra wa'aba mono zép si, te oto 're ã'madâ'â pese za'ra wa'aba mo. Taha wa, 'Re ãhâimana u'âsi mono ãma si, wa za 're wawata za'ra.

18 'Re ãhâimana u'âsi mono hã tinhiptetezé hã ma tô te te aima 're sômri za'ra wa'wa, aiwasété ãna oto ãma 're anomro aba mono da. Ma tô duré aima si'apito za'ra wa'wa, aiwě na si oto tãma 're aihâimana za'ra wa'aba mono da.

19 'Re ãdahâimana za'ra mono zém na, wa tô aima ãma romnhimiré'é za'ra wa'wa, ãnhimirowasu'u na hã asi'uihã na sada asimirosa'rata nhiptete waihu'u za'ra wa'aba õ wa. Aihâiba hã aiwasété ma, ma tô 're ãsômri za'ra wa'aba mo aré, taha na si 're aihâimana za'ra wa'aba mono da, aihâiba na asina 're aiwasété za'ra wa'aba mono da. Tane nherě, aihâiba hã 'Re ãhâimana u'âsi mono ma si, te za oto 're ãsômri za'ra wa'aba mo, taha nhimiroti na si oto 're aihâimana za'ra wa'aba mono da,

aihâimana wẽ uptabi na.

²⁰ Aiwasédé hã 're sahâri waihu'u za'ra wa'aba mono âna, 're aihâimana za'ra wa'aba mono ré, 'Re ãhâimana u'âsi mono te te aima 're ãroti za'ra wa'aba mono zéb zarina 're aihâimana za'ra wa'aba mono õ di aré.

²¹ Aiwasété na si 're aihâimana za'ra wa'aba mono ré, e marĩ ma tô aima 're hâimana za'ra wa'wa, 're ãmanharĩ za'ra wa'aba mono zé wa'rãmimhã, ãma aima 're ãrowẽ za'ra wa'aba mono zéb da hã. Robaba di. Taha na asimi'manharĩ wasété za'ra wa'aba zém na ãma 're aséb za'ra wa'aba mono di oto. ãne si, da te 're manharĩ u'âsi za'ra mono wamhã, dapẽ'ẽ 're, dadâ'â u'âsi ne, te za tô 're dahâimana za'ra.

²² Tane nherẽ, 'Re ãhâimana u'âsi mono hã tihptetezẽ hã ma tô te te aima 're sômri za'ra wa'wa oto, aiwasété ãna ãma 're anomro aba mono da oto. Ma tô duré aima si'apito za'ra wa'wa, taha ma si oto 're romhuri za'ra wa'aba mono da. Taha wa, ma tô, tiwi 're asisawi za'ra wa'aba mono ãna, aihâiba hã tâma 're ãsômri za'ra wa'aba mo. Taha wa'rãmi te za rowẽ uptabi na ãrata 're aihâimana u'âsi za'ra wa'aba mono zé hã te te aima 're apisutu 'wa oto.

²³ Dawasété na si 're ãdanomro mono zé wa'rãmi, te za dadâ'â u'âsi ne 're dahâimana za'ra dapẽ'ẽ 're, 'Re ãhâimana u'âsi mono nhiti. Wanhib'apito Cristu Zezusihĩ ãma si 're danomro mono wapsi, te za 'Re ãhâimana u'âsi mono hã sôpru wa, te te dama 're apisutu, ãrata 're ãdahâimana u'âsi za'ra mono zéb da hã, asa tâma 're ãdasiwa'âbã za'ra mono zéb zô, sina 're simnhasi mono ãna.

Īmro'ō norī mrozém na rowasu'u na ĩsimiré

¹ Īsisānawā norī, 'Re ĩhâimana u'âsi mono nhimiroti 'rata na rob'ui'éré hā aima waihu'u pese za'ra wa'aba di. Taha wa, āhāna ĩnhimi'ui'éré na te aima ĩrowasu'u za'ra wa'aba zé hā, aima waihu'u pese za'ra wa'aba di za duré. Ní'wa hā ti'ai āma 're hâimana mono ré, te za 'Re ĩhâimana u'âsi mono nhimiroti hā pire na tāma 're hâimana, ti'ab ré 're ĩdanomro mono zém na roti hā. Tane nherē, dâ'â wamhā oto, tāma 're hâimana mono ō di za oto, ĩsarina 're ĩhâimana mono zéb da hā. E marī wa. Tō oto dâ'â wa.

² Āne na wa za aima romnhimiré'é za'ra wa'wa. Pi'ō norī hā ĩmro hā tiwi 're dâ'â za'ra mono ō ré, 'Re ĩhâimana u'âsi mono nhimiroti 'madâ'â sina, te te 're rēme waihu'u za'ra mono ō di za. Īmro tiwi 're dâ'â za'ra mono wapsi, te za oto 're mro za'ra, 'Re ĩhâimana u'âsi mono nhimiroti zarina, aimawi aibā na, pi'ōi wi ĩmro 're dâ'â za'ra mono wa, timro na te te 're sahu tō za'ra mono da, te te āma roti ō wa, 'Re ĩhâimana u'âsi mono hā.

³ Tane nherē, pi'ō norī hā ĩmro hā tiwi 're dâ'â za'ra mono ō nherē, aibā aimawi ré 're hâimana za'ra mono wamhā, 'Re ĩhâimana u'âsi mono nhimiroti zarina 're hâimana za'ra mono ō wa, te za ĩpo're'ō hā da te āma 're sa'ra, pi'ō norī āma hā, tihâiba na tiwasédé te te 're 'manharī za'ra mono wa. Īmro tiwi 're dâ'â za'ra mono wapsi, te za oto 're mro za'ra, aibā aimawi na. Tawapsi tihâiba na tiwasédé hā te te 're 'manharī za'ra mono ō di za, apâ 're mro za'ra mono wa. Āne hā aima waihu'u pese za'ra wa'aba di.

⁴ Īsisānawā norī, tane duré, a norī wa'wa hā. Cristu hā wedepo'o nhonhi'rāmi na asada

dâ'â za'ra wa'aba wa, ma tô ãsiré 're atâ'â za'ra wa'aba mo. Taha wa, 'Re ãhâimana u'âsi mono nhimiroti 'rata na rob'ui'ééré hã asina tãma ãma 're ã'uwaimrami za'ra wa'aba mono zéb zarina, aiwasédé hã te te oto ai'ãma 're ab'madâ'â aba mono tã da, 're asi'madâ'â za'ra wa'aba mono õ di za. Tãibã oto. 'Re ãhâimana u'âsi mono te te ãhãiwã'utu nhib'a'uwẽ si, wa oto 're wanomro, taha ma si, wa te oto 're romhuri za'ra mono da, ãwẽ na si. Pi'õ i wi, ãmro tiwi 're dâ'â za'ra mono wamhã, ãsimiroti hã te te 're wapari za'ra mono õ di za oto. 'Re mro zahu za'ra mono wapsi, te za duré timro tém nhimiroti hã te te 're 'madâ'â pese za'ra. Tane hã 'Re ãhâimana u'âsi mono nhimiroti 'rata na rob'ui'ééré hã asina tãma ãma 're ã'uwaimrami za'ra wa'aba mono zéb zarina, 'Re ãhâimana u'âsi mono, aiwasédé hã te te oto ai'ãma 're ab'madâ'â aba mono tã da, 're asi'madâ'â za'ra wa'aba mono õ di za oto, pi'õ i wi ãmro 're dâ'â za'ra mono wa, ãsimiroti te te oto 're ã'madâ'â za'ra mono õ ne hã. Tãibã oto. Cristuhu ãma si, te za oto 're anomro aba mo, pi'õ hã apã 're ãmro zahu za'ra mono norã, timro tém nhimiroti te te 're ãwapari pese za'ra mono ne.

⁵ Wahãimana wasété na 're wahãimana za'ra mono ré, wa tô marã ãwasété zõ si, wa te 're rob'ruiwapari za'ra aré. Taha ré, 'Re ãhãimana u'âsi mono nhimiroti 'rata na rob'ui'éérézã hã, wawasété ãna 're ãwanomro mono zã waihu'uzéb da, wama 're hãimana za'ra mono nherẽ, duré wama waihu'u pese za'ra nherẽ, taha upana si, wa tô marã ãwasété zõ si, wa te 're rob'ruiwapari za'ra, tô õhõ zõ si, 'Re ãhãimana u'âsi mono te te wawi 're ã'azawi mono zõ si. Taha zarina wa tô aré wapẽ'ẽ 're, wadã'â u'âsi ne 're wahãimana za'ra, 'Re ãhãimana u'âsi mono nhiti.

⁶ Tane nherẽ, 'Re ãhâimana u'âsi mono hã ma tô te te wama 're apisutu oto, ãsimiroti na rob'ui'ére 'rada hã wa te wasina tãma ãma 're ã'uwaimrami za'ra mono zéb zarina, wawasédé hã te te wa'ãma 're ã'ab'madâ'â mono zéb da, 're wasi'madâ'â za'ra mono tã da oto. ãsimiroti na rob'ui'ére 'rada hã wa te wasina tãma ãma 're ã'uwaimrami za'ra mono zéb zarina, te te 're ãwa'anho'reptui mono zéb zô, 're wanhopré mono sina, wa te oto tãma 're romhuri za'ra mono õ di, 're ãwahâimana 'rata za'ra mono zém na hã. ãpê'êzani hã te te wama 're ã'aroti mono zéb zarina si, wa oto wa te tãma 're romhuri za'ra, wahâimanazép tém na si.

'Re ãhâimana u'âsi mono nhimiroti, da te oto ãwaih'u za'ra zéb zarina, dawasété na 're ãdasiwaih'u za'ra mono zé wasu'u

⁷ Tawamhã e 'Re ãhâimana u'âsi mono nhimiroti 'rata na rob'ui'ére hã wasété di, Mozési te te ãma ãrob'ui'ére na hã. Mare di. Wasété õ di. ãhã wasu'u hawi, wa tô wa hã ãwasété na ãsiwaih'u, 'rãwi. ãne, 'Re ãhâimana u'âsi mono nhimiroti 'rata wasu'u hã: "Marĩ ãwê hã dawi 're 'ruiwapari za'ra wa'aba mono õ di za." ãne hã te waih'u'u õ 'wa'ãhã, aré ãwasété na ãsiwaih'u'u õ di, marĩ te ãsima ãruiwaparizém na hã.

⁸ ãhã wasu'u na te oto waih'u'u wamhã, marĩ hã te dawi 're 'ruiwapari mono zéb da si, wa tô te ãsima 're rosa'rata u'âsi, 're ãhâimana wasété mono zéb zarina. 'Re ãhâimana u'âsi mono nhimiroti 'rata na rob'ui'ére hã dama waih'u'u za'ra õ wa, dawasété na 're dasisãmri waih'u'u za'ra mono õ di. Wa hã bété. 'Re ãhâimana u'âsi mono nhimiroti 'rata wasu'u zéb zarina si, wa tô ãsiwaih'u'u, ãwasété na hã.

9-10 Duréihã 'Re ìhâimana u'âsi mono nhimiroti 'rata na rowasu'u hã te waihu'u õ nherẽ, wa tô aré ìsi'ãma rosa'rata na te 're upa. Ìwasété na 're ìsi'madâ'â mono ãna, wa tô 're ìhâimana. Tane nherẽ, ìsimiroti 'rata na rob'ui'ére wasu'u hã te oto waihu'u wamhã, ãne na te oto ìsi'ãma 're rosa'rata mono õ di. 'Re ìhâimana u'âsi mono ma, ìwasété na aré 're ìhâimana mono zém na hã wa tô ìsi'ãma waihu'u. Ìdâ'â u'âsi, wa tô aré 're ìhâimana, ìpě'ẽ 're. 'Re ìhâimana u'âsi mono hã ma tô tinhimiroti 'rata na rob'ui'ére hã wama sômri za'ra, wa te wasina tâma 're ìuwaimrami za'ra mono zéb zarina, rowẽ uptabi na ãma 're wanomro wẽ mono da. Tane nherẽ, te ìsina tâma uwaimrami õ di, wa hã. Taha wa, wa tô aré ìdâ'â u'âsi 're ìhâimana u'âsi, 'Re ìhâimana u'âsi mono nhiti.

11 'Re ìhâimana u'âsi mono nhimiroti 'rata si te 're ì'madâ'â pese mono na, ìwasédé hã te te oto ì'ãma 're 'madâ'â tõ mono da, te te sima ì'ãma roti da newa, wa tô aré ìnhimiza'rese ãna 're ìhâimana. Taha zarina, wa tô aré ìpě'ẽ 're, ìdâ'â u'âsi 're ìhâimana, 'Re ìhâimana u'âsi mono nhiti.

12 Tane nherẽ, ìsimiroti 'rata na Mozési te te ìrob'ui'ére hã wẽ uptabi di. Ìsarina si te wama 're hâimana, ìwẽ uptabi si.

13 E tawamhã, 'Re ìhâimana u'âsi mono nhimiroti 'rata na rob'ui'ére hã wẽ uptabi nherẽ, e taha zarina, wa tô aré ìpě'ẽ 're, ìdâ'â u'âsi 're ìhâimana. Mare di. Ìwasété na 're ìhâimana 'rata mono zéb zarina si, wa tô aré ìdâ'â u'âsi 're ìhâimana. Taha zarina, wa tô 're ìhâimana wasété mono zém na ìsina waihu'u. Uburé marĩ ìwasédé hã da te 're ì'manharĩ za'ra mono zé hã ìwasété uptabi na wa tô duré waihu'u.

*Paru hã 'râwi tinhimirosa'rata wasété na
ĩsi'wapéze wasu'u*

14 'Re ĩhâimana u'âsi mono nhimiroti 'rata na Mozési te te âma ĩrob'ui'ééré hã e ma hawimhã. ĩpě'ézani hawip si. Tane nherẽ, ta hawimhã, wa hã 're ĩhâimana mono õ di. A'uwẽ hãiba na 're ĩmorĩ wa, wa ĩhâimana nhib'uware na 're ĩhâimana, ĩsi'uihã na ĩsina ĩnhiptete waihu'u õ na hã. 'Re ĩhâimana wasété mono zé ma si, wa ĩhãiba hã te 're sômri u'âsi.

15 ĩnhimiza'rese âna, wa duré 're ĩhâimana, ĩwasédé hã te 're ĩmanharĩ mono zém na, te ĩsina waihu'u õ wa, 'râwimhã. Uburé marĩ ĩwẽ si te 're ab'madâ'â mono da nherẽ, taha si te 're 'madâ'â mono õ di. Uburé marĩ hã te 're ab'manharĩ tõ mono da, te ĩsiwi 're awẽ'õ mono nherẽ, wa tõi te te 're ab'manharĩ tõi, ĩwẽ upana.

16 Uburé marĩ hã te 're ab'manharĩ tõi mono da, te ĩsiwi 're awẽ'õ mono nherẽ, ĩwẽ upana te 're ab'manharĩ mono wamhã, wa ĩsina waihu'u, 'Re ĩhâimana u'âsi mono nhimiroti 'rata na rob'ui'ééré, ĩwẽ si 're ĩhâimana mono na hã, ĩsarina si.

17 Uburé marĩ ĩwasédé hã te 're ab'manharĩ mono da, te ĩsima 're awẽ mono õ nherẽ, ĩwasédé hã ĩpě'ẽ 're, ĩma 're ĩhâimana mono zéb zarina, wa te te 're ab'manharĩ u'âsi tõi, te ĩsiwi 're wẽ'õ waihu'u mono âna.

18 Marĩ ĩwẽ hã ĩpě'ẽ 'remhã ĩma 're hâimana mono õ di. Âne hã ĩma waihu'u pese di. Uburé marĩ ĩwẽ si te 're ab'manharĩ mono da, te ĩsima 're awẽ mono nherẽ, te ĩsina 're uwaimrami waihu'u mono õ di, ĩsi'uihã na hã.

19 Uburé marĩ ĩwẽ si te 're ab'madâ'â mono da nherẽ, taha si te 're 'madâ'â mono õ di. Taha upana, wa ĩwasété si te 're ab'manharĩ, âne hã te

're ab'manharĩ tō mono da, te ĩsiwi 're awē'ō mono nherē.

²⁰ Uburé marĩ ĩwasédé hã te ĩsima 're awē'ō mono nherē, te 're ab'manharĩ mono wamhã, e ĩsi'uihã na te ĩsima ĩwēzéb zarina, wa te te 're ab'manharĩ. Mare di. ĩwasédé hã ĩpē'ē 're, ĩma 're ĩhâimana u'âsi mono zéb zarina si, wa te te 're ab'manharĩ.

²¹ Āne hã wa tō uburé ĩsina waihu'u, 're ĩhâimana mono zém na hã. Marĩ ĩwē si te 're ab'manharĩ u'âsi mono da, te ĩsima 're wē mono nherē, wa ĩ'upana marĩ ĩwasété zô si 're ĩsipizari, te ĩsiwi 're awē'ō waihu'u mono āna.

²² Wa hã 'Re ĩhâimana u'âsi mono nhimiroti wē wasu'u na hã 'rãwi wa tō te ĩsima 're wē u'âsi, ĩpē'ē 'remhã.

²³ Tane nherē, aimawi 're ĩhâimana mono zéb da hã, te ĩma 're hâimana u'âsi, ĩpē'ē 'remhã, ĩnhimirosa'rata wasédé hã. ĩpē'ē 'remhã ĩnhimirosa'rata wasédé hã duré ĩnhimirosa'rata wē hã te 'rãwi nherē, 're si'wapé u'âsi zahuré, ĩwasédé hã te 're ĩ'manharĩ mono zéb da hã, duré te ĩsima 're ĩwē mono zéb zarina, ĩwē hã te 're ĩ'manharĩ mono zéb da hã. Ni'wam norĩ hã danhimiwada'uri zarina si 're hâimana za'ra mono wamhã, marĩ hã te te sima 're ĩwē za'ra mono zéb zarina, te te 're 'manharĩ waihu'u za'ra mono ō di. Tane duré, wa hã marĩ ĩwē si te 're ab'manharĩ u'âsi mono da, te ĩsima 're wē mono nherē, marĩ ĩwasédé hã ĩpē'ē 'remhã ĩma 're ĩhâimana mono zarina, wa marĩ ĩwasédé hã te 're ab'manharĩ tō.

²⁴⁻²⁵ Wa hã ĩwasété u'âsi 're ĩhâimana mono zém na, 'rãwi 're ĩsipo're pu'u mono wa, wa 're ĩsiwē'ō u'âsi. 'Re ĩhâimana u'âsi mono nhimiroti zarina si 're ĩhâimana u'âsi mono da, te ĩsima 're rosa'rata

wě u'âsi mono nherě aré, tane nherě, ĩpě'ě 're, ĩwasédé hã ĩma 're ĩhâimana u'âsi mono zéb zarina si, wa 're ĩhâimana u'âsi tô. E 'wa hã te za âne wanhã, ĩnho'reptu, ĩpě'ě 're, ĩdâ'â u'âsi 're ĩhâimana mono zém hawimhã. 'Re ĩhâimana u'âsi mono si te za ĩnho'reptu, ĩdâ'â u'âsi 're ĩhâimana mono zém hawi, Wanhib'apito Zezu Cristuhu nhimipawaptobzéb zarina hã. Taha wa, wa oto taha âma si 're ĩwata u'âsi.

8

'Re ĩhâimana u'âsi mono pě'ězani te te dama 're ĩ'awě mono zéb zarina si, 're ĩdanomro wě mono zé wasu'u

¹ Taha wa, Cristu Zesusihi âma 're ĩnomro mono norĩ hã, 'Re ĩhâimana u'âsi mono te te siwi 're awě'õ mono õ di za oto. Taha zarina, te te hã za'ra õ di za.

² 'Re ĩhâimana u'âsi mono pě'ězani hã ma tô te te 're wa'apisutu, Cristu Zesusihi âma si 're wanomro wě u'âsi mono da. Taha zarina, ma tô ĩwasété u'âsi 're ĩhâimana mono nherě, ĩnho'reptu, ĩpě'ě 're, ĩdâ'â u'âsi aré 're ĩhâimana mono zém hawi. Tiwaihu'u pese na ma tô âne hawi ĩnho'reptu.

³ 'Re ĩhâimana u'âsi mono nhimiroti 'rata na Mozési te te ĩrob'ui'érezé hã wa te 're ĩ'madâ'â pese za'ra mono zéb zarina, te te sima wa'âma 're aroti mono õ di za 'Re ĩhâimana u'âsi mono hã, wawasédé hã te te oto wa'âma 're ab'madâ'â tô mono da, taha zarina te te oto 're wa'awěsãmri mono da. E marĩ wa. Wawasété u'âsi wahâimanazém hawi, wanhib'uware na 're wanomro u'âsi mono wa. Taha wa, wa te wasina 're uwaimrami waihu'u za'ra mono õ di, 'Re ĩhâimana u'âsi mono nhimiroti 'rata na rob'ui'ére hã. Wawasété si, wa te 're ĩ'manharĩ

za'ra mono zé hã ma tô te te siwi 're awẽ'õ pese, 'Re ãhãmãna u'âsi mono hã. Taha wa, ma tô ti'ra hã we satõ ti'ai u, da'upana dazada dâ'â da, dawasété u'âsi 're ãdahãmãna za'ra mono zém hawi, te te 're da'anho'reptui mono da. Ti'ai ãma dahãiba na ma tô 're mo, Cristu hã. Tane nherẽ, dasine ti'ai ãma hã tiwasédé hã te te 're ab'manharĩ mono õ di, tihãiba na hã.

⁴ ãne ma tô 'Re ãhãmãna u'âsi mono hã 'manha, ãsimiroti na rob'ui'ére hã wa te wasina 're ã'uwaimrami za'ra mono zéb da hã, ãpẽ'ẽzani, wa te 're ã'madã'ã pese za'ra mono zéb zarina, wapẽ'ẽ 're wanhimirosa'rata wasété na 're wahãmãna za'ra mono õ wamhã.

⁵ Ni'wam norĩ hã 're ãhãmãna wasété za'ra mono ma si, tihãiba te te 're ãsõmri u'âsi za'ra mono norĩ hã ta norĩ hã te siwa'ru 'rãwi te te sima 're ãwẽ za'ra mono zéb zarina si, te te 're rosa'rata wasété u'âsi za'ra. Tane nherẽ, ni'wam norĩ hã 'Re ãhãmãna u'âsi mono pẽ'ẽzani nhimiroti zarina si 're ãhãmãna za'ra mono norĩ hã, ta norĩ si te te sima 're rosa'rata wẽ u'âsi za'ra, ãpẽ'ẽzani te te tãma 're ãwẽ za'ra mono zéb zarina si.

⁶ Ni'wam norĩ hã tihãmãna wasété ma si, tihãiba te te 're sõmri u'âsi za'ra mono wamhã, ta norĩ hã te za tipẽ'ẽ 're, dã'ã u'âsi 're hãmãna za'ra, 'Re ãhãmãna u'âsi mono nhiti. Tane nherẽ, ni'wam norĩ hã 'Re ãhãmãna u'âsi mono pẽ'ẽzani te te tãma 're ãwẽ za'ra mono zéb zarina si, 're hãmãna wẽ za'ra mono wamhã, ta norĩ si te za 'Re ãhãmãna u'âsi mono 'rata 're hãmãna u'âsi za'ra, robzei u'âsi na.

⁷ Ni'wam norĩ hã siwa'ru 'rãwi te te sima 're ãwẽ za'ra mono zéb zarina si, te te 're rosa'rata wasété u'âsi za'ra mono wamhã, ta norĩ hã te za 'Re

ĩhâimana u'âsi mono nhitob'ru 're hâimana za'ra. Ta norĩ hã 'Re ĩhâimana u'âsi mono nhimiroti te te 're 'madâ'â za'ra mono õ di. Te te 're 'madâ'â waihu'u za'ra mono õ di, tõ.

⁸ Ni'wam norĩ hã tihâimana wasété ma, tihâiba te te 're sômri u'âsi za'ra mono wamhã, ta norĩ ma, 'Re ĩhâimana u'âsi mono hã tãma 're toi waihu'u za'ra mono õ di za.

⁹ Tane nherẽ, a norĩ wa'wa hã aipẽ'ẽ 're, aiwasédé hã aima 're ĩhâimana za'ra wa'aba mono zéb zarina, 're anomro aba mono õ di oto. 'Re ĩhâimana u'âsi mono pẽ'ẽzani te te aima 're ĩpisutu za'ra wa'aba mono zéb zarina si, te oto 're aihâimana wẽ za'ra wa'aba mo, ĩpẽ'ẽzani hã sena na aipẽ'ẽ 're, 're sãmra za'ra wa'aba mono wamhã. Ni'wam norĩ ma, ĩpẽ'ẽzani, ĩpẽ'ẽ 're, tãma 're hâimana za'ra mono õ wamhã, ta norĩ hã Cristuhu nhib'a'uwẽ 're hâimana za'ra mono õ di.

¹⁰ A norĩ wa'wa hã Cristu, aipẽ'ẽ 're, aima 're hâimana za'ra wa'aba mono nherẽ, niwamhã te za aihâiba za'ra wa'wa hã aiwi 're si'utõrĩ za'ra wa'wa, aiwasédé hã aima 're hâimana za'ra wa'aba mono wa. Tane nherẽ, 'Re ĩhâimana u'âsi mono te te 're ĩ'aiwêsãmri za'ra wa'aba mono zéb zarina si, te za ĩpẽ'ẽzani hã te te 're aipisutu za'ra wa'wa, ĩ'rata 're asimroi u'âsi aba mono da.

¹¹ 'Re ĩhâimana u'âsi mono hã Zezusihi hâiwa'utu'wa hã, ĩpẽ'ẽzani te aipẽ'ẽ 're, 're sãmra za'ra wa'wa. Tõ õ hã Cristu te te ĩhâiwa'udu hã te za aihâiba hã niwamhã aiwi 're si'utõrĩ pese za'ra wa'aba mono nherẽ, te te 're aihâiwa'utu za'ra wa'wa, ĩpẽ'ẽzani hã aipẽ'ẽ 're, 're ĩsãmra za'ra wa'aba mono zéb zarina.

¹² ĩsisânawã norĩ, taha wa, wapẽ'ẽ 'remhã wanhimirosa'rata wasété na 're ĩwahâimana za'ra mono

zé hã, mare di za oto.

13 Aipê'ê remhã asimirosa'rata wasété na 're aihâimana za'ra wa'aba mono wamhã, te za atâ'â u'âsi ne 're anomro aba mo, 'Re ãhâimana u'âsi mono nhiti. 'Re ãhâimana u'âsi mono pẽ'êzani nhimipawaptobzém na, uburé aiwasédé 're ã'manharĩ za'ra wa'aba mono zé hã asiwi 're uprosi pese za'ra wa'aba mono wapsi, te za 're aihâimana u'âsi za'ra wa'aba mo, 'Re ãhâimana u'âsi mono 'rata.

14 Uburé 'Re ãhâimana u'âsi mono pẽ'êzani 'madâ'â sina 're ãhâimana za'ra mono norĩ si, te 'Re ãhâimana u'âsi mono 'ra, 're nomro, ãpẽ'êzani te te 're ãsimroi wẽ mono norĩ hã.

15 E marĩ da, ma tô 'Re ãhâimana u'âsi mono hã Tipẽ'êzani te te aima 're sômri za'ra wa'wa. E ãsimirob'manharĩzé ma, 're aipahi za'ra wa'aba mono sina, tâma 're romhuri za'ra wa'aba mono da, ma tô te te aima 're sômri za'ra wa'wa. Mare di. Taha dai ô di. 'Re ãhâimana u'âsi mono hã ai'ãma 're 'ra za'ra wa'aba mono da si, ma tô te te aima 're sômri za'ra wa'wa, Tipẽ'êzani hã. Taha nhimipawaptobzéb zarina, wa 'Re ãhâimana u'âsi mono hã wa te 're 'mahârâ za'ra, ãne: "Wamama, Wamama." ãne wa te 're ã'mahârâ za'ra mono zé hã.

16 Wa norĩ hã 'râwi wapẽ'ê 're, wa tô wa te wasina 're waihu'u pese za'ra, 'Re ãhâimana u'âsi mono 'ra oto 're ãwahâimana za'ra mono na. Duré ãpẽ'êzani hã te te wama 're ã'awaihu'u mono zéb zarina zama, wa tô 'râwi wa te wasina 're waihu'u za'ra, ã'ra oto 're ãwahâimana za'ra mono na.

17 'Re ãhâimana u'âsi mono 'ra, oto 're wanomro mono wa, marĩ ãwẽ na tinhib'a'uwẽ ma, 're ãsõpru

mono zéb da, te te tãma 're ĩropisutu za'ra mono zéb ré, wa za 're wahâimana za'ra. Duré uburé marĩ ĩwē na Cristuhu ma, ĩsõprubzéb da, te te tãma ĩropisutuzéb ré, wa za ĩsiré 're wahâimana za'ra. Zezusihi ne, wa te 're robzépata za'ra mono wamhã, wa za ĩsine rowē uptabi na 're wahâimana za'ra.

'Re ĩhâimana u'âsi mono, tizazei'wa norĩ ma, za ĩwē te te tãma 're ĩ'apisutu mono zé wasu'u

¹⁸ Ti'ab ré, wa te 're ĩrobzépata za'ra mono zé hã, taré, 'Re ĩhâimana u'âsi mono, za ĩwē hã te te wama 're ĩ'apisutu mono zé ma hã. Tô sena, wa tô âne na waihu'u, wa hã.

¹⁹ 'Re ĩhâimana u'âsi mono hã uburé te te ĩ'apoto mono hã, simisutu te umnhasi sina sô 're simipari za'ra, bâdâ ĩwa ĩwaptã'ãzéb zô, uburé ti'ra na sô'awi za te te oto dama ĩwasu'u hãiré za'ra zô.

²⁰⁻²¹ 'Re ĩhâimana u'âsi mono, marĩ te te ĩ'apoto mono hã te wasété na 're hâimana za'ra, a'â. Tindhimipoto mono bâ, niha tãma 're ĩhâimana za'ra mono zéb da, te te tãma 're apisutu mono nherē, te te sina tãma âma 're uwaimrami za'ra mono õ di. Siwa'ru te a'â 're hâimana za'ra, siwamnarĩ na. Tane nherē, âne na si'uihã na 're hâimana za'ra mono õ di. 'Re ĩhâimana u'âsi mono si, ma tô tãma pisutu za'ra, siwa'ru a'â 're hâimana za'ra mono da. Niwapsi uburé marĩ te te ĩ'apoto mono hã wasété u'âsi 're ĩhâimana za'ra mono hawi, te za anho'reptu. Taha zô, wa sô 're wanhimipari u'âsi za'ra, siwamnarĩ âna oto 're hâimana za'ra mono da. Tawamhã wasine, robzei u'âsi te za oto 're hâimana za'ra, 'Re ĩhâimana u'âsi mono 'ra, oto 're wanomro mono wa, rowē u'âsi 're ĩwahâimana za'ra mono ne.

22 Pi'õi ãma, ãwasã 're sépu'u za'ra mono wamhã, te za 're wab'ëtê za'ra, 're séptâ'â za'ra mono hã. Tane te za duré uburé marĩ hã 'Re ãhãmãna u'ãsi mono te te ã'apoto mono hã a'ã 're wab'ëtê za'ra, ti'ab ré, wasété na 're ãhãmãna za'ra mono zém hawi 're wairébé mono hã. ãne hã wama waihu'u pese za'ra di oto.

23 Tane nherê, uburé ropodo hã ta norĩ si 're wab'ëtê za'ra mono õ di. Wa norĩ zama, wa 're wawab'ëtê u'ãsi za'ra, 'Re ãhãmãna u'ãsi mono hã tinhoprubzéb zarina, ãmorĩ'rata na Tipê'ëzani, te te wama 're anhomri mono wa, wapê'ê 're, 're ãsãmra u'ãsi mono da hã. 'Rãwi wapê'ê na, wa 're wawab'ëtê u'ãsi za'ra, 'Re ãhãmãna u'ãsi mono hã uburé ti'ra na sô'awi za te te oto dama ãwawasu'u hãiré za'ra zéb zô, 're wanhimipari za'ra mono ré. Duré ti'ab ré, wanhíb'uware na wahãmãna wasété na 're ãwahãmãna za'ra mono zém hawi, za te te 're ãwa'awaibui mono zéb zô, 're wanhimipari za'ra mono ré, wa 're wawab'ëtê u'ãsi za'ra.

24-25 'Re ãhãmãna u'ãsi mono, ãwê si za te te wama 're ã'apisutu mono zéb zô, wa te 're wawã za'ra mono ãna, sô 're ãwanhimipari za'ra mono zéb zarina, ma tô te te 're wa'anho'reptu. Ti'ab ré, marĩ zô 're wanhimipari za'ra mono ré, wa te oto 're 'madã'ã za'ra mono wamhã, e wa za õne u'ãsi sô 're wanhimipari za'ra. Mare di. Tãibã oto, sô 're ãwanhimipari za'ra mono zé hã za. Marĩ zô 're ãwanhimipari za'ra mono zé hã, zahadu wa te 're 'madã'ã za'ra mono õ ré si, wa za tô wanhíptete sina sô 're wanhimipari u'ãsi za'ra, wa te 're sazei utõrĩ za'ra mono ãna.

26 Tane duré 'Re ãhãmãna u'ãsi mono, ãwê hã za te te wama 're ã'apisutu mono zéb zô, wasina sô 're

wanhimipari wa'a za'ra mono wamhã, Īpě'ěžani si te za te te 're wa'apawapto, sô 're wanhimipari wa'a za'ra mono tō da. Duré, wa norĩ hã niha 'Re ĩhâimana u'âsi mono ma, wasi'ãma 're ĩwamreme zusi mono zéb da hã, wa te wasina tãma ãma 're uwaimrami waihu'u za'ra mono dai ō nherē, te za Īpě'ěžani si wa'ãma 're mreme u'âsi, 'Re ĩhâimana u'âsi mono ma, wahâiba mono bâ, wa'ãma 're pě'ězé uptabi mono sina. Wasi'uihã na ĩwě hã wa te tiwi 're ĩwaptērē za'ra mono zém na, wa te tãma ãma 're uwaimrami waihu'u za'ra mono dai ō nherē, te ōhō si wa'ãma 're mreme u'âsi, te te 're wa'apawapto mono da, Īpě'ěžani hã.

²⁷ 'Re ĩhâimana u'âsi mono hã dapě'ě 're, uburé danhimirosa'rada hã tãma waihu'u pese di. Taha wa, Īpě'ěžani nhimirosa'rada hã tãma waihu'u pese di duré. 'Re ĩhâimana u'âsi mono te te tãma 're ĩ'awě mono zéb uwaibaba si, te Īpě'ěžani hã ĩsib'a'uwě norĩ ãma 're mreme u'âsi.

²⁸ 'Re ĩhâimana u'âsi mono zawi pese 'wa norĩ da, marĩ ĩwasédé hã ahã na sada 're hâimana za'ra mono nherē, te za 'Re ĩhâimana u'âsi mono hã ĩwě si te te tãma 're apisutu ĩwa'rãmi, te te sima 're ĩ'awě mono zéb zarina, tinhib'a'uwě da, te te sima 're ĩ'apisutu mono norĩ ma hã. ãne hã wama waihu'u pese za'ra di oto wa norĩ hã.

²⁹ Duréihã marĩ ō ré hã, 'Re ĩhâimana u'âsi mono te te sima ãma ĩrotizéb zarina, te te sima 're ĩwa'apisutu mono norĩ hã, ĩ'ra ne, tō Zezusihi ne, oto 're wahâimana za'ra mono da, ma tō duré te te 're wa'apisutu siro. Ta hã uburé ĩsazei'wa norĩ dub'rada, 're hâimana mono da, ma tō ãne te te 're wa'apisutu siro, sima.

³⁰ Duré 'Re ĩhâimana u'âsi mono te te sima 're

ĩwa'apisutu mono norĩ hã ma tô te te sima 're wa'awẽ, ãtẽme 're wanomro mono da, wa te 're saze za'ra mono da. Tawamhã ãtẽme 're wanomro mono wamhã, ma tô duré te te 're wa'awẽsãmri, wawasédé hã te te oto wa'ãma 're ã'ab'madã'ã mono õ zarina. Ma tô duré te te wama 're apisutu siro, niwapsi ã'ra Zezusi 're ãmorĩ wẽ uptabi ne, 're wahãimana za'ra mono da oto.

Cristuhu nhimizawi pese zé hã dawi ãsi'utõrĩõzé wasu'u

³¹ 'Re ãhãimana u'ãsi mono hã ãne hã te te wama 're apisutu mono wamhã, e niha za tawamhã. Ta hã, wa niwĩ oto 're hãimana za'ra mono wa, e 'wa hã te za wa'ãma ai'uté. Mare di. Uburé wanhitob'ru norĩ nhiptetezé hã, tarére 'Re ãhãimana u'ãsi mono ma hã.

³² 'Re ãhãimana u'ãsi mono hã ti'ra te te wawi sawi za'ra õ di, wazada dã'ã za'ra tõ da. Wa'udãna ma tô wama sãmri za'ra tõ, te te wawi sawi ãna. E tawamhã uburé marĩ ãwẽ hã te te wama 're anhomri mono õ di za. Te te wawi 're azawi mono ãna, te za tõ te te wama 're anhomri, 'Re ãhãimana u'ãsi mono hã.

³³⁻³⁴ Wa norĩ hã 'Re ãhãimana u'ãsi mono, tinhib'a'uwẽ da, te te sima 're ãwa'apisutu mono norĩ si, ma tô te te 're wa'awẽsãmri, wawasédé hã te te oto wa'ãma 're ã'ab'madã'ã mono õ zarina. E ni'wam norĩ hã wawasédé te te wa'ãma 're sa'ra mono da bã bété. Ni'wam norĩ hã, wawasédé te te wa'ãma 're sa'ra waihu'u mono õ di za oto. ãne wa za duré aima waihu'u za'ra wa'wa. Cristu Zezusi hã ma tô wazada dãrã, wa'upana. Apã ma tô duré hãiwa'udu. Taha wa, te oto Timama nhimire niwĩ 're sãmra, dama pire na. Timama ma, te duré te te 're wa'awasu'u wẽ u'ãsi, wazada ãdã'ãzéb zarina, wawasédé hã te te wa'ãma 're ab'madã'ã tõ mono

da oto. Āne wa, e ni'wam norĩ hã wawasété na te te wama 're nharĩ zahu za'ra mono da bâ oto. Mare di.

³⁵ Cristu hã te te 're wa'azawi pese uptabi. E 'wa hã te Cristuhu nhimizawi pese zém nhiti te te 're ĩwa'azani mono da hã, 're hãimana. Ni'wai õ uptabi di. Tane nherẽ, áté wa za a'â wa te 're robzépata za'etē za'ra. Áté marĩ ĩwasédé hã te za a'â wazô 're wairébé. Áté ĩsazei'wa 're wanomro mono wa, te za a'â da te wama 're rob'manharĩ wasété za'ra. Áté mra hã wa za a'â wa te 're sépata za'ra. Áté wanhibrob ãna, wa za a'â 're wahâimana za'ra. Áté te za duré a'â da te wama 're amhâzépa za'ra, da te 're wanhimroi mono da. Áté te za duré da te 're wanhimro. E tawamhã, ãne na wa te 're robzépata za'ra mono 'ru te, te za Cristu te te 're ĩwa'azawi pese mono zé hã, wawi 're si'utõrĩ za'ra. Mare di. Wawi 're si'utõrĩ waihu'u za'ra mono õ di za.

³⁶ Duréihã apito Dawi hã ma tô ãne na wa'ãma rob'ui'ééré siro, za wa te 're ĩrobzépata za'ra mono zém na hã:

“Wamama, 'Re ĩhâimana u'âsi mono, wa norĩ hã asib'a'uwẽ 're wanomro mono wa, wama romnhimimnhasi u'âsi na, wa 're wahâimana za'ra, da te 're wanhimroi mono õ'umnhasite.

Pone'ërebâi ãma 're dapẽ'ëzé za'ra mono ãna, dasazéb da, da te 're ĩsimroi mono ne, te da te dasima 're wawẽ za'ra, da te 're wanhimroi mono da, da te 're wa'ruiwapari za'ra mono wa oto.”

Āne duréihã Dawi hã te te wa'ãma ĩrob'ui'ééré sirõmo za'ra hã, te 're hãimana, ĩbaihã na hã.

³⁷ E tawamhã, uburé marĩ ĩwasédé hã wazada 're ĩhâimana za'ra mono zéb zarina, te za Cristu te

te 're ĩwa'azawi pese mono zé hã wawi 're si'utõrĩ za'ra. Mare di. Uburé marĩ na da te wama 're rob'manharĩ wasété za'ra mono da nherẽ, ta hã te te 're ĩwa'azawi pese mono, te za te te 're wa'apawapto, Cristuhu si, wanhitob'ru norĩ ãma wa te ãma 're ai'uté pese za'ra mono da.

³⁸ Uburé marĩ hã wazada 're ĩhâimana za'ra mono zém hawi, 'Re ĩhâimana u'âsi mono hã tinhimizawi pese zé hã te te wawi 're ĩ'azani mono da hã, mare di. ãne na sena na, wa tô ĩsina waihu'u, wa hã. Wahâiba ré ré 're wahâimana za'ra mono wamhã, duré oto 're wadâ'â za'ra mono nherẽ, tinhimizawi pese zé te te wawi 're azani mono õ di za. Duré ĩhâiba'õ norĩ hã ĩsib'apito norĩ zama, te te wawi 're sani waihu'u za'ra mono õ di, 'Re ĩhâimana u'âsi mono te te 're ĩwa'azawi pese mono zé hã. Duré, ã båtã na marĩ hã wazada 're hâimana za'ra mono 'ru te, te te wawi 're azani mono õ di za, tinhimizawi pese zé hã, 'Re ĩhâimana u'âsi mono hã. Duré niwamhã uburé marĩ hã za wazada 're hâimana za'ra mono 'ru te, te te wawi 're ĩ'azani mono da hã, mare di za tô.

³⁹ Uburé marĩ hã hâiwa na 're ĩsimasa mono hã duré ti'ai 'rowi 're ĩhâimana za'ra mono hã te te wawi 're sawi waihu'u za'ra mono õ di za, 'Re ĩhâimana u'âsi mono nhimizawi pese zé hã. Uburé 'Re ĩhâimana u'âsi mono te te ĩ'apoto mono hã, niwamhã te te wawi 're sani waihu'u za'ra mono õ di za tô, ĩsimizawi pese zé hã. Robaba uptabi di. Wanhib'apito Cristu Zezusihi ãma si 're wanomro mono wa, te te 're wa'azawi pese uptabi, 'Re ĩhâimana u'âsi mono hã, õne u'âsi.

Izarazéhé nhihudu norĩ, 'Re ìhâimana u'âsi mono te te sima 're ì'apisutu mono zé wasu'u

¹ Tô sena, wa za aima rowasu'u za'ra wa'wa. Wa hã Cristuhu te, 're ìmorĩ wa, 're ìzadawa nhipese mono õ di. 'Re ìhâimana u'âsi mono pẽ'ẽzani te te ìma ìwaihu'uzéb zarina, duré 'râwi ìpẽ'ẽ na te ìsi'ãma 're ìrosa'rata mono zéb zarina, wa tô waihu'u, dama 're ìzadawa nhipese mono õ na hã.

²⁻³ Ìsiré zudezu norĩ ãma hã, ãma 're ìpẽ'ẽzé uptabi za'ra mono di, Cristu hã te te siwi 're wẽ'õ za'ra mono wa. Taha wa, te duré ìwi 're robzei'õ pese, ìpẽ'ẽ 'remhã. Ta norĩ ãma 're ìpẽ'ẽzé uptabi za'ra mono wa, wa aré te ìsima 're rosa'rata u'âsi ìpẽ'ẽ na, 'Re ìhâimana u'âsi mono ma, ìsipisutu da, ì'upana za'ra te te 're ìwẽ'õ mono da, duré Cristuhu nhiti, ì'upana 're ìhâimana u'âsi za'ra mono da. ãne hã 'Re ìhâimana u'âsi mono hã te te ìma 'manharĩ dai õ nherẽ, wa taré ìsiwaihu'u, ìsiré zudezu norĩ ãma 're ìpẽ'ẽzé uptabi za'ra mono zém na. ãne na, wa tô aima ìsiwasu'u za'ra wa'wa, 're ìzadawa nhipese mono õ na hã.

⁴ Ta norĩ hã 'Re ìhâimana u'âsi mono nhimipisudu, te 're hâimana za'ra. Ta norĩ ãma, ma tô 're 'ra za'ra, 'Re ìhâimana u'âsi mono hã. Ta norĩ ma si, ma tô rowa'a na aré ì'rata 're sãmra za'ra 'râwi, ìwaihu'u pese zé hã duré ìhâimana wẽ zé hã te te waihu'u za'ra da. Simisutu siré, ãma 're hâimana u'âsi za'ra mono da, ma tô duré marĩ ìwẽ hã te te tãma 're apisutu. Ìsimiroti na Mozési te te ìrob'ui'érézé hã ma tô duré tãma sômri za'ra. Ta norĩ ma, ma tô duré 're siwaihu'u za'ra, ì'uwaibaba si ãma 're ìwata za'ra mono zéb da hã. Ta norĩ ma, ma tô duré ahã na te te tãma 're aropisutu, zudezu norĩ ma, za te te tãma

ãma 're ĩ'a'uwaimrami mono zém na hã.

⁵ Wahi'rata norĩ nhihudu uptabi, te ta norĩ hã 're hâimana za'ra, dama ĩpire uptabi za'ra norĩ nhihudu. Cristu hã zudezu hâiba na, ma tô podo, ti'ai ãma. Cristu hã ta hã, 'Re ĩhâimana u'âsi mono, uburé marĩ hã te te 're ĩ'ab'madâ'â mono. Taha ãma uburé 're wawata u'âsi za'ra wa'aba mono. Tô sena, wa ãne na aima ãma rowasu'u za'ra wa'wa.

⁶ E tawamhã, Izarazéhé nhihudu norĩ hã Cristu te te siwi 're wê'ô za'ra mono wa, te te tâma ãma 're a'uwaimrami mono ô di, 'Re ĩhâimana u'âsi mono, te te tâma 're ĩropisutu za'ra mono zém na hã. Ma tô te te tâma ãma 're a'uwaimrami, tô. Izarazéhé nhihudu norĩ hã, 'Re ĩhâimana u'âsi mono nhimipisudu hã aihĩni 're hâimana za'ra mono ô di, ĩsib'a'uwẽ uptabi, 're nomro mono da.

⁷ Duré Abra'ãhã nhihudu sidâpâsi ĩsihudu norĩ hã, ĩsihudu ahã na za 're ĩhâimana za'ra mono na, 'Re ĩhâimana u'âsi mono te te tâma ĩropisutuzéb zarina, aihĩni uptabi, ãma 're hâimana za'ra mono ô di, 'Re ĩhâimana u'âsi mono 'ra uptabi hã 're ĩhâimana za'ra mono na hã. Duréihã 'Re ĩhâimana u'âsi mono hã ma tô ãne na Abra'ãhã ma ropisutu, romhã ré: "Izatihi nhihudu norĩ si, te za ĩnhib'a'uwẽ uptabi hã 're hâimana za'ra." ãne ma tô tâma waihu'u siro, 'Re ĩhâimana u'âsi mono hã.

⁸ Taha wa, Abra'ãhã nhihudu mono norĩ hã 'Re ĩhâimana u'âsi mono 'ra, aihĩni 're ĩnomro mono ô na, te wasu'u ã hã, duréihã Abra'ãhã ma, 'Re ĩhâimana u'âsi mono te te ĩwaihu'uzém na. Abra'ã hã 'Re ĩhâimana u'âsi mono nhimiropisudu hã te te ãma ĩsaze ne, tane duré ĩsimiropisutu na, da te 're ĩsaze za'ra mono norĩ si, te za Abra'ãhã nhihudu ne oto 're dahâimana za'ra.

⁹ Duréihã 'Re ĩhâimana u'âsi mono hã Abra'ãhã

ma, te te ĩropisutuzé hã, ãne ĩsimiroti wasu'u hã: “Wahub amo na, wa za duré we atême wi, tô ã a'amo za duré ĩwa ĩwaptã'ázém na. Tawamhã apã we atême ĩwisi õ ré, te za Saraha ma ĩ'ra podo, aibã na.” ãne duréihã Abra'ãhã ma, 'Re ĩhãimana u'ãsi mono te te ĩropisutuzé hã.

10 Tawamhã Saraha 'ra hã ma tô tiprédu oto, Izati hã. Ta hã wahi'rada. Prédu wamhã, ma tô timro, Rebecaha ãma. Ta hã ma tô duré tí'ra, ĩ'ra maparane ĩsi'ubza hã, aibã zahuré hã.

11-12 Tane nherê, ĩdi'i 're, zahadu hãimana zahuré nherê, duré marĩ ĩwê hã te te waihu'u zahuré õ nherê, zahadu marĩ ĩwasédé hã te te duré waihu'u zahuré õ nherê, ma tô ãne 'Re ĩhãimana u'ãsi mono hã tãma waihu'u siro, Rebecaha ma: “Īdub'rada hã te za tinoi ma wapu na 're hãimana.” ãne ma tô 'Re ĩhãimana u'ãsi mono hã ĩno si sima pisutu, tidub'rata ma, pire na 're hãimana mono da. E marĩ hã te te 're ĩ'manharĩ wê zahuré mono zéb zarina, ma tô ĩno si sima pisutu, 'Re ĩhãimana u'ãsi mono hã. Mare di. Taha wab õ di. Si'uihã na te te sima ĩwézéb uwaibaba, ma tô sima pisutu, ĩno si.

13 ãne na hã 'Re ĩhãimana u'ãsi mono zadawa wasu'u'wa hã ma tô ĩmreme na rob'ui'ééré, ĩbahã na hã: “Zacoho si, ĩma sawi di. Eza'uhu si, wa tô ĩsiwi wê'õ.” ãne 'Re ĩhãimana u'ãsi mono, si'uihã na te te sima ĩwézéb zarina, Zaco te te sima ĩpisutuzé hã, ĩdub'rata upana.

14 Áté ãne na te za asima 're ĩrosa'rata za'ra wa'aba mo: “'Re ĩhãimana u'ãsi mono hã te te sima ĩwézéb zarina, ĩno si te te sima ĩpisutu na hã ma tô ãma upa. Ī'uwaibaba õ di.” ãne na hã asima ãma 're rosa'rata za'ra wa'aba mono õ di za. Ī'uwaibaba si te te dama

ãma 're a'uwaimrami u'âsi, 'Re ìhâimana u'âsi mono hã. Te te dama ãma 're a'upai mono õ di.

¹⁵ Duréihã Mozésihi ma, ma tô ãne na siwasu'u: “Ni'wam norĩ ãma 're ìpě'ězé za'ra mono da, te ìsima 're wě za'ra mono wamhã, wa za tô ãma 're ìpě'ězé za'ra, ãma 're ìsiwãrĩ za'ra mono da, ta norĩ ãma hã. Duré ni'wam norĩ ãma 're ìpě'ězé za'ra mono da, te ìsima 're wě za'ra mono õ wamhã, ãma 're ìpě'ězé za'ra mono õ di za tô, ta norĩ ãma hã, te 're apawapto mono da.” Æne Mozésihi ma, ìsiwaihu'uzé hã, 'Re ìhâimana u'âsi mono hã.

¹⁶ Taha wa, da te dasima 're ìwě za'ra mono zéb zarina, te te 're da'apisutu mono õ di, da'ãma 're ìpě'ězé mono zém na hã, 'Re ìhâimana u'âsi mono hã. Duré dasi'uihã na sô 're ìdasiwasutu za'ra mono na, te te 're da'apisutu mono õ di, da'ãma 're ìpě'ězé mono zém na hã. Si'uihã na te te sima 're ìda'awě mono zéb zarina si, te za tô da'ãma 're pě'ězé, da'ãma 're ìsiwãrĩ mono zéb da hã.

¹⁷ Duréihã ma tô Mozési hã ãne na ãma rob'ui'ééré, 'Re ìhâimana u'âsi mono hã apito Para'oho ma te te ìrowasu'uzém na, ãne:

“Wa hã wa tô aipisutu, dama asi'apito da. Wa tô duré nasi ai'rãnhito, asimirosa'rata nhiptete na aihâimana mono da, a'â. Wa tô duré nasi aima rob'manharĩ wasété, ìnhimiwaihu'u pese zém na, da te 're ìwaihu'u za'ra mono da, duré daro mono bâ ìnhisi na, da te 're ìwaihu'u pese za'ra mono da oto.”

Æne duréihã apito Para'oho ma, ìsiwasu'uzém na ma tô ìbaihã na ãma rob'ui'ééré, Mozési hã.

¹⁸ Taha wa, 'Re ìhâimana u'âsi mono hã ni'wam norĩ ãma 're pě'ězé za'ra mono da, te te sima 're wě za'ra mono wamhã, te za tô ãma 're pě'ězé

za'ra, ãma 're siwãrĩ za'ra mono da. Duré te te sima 're ãda'awẽ mono zéb uwaibaba, te za te te 're da'a'rãnhito, danhimirosa'rata wasété nhiptete na a'â 're dahâimana za'ra mono da.

'Re ãhâimana u'âsi mono, te te sima 're ãda'awẽ mono zéb zarina si, marĩ hã te te dama 're ã'apisutu mono zé wasu'u

¹⁹ Áté ni'wam norĩ hã ãne wa'rãmi te za te te ãma 're nharĩ za'ra, asiré 're aihâimana za'ra wa'aba mono norĩ hã. Áté ãne te za ta norĩ hã te te ãma 're nharĩ za'ra: “Re ãhâimana u'âsi mono hã danhimirosa'rata wasété nhiptete na a'â 're dahâimana za'ra mono da, te te 're da'a'rãnhito mono wamhã, ãne wamhã, e niha te za te te siwi 're da'awẽ'õ. Te te siwi 're da'awẽ'õ waihu'u mono õ di za. E 'wa hã, te 'Re ãhâimana u'âsi mono nhimipisutu da, hâimana nhiptete na 're hâimana. Robaba di. Ni'wai õ di.” Áté, ãne te za ni'wam norĩ hã te te ãma 're nharĩ za'ra, te te 're waihu'u za'ra mono õ nherẽ.

²⁰ E a norĩ wa'wa hã 'Re ãhâimana u'âsi mono ma, aipire za'ra wa'aba bâ, te za ãne na ãma 're ãnharĩ za'ra wa'aba mo. Piza na zé 'manharĩ hã, e ti'manharĩ'wa te za sina sadanharĩ za'ra, ãne: “E marĩ da, ma tô ãne ãwa'ab'manha.” ãne na te te sina sadanharĩ waihu'u za'ra õ di za.

²¹ ã'manharĩ'wa hã te te sima ãwẽzéb uwaibaba si, te za zé hã te te 're ab'manharĩ, piza na. Zé hã te te su pese wamhã, misi te za oto sada ub'rã. Tawamhã te za sima rosa'rata, piza maparane te te sima 'manharĩ da, ãma. Tawamhã te te ã'manharĩ 'rada hã, wẽ uptabi na te za 'manha, ã'madâ'â ze da hã. Duré ãhâiba amo hã si'aba'ré na te za 'manha,

wě prã na, ta hã marĩ da si 're hãimana mono da, taré.

²² Tane te za duré 'Re ãhãimana u'ãsi mono hã wa'manharĩ'wa hã marĩ hã te te wama 're apisutu, zé 'manharĩ'wa ne. Te te sima 're ãwě mono zéb zarina, te za uburé marĩ hã te te dama 're apisutu, ãwě hã duré ãwě prã hã. Ta hã te te sima 're wě u'ãsi, tiwaihu'u pese na dapo're'õ norĩ hã te te 're ahã za'ra mono da, taha zarina ãsimihã nhiptezém na da te dasina 're waihu'u za'ra mono da. Tane nheré, te te siwi 're ã'awě'õ pese mono norĩ ãma hã, 're wa'a su'u mono õ di, za te te 're ãda'uprosi za'ra mono norĩ ãma hã.

²³ ãne hã ma tô duré te te sima 're wě, pire na 're ãhãimana wě uptabi mono zém na, dama 're siwaihu'u mono da. Uburé wa'ãma 're ãpě'ézé mono zéb zarina, wa'ãma 're ãsiwãrĩ za'ra mono norĩ ma, ma tô ãne na wama 're siwaihu'u, 'Re ãhãimana u'ãsi mono hã. Wa norĩ hã ma tô oto te te 're wa'apisutu siro, rowě uptabi ãma ã'rata 're wahãimana u'ãsi za'ra mono da.

²⁴ Wa norĩ hã ma tô 'Re ãhãimana u'ãsi mono hã te te 're wa'apisutu, ãsib'a'uwě uptabi hã oto 're wanomro mono da. E 'wam norĩ hã tawamhã, 'Re ãhãimana u'ãsi mono te te 're ã'apisutu mono norĩ hã. Wa norĩ hã zudezu norĩ hã aihĩni õ nheré, duré zudezu'õ norĩ hã aihĩni õ nheré, ma tô wasiwazari te te 're wa'apisutu, ãsib'a'uwě oto 're wanomro mono da, wasiré.

²⁵ Duréihã 'Re ãhãimana u'ãsi mono zadawa wasu'u'wa hã ma tô ãmreme na rob'ui'ééré, Ozéza na ãsisi hã. Zudezu'õ wasu'u na ma tô ãne na rob'ui'ééré:

“ãnhib'a'uwě'õ, aré 're ãnomro mono norĩ hã, wa za oto ãnhib'a'uwě na te 're sisi za'ra.

Aré te 're ĩsawi za'ra mono õ norĩ hã, wa za oto ĩma ĩsawi pese na te 're waptẽrẽ za'ra.

²⁶ Tirob ãma 're si'ubumroi mono ré, wa tô aré te tãma 're nharĩ za'ra, ãne: A norĩ wa'wa hã ĩnhĩb'a'uwẽ'õ te 're aihãimana za'ra wa'abamo. Tane nherẽ, tame 're si'ubumroi mono ré, wa za oto ĩ'ra na te 're sisi za'ra, wa hã 'Re ĩhãimana u'ãsi mono 'ra na."

Ãne Ozéza, ĩmreme na te te ĩrob'ui'érézé wasu'u hã.

²⁷⁻²⁸ Iza'iza hã ma tô duré ãne na ãma rob'ui'éré, Izarazéhé nhĩhudu norĩ ãma hã:

"Re ĩhãimana u'ãsi mono hã Wanhib'apito hã te za sa'êtẽ da'ahã za'ra waptu sina, daro mono bâ dawasété na te te 're ĩda'awaihu'u mono zéb zarina. Taha wa, Izarazéhé nhĩhudu norĩ hã â poré zaihã na supara 're ĩsimi'wara mono ne, ahã uptabi nherẽ, te za umro na si te te 're anho'reptu, 'Re ĩhãimana u'ãsi mono hã."

Ãne Iza'iza hã, Izarazéhé nhĩhudu norĩ ãma te te ĩrob'ui'érézé hã.

²⁹ Iza'iza hã ma tô duré ãne na rob'ui'éré:

"Wanhib'apito hã danhipai u ĩsiptete uptabi, te 're hãimana. Õ hã uburé wahi'rata norĩ hã zudezu norĩ hã te te wawi 're a'uprosi mono 'wa'áhã, wa aré wasiré zudezu norĩ hã 're wasi'utõrĩ pese, Sodoma na 'ri nho'õmo nhisi ãma uburé ĩdasi'utõrĩ ne, duré Domora na 'ri nho'õmo nhisi ãma ĩdasi'utõrĩ ne. Tane nherẽ, ma tô ni'wam norĩ ãma tipẽ'ézé za'ra, te te sõ'reptu za'ra da, uburé si'utõrĩ tã da, wasiré zudezu norĩ hã."

Zudezu norĩ hã Cristu te te siwi 're ĩwẽ'õ za'ra mono zé wasu'u

30 E marĩ te wama wasu'u za'ra, tawamhã, ã hã. E niha, wa za tawamhã ãma waihu'u za'ra ni, ãhã wasu'u na hã. ãne, wa za ãma waihu'u za'ra ni. Zudezu'õ norĩ hã 'Re ãhãimana u'ãsi mono, ãwasédé hã te te ãma 're ã'ab'madã'ã mono õ zarina, te te 're ãwēsãmri za'ra mono zéb da hã, te te aré sô 're rob'ruiwapari za'ra mono õ nherẽ, ma tô te te 're awēsãmri, taré te te 're ãsaze za'ra mono zém na si nherẽ.

31 Tane nherẽ, Izarazéhé nhihudu norĩ hã 'Re ãhãimana u'ãsi mono nhimiroti 'rata na Mozési te te ãrob'ui'ére hã te te 're ã'madã'ã pese za'ra mono na, 'Re ãhãimana u'ãsi mono, ãwasédé te te oto ãma 're ab'madã'ã tõ mono da, duré taha zarina te te 're awēsãmri mono da, te te sima ãma 're aroti mono newa, ma tô ta norĩ hã taré sô 're si'wapé za'ra, te te 're ã'awēsãmri mono zéb zô. 'Re ãhãimana u'ãsi mono hã, ãwasédé hã te te ãma 're ã'ab'madã'ã mono õ zarina, te te 're ãwēsãmri za'ra mono zéb da hã, te te sina tãma 're uwaimrami za'ra mono õ di, ta norĩ hã.

32 E marĩ wa, te te sina tãma 're uwaimrami za'ra mono õ di. 'Re ãhãimana u'ãsi mono te te 're ãsazei pese za'ra mono zém na si, te te 're ãwēsãmri za'ra mono zéb da hã, 're si'madã'ã za'ra mono õ wa, 'Re ãhãimana u'ãsi mono nhimiroti 'rata na rob'ui'ére na si 're si'madã'ã ze za'ra mono wa. Cristuhu ãma, wa za oto ëne hã aima ãma simiré'é za'ra wa'wa. Ètẽ tõmo wawẽ hã bãdãdi wa, 're sa'wari mono wa, te za ãma 're dasi'marõpãrĩ za'ra. Taha wa, te za 're dasirẽme za'ra. Tane duré, zudezu norĩ hã ma tô Cristu te te siwi 're ãwẽ'õ za'ra mono zém na si'uihã na sima 're simiza'repese za'ra, wedepo'o nhonhi'rãmi na dazada ãdã'ãzé hã taré newa, Cristu hã da te 're ãsaze za'ra mono zém

na, 'Re ìhâimana u'âsi mono te te 're ìda'anho'reptui mono ò newa.

³³ Duréihã Iza'iza hã ma tô ãne na ãma rob'ui'ééré, 'Re ìhâimana u'âsi mono mreme na:

“Ma'ãpé, ìwapari pese za'ra wa'aba. Zeruzarẽ u, wa za ni'wa hã satõ, Si'ã na sa'a nhisi u. Êtẽ tõmo wawẽ hã bådãdi wa, dawì 're ìsa'wari mono hã, te te 're da'marõpãrĩ za'ra mono wa, 're ìdasirẽme za'ra mono ne, 'Re ìhâimana u'âsi mono 'rata 're ìdanomro u'âsi mono zé hã da te dasina 're uwaimrami za'ra mono ò di za, da te dasiwi 're wẽ'õ pese za'ra mono wa, 'Re ìhâimana u'âsi mono Zeruzarẽ u te te ìsatõrĩ hã.

Tane nherẽ, ni'wam norĩ hã te te sina 're umnhasi za'ra mono wamhã, taré te te sina 're umnhasi baba za'ra mono ò di za. Ìwẽ hã te za tô te te tãma ãma 're a'uwaimrami, 'Re ìhâimana u'âsi mono hã. Taha wa, tãma 're rowẽ u'âsi za'ra mono di za.”

Ãne ma tô duréihã Iza'iza hã ãma rob'ui'ééré siro, Cristu za da te dasiwi ìwẽ'õzém na hã.

10

¹ Ìsisãnawã norĩ, 'Re ìhâimana u'âsi mono te te 're ìda'anho'reptui mono zé hã, uburé ìsiré zudezu norĩ hã te te sina tãma 're uwaimrami za'ra mono da, wa tô ìsima wẽ uptabi za'ra. Taha da, wa ta norĩ ãma 're ìmreme u'âsi za'ra, 'Re ìhâimana u'âsi mono ma.

² Ta norĩ hã te te sima 're wẽ uptabi za'ra, 'Re ìhâimana u'âsi mono ma, 're sisõmri u'âsi za'ra mono da, õhõ ma si, te te 're romhuri pese za'ra mono da. ãne na, wa tô ìsi'uihã na ãma waihu'u pese za'ra, tô sena. Tane nherẽ, 'Re ìhâimana u'âsi

mono ma, da te 're ĩromhuri pese za'ra mono zé hã te te waihu'u pese za'ra õ wa, te te sina tãma 're uwaimrami za'ra mono õ di.

³ 'Re ĩhãimana u'ãsi mono, dawasédé te te oto da'ãma 're ĩ'ab'madá'ã mono õ zarina, te te 're ĩda'awẽsãmri mono zé hã, tãma waihu'u pese za'ra õ di. Te te 're ĩda'awẽsãmri mono zéb da, 'Re ĩhãimana u'ãsi mono te te tãma 're ĩpisutu za'ra mono zé hã, te te 're 'madá'ã pese za'ra mono õ di, ta norĩ hã. Si'uihã na te te sima 're ĩpisutu za'ra mono zéb zarina si, ma tô 'rãwi sô 're si'wapé za'ra, taha na te te 're wẽsãmri za'ra mono da newa.

⁴ 'Re ĩhãimana u'ãsi mono nhimiroti na Mozési te te ĩrob'ui'ééré hã da te 're ĩ'madá'ã pese za'ra mono na, da te ãma 're rosa'rata u'ãsi za'ra mono õ di za oto, taha zarina 'Re ĩhãimana u'ãsi mono, te te sima da'ãma 're aroti mono newa, dawasédé te te oto da'ãma 're ab'madá'ã tõ mono da, duré taha zarina te te 're ĩda'awẽsãmri mono zéb da hã. Tãibã. ãne hã ma tô Cristu hã dawĩ uprosi. Ta hã Danho'reptui'wa na te te sina 're ĩ'umnhasi za'ra mono norĩ si, te za 'Re ĩhãimana u'ãsi mono hã te te 're awẽsãmri, ĩwasédé hã te te oto ãma 're ĩ'ab'madá'ã mono õ zarina, po're'õ nherẽ, te te 're ahã za'ra tõ mono da.

'Re ĩhãimana u'ãsi mono te te 're ĩda'anho'reptui mono zé wasu'u

⁵ Duréihã Mozési hã ma tô ãne na rob'ui'ééré: “Ni'wa hã ĩsimiroti na rob'ui'ééré hã uburé te te 're 'madá'ã pese uptabi mono wapsi, nimahã na marĩ na misi ĩsimiroti na te te upai õ wapsi, tawapsi te za rowẽ na 're hãimana u'ãsi, 'Re ĩhãimana u'ãsi mono 'rata.”

ãne ma tô Mozési hã ãma rob'ui'ééré.

6-8 Tane nherẽ, ni'wa hã ãne te te 'manharĩ waihu'u õ di, ãsimiroti zarina uptabi hã. Ni'wa hã ãsimiroti upai'õ'wa hã 're morĩ õ di. Robaba di. ãté ãne na te za 'rãwi asima 're ãnharĩ za'ra wa'aba mo: “E 'wa hã te za hãiwa u mo, Cristu hã apã we te te saprõni da, wa'upana wazada ãdã'ã za'ra da hã.” ãne hã asima 're nharĩ za'ra wa'aba mono õ di za, Cristu hã Danho'reptui'wa da, 'Re ãhãimana u'ãsi mono te te ãpisudu hã wei morĩ õ newa, ti'ai u.

ãté te za duré ãne na 'rãwi asima 're ãnharĩ za'ra wa'aba mo: “E 'wa hã te za mo, adã 're ãhãimana za'ra mono zéb u, Cristu hã te te hãiwa'utu da apã.” ãne hã asima 're nharĩ za'ra wa'aba mono õ di za duré, Cristu hã apã hãiwa'utu õ newa, ab're hawi. 'Re ãhãimana u'ãsi mono, da te 're saze za'ra mono wapsi, te te 're ãda'awësãmri mono zém na, ma tô Mozési hã ãne na ãma rob'ui'éré, duréihã:

“Re ãhãimana u'ãsi mono zadawa wasu'u hã ma tô aipë'ë 're, 're ãsazei pese za'ra wa'aba mo, 'rãwi. Taha na, ma tô duré dama 're asiwasu'u u'ãsi za'ra wa'aba mo, asadawa na.”

ãne Mozési te te ãma ãrob'ui'érézë hã. Taha na, wa tô duré wa norĩ hã wa te dama 're sadawa wasu'u za'ra, Cristu, da te 're sazei pese za'ra mono wapsi, 'Re ãhãimana u'ãsi mono te te 're ãda'awësãmri mono zém na, dawasédé te te oto da'ãma 're ã'ab'madã'ã mono õ zarina.

⁹ Zezusi hã Asib'apito uptabi na, asadawa na danho'a 're sisi za'ra wa'aba mono wamhã, duré 'rãwi aipë'ë 're 'Re ãhãimana u'ãsi mono, Zezusi te te ãhãiwa'utuzém na, 're sazei pese za'ra wa'aba mono wamhã, tawapsi te za te te 're asõ'reptu za'ra wa'wa, 'Re ãhãimana u'ãsi mono hã.

¹⁰ Zezusi hã wapẽ'ẽ 're, wa te wasina 're ì'umnhasi za'ra mono zém na, 'Re ìhâimana u'âsi mono hã te te 're ìwa'awẽsãmri mono zé hã. Zezusi hã Wanh'apito na danho'a, wa te dama 're ìsisi za'ra mono zém na, 'Re ìhâimana u'âsi mono te te 're ìwa'anho'reptui mono zé hã.

¹¹ Duréihã Iza'iza hã ma tô duré ãne na ìbaihã na rob'ui'ére: “'Re ìhâimana u'âsi mono hã, Danho'reptui'wa da, te te ìpisudu hã da te dasina 're umnhasi za'ra mono wamhã, niwamhã te te sina 're umnhasi baba za'ra mono ò di za. Te za te te dama ãma 're a'uwaimrami u'âsi.” ãne Iza'iza hã te te ãma ìrob'ui'érezé hã.

¹² Zudezu norĩ hã zudezu'õ norĩ me, 'Re ìhâimana u'âsi mono ma hã, tô õhõ si, tãma 're ìhâimana za'ra mono zé hã. Siwanhizari, tãma 're hâimana za'ra mono ò di oto ta norĩ hã. 'Re ìhâimana u'âsi mono, uburé Danhib'apito uptabi, te dama 're hâimana. Taha wa, ni'wam norĩ hã 'Re ìhâimana u'âsi mono te te 're sõ'reptu za'ra mono da, te te tiwi 're waptêrê za'ra mono wamhã, ta norĩ ma, te za tô te te tãma ãma 're a'uwaimrami, dama 're ìsõpru mono zéb zarina.

¹³ Duréihã 'Re ìhâimana u'âsi mono zadawa wasu'u'wa hã ma tô duré ãne na rob'ui'ére:

“Ni'wam norĩ hã Danhib'apito uptabi te te 're sõ'reptu za'ra mono da, te te tiwi 're waptêrê za'ra mono wamhã, ta norĩ hã te za tô te te 're anho'reptu, ìhâiba mono bâ.”

ãne duréihã 'Re ìhâimana u'âsi mono zadawa wasu'u'wa te te ãma ìrob'ui'érezé hã.

¹⁴ E niha te za tawamhã da te tiwi 're waptêrê za'ra, te te 're da'apawapto mono da hã, Cristu, da te dasina 're umnhasi za'ra mono ò nherê. ãne wamhã, dama waihu'u ò di. Duré Zezusihi

wasu'uwẽ hã dapo're'õ na da te 're wapari za'ra mono õ ré hã, e niha te za da te dasina 're umnhasi za'ra, Zezusi hã. Da te dasina 're umnhasi waihu'u za'ra mono õ di. E niha te za duré Zezusihi wasu'uwẽ na, da te 're dapawaptob za'ra mono õ nherẽ, da te 're wapari za'ra. Dama waihu'u õ di.

¹⁵ Duré, e niha te aré Zezusihi zadawa wasu'u'wa norĩ hã daro mono bã datẽme 're nomro, Ìmreme na te te 're dapawaptob za'ra mono da, 'Re ìhâimana u'âsi mono hã te te datẽme 're satõrĩ za'ra mono õ nherẽ. Æne wamhã, te te ãma 're dapawapto waihu'u za'ra mono õ di aré. Tane nherẽ, 'Re ìhâimana u'âsi mono, ma tô te te datẽme 're satõrĩ za'ra tô. Duréihã Iza'iza hã ma tô ãne na ãma rob'ui'ééré:

“Rowasu'u wẽ hã nima hawi da te dama 're ãwisi za'ra mono wamhã, dama 're rowẽ uptabi za'ra mono di za.”

Æne ma tô Iza'iza hã romhã ré rob'ui'ééré, Zezusihi wasu'uwẽ hã ìsadawa wasu'u'wa norĩ hã te te oto datẽme 're ì'ãwisi za'ra mono zém na hã.

¹⁶ Tawamhã Zezusihi wasu'uwẽ hã, ìsadawa wasu'u'wa norĩ hã te te oto datẽme 're ãwisi za'ra mono nherẽ, uburé da te ãma 're saze za'ra mono õ di, wẽ nherẽ. Iza'iza hã ma tô duré ãne na ãma rob'ui'ééré, 'Re ìhâimana u'âsi mono ma, te te ìnharizém na: “Wanhib'apito, wa te dama 're asadawa wasu'u za'ra mono wamhã, e ma tô ai-wasu'u na da te 're wazaze za'ra. Mare di. Da te ãma 're wazaze za'ra mono õ di.”

¹⁷ Tane nherẽ, Cristuhu wasu'uwẽ na, da te ãma 're dapawaptob za'ra mono õ nherẽ, da te ãma 're sasõmri waihu'u za'ra mono õ di. Cristuhu wasu'uwẽ hã dapo're na da te 're wapari za'ra mono wapsi, te za da te 're saze za'ra.

18 E zudezu norĩ hã zahadu ãwasu'uwẽ hã te te 're wapari za'ra mono ã bâ bété. ãwasu'uwẽ hã ma tô te te 're wapari za'ra aré ta norĩ hã, tô sena. Duréihã Dawi hã ma tô ãne na ãma rob'ui'ére:

“ãsadawa wasu'u'wa norĩ mreme hã ma tô daro mono bâ te te 're ropé.

Ta hã ma tô ropâ dapo're na da te 're wapari za'ra, daro mono bâ.”

ãne ma tô Dawi hã ãma rob'ui'ére.

19 E tawamhã, Izarazéhé nhihudu norĩ hã ãwasu'uwẽ te te 're wapari za'ra mono wamhã, e te te 're waihu'u za'ra mono õ di. Ma tô te te 're waihu'u za'ra. Tane nherẽ, tipẽ'ẽ na te te sima 're wẽ za'ra mono õ di, te te 're ãsaze za'ra mono da hã. Zudezu'õ norĩ si, ma tô te te sima 're wẽ za'ra, te te 're saze za'ra mono da. ãne na, ma tô Mozési hã duréihã ãma rob'ui'ére 'rata, zudezu norĩ ma 'Re ãhâimana u'ãsi mono te te tãma ãrowaihu'u za'ra zém na hã:

“ãnhib'a'uwẽ'õ aré 're ãnomro mono norĩ hã oto ãma 're ãnhib'a'uwẽ za'ra mono wa, te za oto ta norĩ hã asiwi 're ãruiwapari za'ra wa'aba mo, ãzadawa parab õ nherẽ.

Ta norĩ hã aré te te 're ãwaihu'u pese za'ra mono õ nherẽ, wa tô ãma 're ãnhib'a'uwẽ za'ra aré. Taha wa, te za asib'ru na sada 're aihâimana u'ãsi za'ra wa'aba mo, ãzadawa parab õ nherẽ.”

ãne zudezu norĩ ma, 'Re ãhâimana u'ãsi mono te te ãrowaihu'u mono zé hã.

20 Iza'iza hã ma tô duré ãne na ãsa'u ãma rob'ui'ére, zudezu'õ norĩ wasu'u na hã. Zudezu norĩ hã te te siwi 're ãwẽ'õ pese za'ra mono zém na, ma tô siptete sina ãma rob'ui'ére, 'Re ãhâimana u'ãsi mono mreme na:

“Ni'wam norĩ hã aré ĩzô 're sôpré u'âsi mono õ nherẽ, ma tô te te siwi 're ĩsãmri za'ra.
 ĩzô 're sinharĩ za'ra mono õ nherẽ, wa tô ta norĩ ma 're ĩsiwaihu'u za'ra.”

²¹ ãne na ma tô duré Iza'iza hã zudezu norĩ ãma rob'ui'éré, 'Re ĩhâimana u'âsi mono mreme na:

“Wa hã wa tô aré Izarazéhé nhihudu norĩ zô 're ĩnhimiwẽ u'âsi za'ra, te 're azawi pese mono wa, apâ ĩtême we 're sihutu mono da. Ta norĩ hã po're ãna 're nomro u'âsi mono wa, te te siwi 're ĩwẽ'õ pese za'ra mono nherẽ, wa tô aré sô 're ĩnhimiwẽ u'âsi za'ra, te 're ĩsawi pese za'ra mono zéb zarina.”

ãne ma tô Iza'iza hã 'Re ĩhâimana u'âsi mono mreme na ãma rob'ui'éré, Izarazéhé nhihudu norĩ ãma hã.

11

'Re ĩhâimana u'âsi mono, Izarazéhé nhihudu norĩ ãma 're ĩpẽ'êzé mono zé wasu'u

¹ E tawamhã, 'Re ĩhâimana u'âsi mono hã tinhib'a'uwẽ norĩ hã ma tô te te siwi 're wẽ'õ za'ra, Izarazéhé nhihudu norĩ hã. Mare di. Te te siwi 're awẽ'õ mono õ di. Mare uptabi di. Wa hã bété, Izarazéhé nhihudu 're ĩmorĩ hã, duré Abra'ãhã nhihudu 're ĩmorĩ hã. Duré Bězamihi nhihudu norĩ siré 're ĩmorĩ wamhã, e ma tô siwi ĩwẽ'õ, Izarazéhé nhihudu 're ĩmorĩ nherẽ. Mare di. Te te siwi ĩwẽ'õ õ di, 'Re ĩhâimana u'âsi mono hã.

²⁻³ Tinhib'a'uwẽ norĩ hã, tô sena te te siwi 're awẽ'õ mono õ di 'Re ĩhâimana u'âsi mono hã, duréihã ĩsãna'rata hawimhã, te te sima 're ĩ'apisutu mono norĩ hã. Duréihã Eriasi hã 'Re ĩhâimana u'âsi

mono zadawa wasu'u'wa hã ma tô Izarazéhé nhi-hudu norĩ ãma ĩwasété na ãma sa'ra, 'Re ĩhâimana u'âsi mono ma. ãne na te te ãma ĩrob'ui'éérézê hã, aima waihu'u pese za'ra wa'aba di. ãne ma tô ãma rob'ui'ééré:

“Wanhib'apito, asadawa wasu'u 'rata 'wa norĩ hã ma tô ta norĩ hã te te 're simro. Duré êtê za'ra 'manharĩ hã, ĩsisiwi aima danhoprubzéb da, marĩ, da te ĩwa 're ĩsa'ra za'ra mono zé hã ma tô uburé te te 're prob za'ra, êne hã. ĩsiwaprosi uptabi, wa oto 're ĩhâimana, te 're ĩ'asawi pese mono hã. Taha 'ru te, te duré ĩzada 're hâimana za'ra, ĩzama te te siwi ĩwĩrĩ da.”

ãne Eriasi hã 'Re ĩhâimana u'âsi mono ma, Izarazéhé nhihudu ãma ĩwasété na te te ĩsa'razém na te te ãma ĩrob'ui'ééré hã, ĩbaihã na.

⁴ Tawamhã 'Re ĩhâimana u'âsi mono hã e niha ma tô asa tãma waihu'u, Eriasihi ma. ãne ma tô tãma waihu'u:

“ãme ĩnhib'a'uwẽ nhipti'ai ãma hã, wa tô te ĩsima 're sawi pese za'ra, 7 miu na ĩhâiba za'ra hã, tisiré norĩ wazari si'utõrĩ tã da dame, ĩhâiba'õ na dame ãma 're ĩwata za'ra mono õ norĩ hã, Ba'a na romhâiba nhisi ãma hã. Ta norĩ si, te ĩzarina 're hâimana u'âsi za'ra.”

ãne 'Re ĩhâimana u'âsi mono hã Eriasihi ma, asa te te ĩwaihu'uzém na rob'ui'ééré hã.

⁵ Tane te duré ãhãna hã dama 're romhâimana za'ra. Da'ãma 're pẽ'ézé mono wa, da'ãma 're ĩsiwãrĩ mono zéb zarina, ma tô 'Re ĩhâimana u'âsi mono hã Izarazéhé nhihudu norĩ hã te te sima 're apisutu, umro na, ĩsib'a'uwẽ uptabi si oto 're hâimana za'ra mono da.

⁶ E tawamhã, marĩ hã te te 're ã'manharĩ wẽ za'ra mono zéb zarina, ma tô te te sima 're apisutu, 'Re ãhãmãna u'ãsi mono hã, zudezu norĩ hã. Mare di. Taha zarina te te sima 're apisutu mono õ di. Taré ãma 're ãpẽ'ẽzé za'ra mono zéb zarina, ãma 're siwãrĩ ze za'ra mono wa, ma tô si'uihã na te te sima 're apisutu, õhõ ãma si 're hãmãna u'ãsi za'ra mono da. Marĩ hã da te 're ã'manharĩ wẽ za'ra mono zéb zarina, te te sima 're da'apisutu mono 'wa'ãhã, ãne zarina 'wa'ãhã, aré senai õ di, 'Re ãhãmãna u'ãsi mono, da'ãma 're ãpẽ'ẽzé mono zéb zarina si, da'ãma 're ãsiwãrĩ mono zé hã.

⁷ Tawamhã e niha, wa za ãne na hã ãma waihu'u pese za'ra ni. ãne, wa za oto ãma waihu'u za'ra ni. Izarazéhé nhihudu norĩ hã 'Re ãhãmãna u'ãsi mono, ãwasédé hã te te oto ãma 're ab'madã'ã tô mono da, duré taha zarina te te 're ãwêsãmri za'ra mono zéb da hã, sô 're sôpré u'ãsi mono nherê, te te sina tãmã ãma 're uwaimrami za'ra mono õ di, ta norĩ hã. 'Re ãhãmãna u'ãsi mono, umro na te te sima 're ãpisutu za'ra mono norĩ si, ma tô te te sina tãmã 're uwaimrami za'ra, 'Re ãhãmãna u'ãsi mono te te 're ãwêsãmri za'ra mono zém na hã. Tane nherê, ni'wam norĩ hã Izarazéhé nhihudu nherê, 'Re ãhãmãna u'ãsi mono nhiti 're ãhãmãna za'ra mono norĩ hã, ta norĩ si ma tô 'Re ãhãmãna u'ãsi mono hã po're nhitob za'ra, ãmreme hã te te 're waihu'u za'ra mono ãna, a'ã 're nomro mono da.

⁸ Duréhã Mozési hã ma tô ãne na ãma rob'ui'ére: “‘Re ãhãmãna u'ãsi mono hã ma tô ta norĩ hã ti-waihu'u pese na te te 're po're nhitob za'ra, simipari ãna 're hãmãna za'ra mono da a'ã. Ta norĩ hã ma tô duré te te 're ãrãiwamnarĩ za'ra, rosa'rata waihu'u ãna, a'ã 're nomro mono da. Taha wa, te ta norĩ hã 'Re ãhãmãna

u'âsi mono te te siwi 're waihu'u za'ra mono
ãna, siwa'ru 're hâimana za'ra.”

Ñe duréhã Mozési hã te te ãma ãrob'ui'érezé
wasu'u hã.

⁹ Dawi hã ma tô duré ãne na ta norĩ ãma rob'ui'ére
za'ra, zudezu norĩ ãma hã:

“Re ãhâimana u'âsi mono hã ta norĩ ma, ãwē na
tãma 're sōprub za'ra mono wē te, ma tô 're
si'madââ ze za'ra, taha na tãma 're rowē
za'ra mono da newa. Taha wa, marĩ wasété
pire na 're si'marõpãrĩ za'ra mono neza,
'rãwi. Duré 'Re ãhâimana u'âsi mono hã te te
hã za'ra neza.

¹⁰ Te te duré 're tōmo nhitob za'ra mono neza,
datob'a na 're ãdanomro mono ne, 're nomro
mono da oto. Duré ta norĩ hã marĩ pire hã
da te 're 'wasari mono wa, ãré 're ãdanhihãpã
za'ra mono ne, te te 're robzépata u'âsi za'ra
mono neza.”

Ñe duréhã Dawi hã Izarazéhé nhihudu norĩ ãma,
te te ãrob'ui'érezé wasu'u hã.

¹¹ E tawamhã, zudezu norĩ hã 'Re ãhâimana u'âsi
mono wi, 're si'marõpãrĩ za'ra mono nherē, apã
ãtēme 're wahutu waihu'u za'ra mono õ di za.
E tawamhã apã ãtēme 're sipizari waihu'u za'ra
mono õ di za. Te za tô apã ãtēme 're sipizari za'ra.
Ta norĩ hã 'Re ãhâimana u'âsi mono wi, 're sipizari
za'ra mono wa, tiwasédé hã te te 're 'manharĩ
za'ra mono wa, ma tô 'Re ãhâimana u'âsi mono
hã zudezu'õ norĩ ma a'ã pisutu za'ra, te te 're
ãda'anho'reptui mono zé hã. Zudezu norĩ hã te te
ãma 're 'ruiwapari za'ra mono da, ma tô zudezu'õ
norĩ ma a'ã pisutu za'ra, te te 're ãda'anho'reptui
mono zé hã, zudezu norĩ hã apã ãtēme 're sipizari

za'ra mono da, te te 're ĩda'anho'reptui mono zém niwĩ.

¹² Zudezu norĩ hã 'Re ĩhâimana u'âsi mono te te 're ĩwēsãmri za'ra mono zéb da hã, te te sina tãma 're uwaimrami za'ra mono õ wa, ma tô 'Re ĩhâimana u'âsi mono hã zudezu'õ norĩ ma, hãiwa hawi marĩ ĩwē na tãma 're sõprub za'ra, daro mono bâ. Tawamhã zudezu norĩ hã 'Re ĩhâimana u'âsi mono niwĩ, ahâ uptabi na apâ za ĩtēme 're sipizari za'ra mono wamhã, tawapsi, te za oto marĩ ĩwē uptabi hã te te dama 're anhomri, 'Re ĩhâimana u'âsi mono hã hãiwa hawi, uburé tinhib'a'uwē norĩ ma hã.

Zudezu'õ norĩ, 'Re ĩhâimana u'âsi mono te te 're ĩ'anho'reptui mono zé wasu'u

¹³ Zudezu'õ norĩ, wa za oto aima ĩsiwasu'u za'ra wa'wa. Wa hã Cristuhu zadawa wasu'u'wa, wa aima 're ĩhâimana za'ra wa'wa. Wa hã te aima 're ĩromhuri za'ra wa'aba mono zé hã, taréi õ di. Taha wa, wa za tô ĩnhimi'ē na te aima 're romhuri u'âsi za'ra wa'wa.

¹⁴ Wa hã te aima 're romhuri za'ra wa'aba mono wa, ĩsiré zudezu norĩ hã te te âma 're ai'ruiwapari za'ra wa'aba mono da, wa tô ta norĩ si te ĩsima 're wē za'ra, ni'wam norĩ hã apâ 'Re ĩhâimana u'âsi mono u 're sipizari za'ra mono wa, te te 're anho'reptui mono da.

¹⁵ Ta norĩ hã te te 're saze za'ra mono õ wa, ma tô 'Re ĩhâimana u'âsi mono hã asa te te siwi 're awē'õ, a'â. Âne wa, ma tô a'â ai'âma si 're siwadi za'ra wa'wa, zudezu'õ norĩ âma hã. Tane nherē, ta norĩ hã niwapsi 'Re ĩhâimana u'âsi mono u, apâ 're ĩsipizari za'ra mono zéb zarina, te te 're wēsãmri za'ra mono wa, te za oto rowē uptabi

na 're hâimana za'ra, ĩwasédé hã te te oto ãma 're ĩ'ab'madâ'â mono õ zarina. 'Re dadâ'â za'ra mono wa, apâ 're dahâiwa'utu za'ra mono wa, dama 're ĩrowẽ za'ra mono ne, te za oto ta norĩ hã rowẽ uptabi na 're hâimana za'ra.

16 ãne na, wa za oto aima ãma romnhimiré'é za'ra wa'wa. ĩ'u'ětẽ wapu hã da te 're 'manharĩ za'ra mono wamhã, sebre õ ré, te za syry na da te 're po'o za'ra, 'Re ĩhâimana u'âsi mono ma, da te 're sômri za'ra mono da. Misi ĩ'u'ětẽ wa'õno hã da te tãma 're sômri za'ra mono nherẽ, wahuré da te tãma 're ĩsômri za'ra mono zé, te wasu'u. Duré áté ni'wa hã te za 'Re ĩhâimana u'âsi mono ma tinha, ãne: “Ã hã wede 're ĩsa mono zari hã wa aima pisutu, ate da.” ãne hã wede hã zahadu 're sa mono ré, ni'wa hã wedezari si 'Re ĩhâimana u'âsi mono te da, te te tãma pisutu nherẽ, ĩpanhipti zama ĩte hã za. Ã hã wedezari hã, Izarazéhé nhihudu norĩ hi'rata norĩ, te wasu'u. Duré ĩpanhipti hã ta norĩ nhihudu norĩ, te wasu'u. Izarazé norĩ hi'rata norĩ hã, 'Re ĩhâimana u'âsi mono ma si, 're hâimana za'ra mono da, te te 're ĩpisutu za'ra mono ne, te za duré ĩsihudu norĩ zama tãma 're hâimana za'ra, wedezari si 'Re ĩhâimana u'âsi mono te da, da te tãma 're pisutu za'ra mono nherẽ, ĩpanhipti zama ĩte ne.

17 ãne na, wa za duré aima ãma romnhimiré'é za'ra wa'wa. Áté azeitona wede hã te a'ubuni wi 're sa, oriwera na ĩsisi hã 'madâ'â ãna ĩprédu hã, tede'wai õ nherẽ. Ta hã zudezu'õ norĩ, te wasu'u. Duré azeitona wede hãiba amo hã te duré 're sa, danho'a da te dasiwi 're ĩ'madâ'â pese mono hã. Ta hã zudezu norĩ, te wasu'u. Tawamhã áté azeitona wede hã danho'a 're ĩsa mono panhipti

hã te za nima niwĩp si panhipti nhi'ẽ za'ra ni, taré simi'wara da, dasiré 're 'rã za'ra mono õ wa. Ta hã, zudezu norĩ hã 'Re ãhãmãna u'ãsi mono te te 're ãsaze za'ra mono õ norĩ, te wasu'u. ãté a'ubuni wi azeitona wede 're ãsa mono panhipti hã te za misi wẽ'ẽ ni, azeitona wede hãiba amo hã dama ã'madã'ã pese u ãwede wãi wa, da te ãma wasisi da, dasiré oto 're 'rãĩ mono da. Ta hã, zudezu'õ norĩ ãma, 'Re ãhãmãna u'ãsi mono, oto ãma 're ãsib'a'u'wẽ za'ra mono zé, te wasu'u. Tawamhã azeitona wede, dama ã'madã'ã pese wede wa'u na te za oto tipanhipti prédu, wẽ na, a'ubuni wi azeitona wede 're ãsa mono panhipti hã rob'rãĩ wede amoi u, da te ãma ãwasi hã. Tane duré, zudezu norĩ ma, 'Re ãhãmãna u'ãsi mono hã marĩ wẽ na tãma 're ãsõprub za'ra mono zé hã, te duré aima 're hãmãna za'ra wa'wa oto, zudezu'õ norĩ na 're aihãmãna za'ra wa'aba mono ma hã.

¹⁸ Taha wa, rob'rãĩ wede, dama ã'madã'ã pese panhipti hã 're 'rã za'ra mono õ wa, da te 're ãsi'ẽ za'ra mono ne, 'Re ãhãmãna u'ãsi mono a'ã te te siwi 're ã'awẽ'õ mono norĩ ma, aipire na tãma 're aihãmãna za'ra wa'aba mono zém na, asina 're sa'ra wa'aba mono õ di za. E ãwede panhipti wa'ui hawi, te ãwede zari hã 're prédu' za'ra. Mare di. ãwede zari hawip si, te ãwede panhipti hã 're prédu' za'ra. Tane, a norĩ wa'wa hã zudezu norĩ ma, aipire na 're aihãmãna za'ra wa'aba mono õ di. Taha wa, aipire na tãma 're aihãmãna za'ra wa'aba mono zém na, 'rãwi asina 're aiwata waihu'u za'ra wa'aba mono õ di za.

¹⁹ Zudezu'õ norĩ, ãté ãhã wasu'u zarina, te za ãne asima 're ãnharĩ za'ra wa'aba mo: "'Re ãhãmãna u'ãsi mono hã rob'rãĩ wede panhipti, da te 're ãsi'ẽ

za'ra mono ne, e marĩ da, ma tō te te siwi 're awē'ō, zudezu norĩ hã. Wa norĩ hã ĩwa'rãmi 're wahâimana za'ra mono da, ma tō ta norĩ hã te te siwi 're awē'ō. Rob'rãi wede amo panhipti hã ĩwede amo na da te ãma 're ĩwasisi za'ra mono ne, wa oto wa norĩ hã 're wahâimana za'ra, ĩ'upana za'ra.”

20 ãne na asima 're nharĩ za'ra wa'aba mono wamhã, ĩ'uwaibaba te za tō asima ãma 're ĩrowaihu'u za'ra wa'aba mo, ta norĩ ãma hã. Ta norĩ hã ma tō te te 're awē'ō tō siwi, te te 're saze za'ra mono ò wa. A norĩ wa'aba si 're sazei pese za'ra wa'aba mono wa, te tō ta norĩ wa'rãmi 're aihâimana za'ra wa'aba mo. Tane nherē, a norĩ wa'wa hã asina 're aiwata za'ra wa'aba mono ò di za. Tō'ã. Taha wa, te za 'Re ĩhâimana u'âsi mono si asiwi 're ĩwazéb za'ra wa'aba mo.

21 E 'Re ĩhâimana u'âsi mono hã zudezu norĩ ma, tinhimihâzé te te tãma 're ba'a za'ra mono ò nherē, te za bété a norĩ wa'aba ma tinhimihâzé hã te te aima 're ba'a za'ra wa'wa, tiwi 're aipizari za'ra wa'aba mono wamhã. Mare di. Te za tō te te 're aihã za'ra wa'wa, tiwi 're aipizari za'ra wa'aba mono wamhã. Taha wa, te za 'Re ĩhâimana u'âsi mono si asiwi 're ĩwazé pese za'ra wa'aba mo.

22 ãhã wasu'u na, wa za 'Re ĩhâimana u'âsi mono nhimizawi pese zé hã ãma waihu'u za'ra ni. ĩsimihâzé pire na zama, wa za duré ãma waihu'u pese za'ra ni. Tiwi 're ĩsi'marõpãrĩ pese za'ra mono norĩ si, te za te te 're ahã za'ra za'êtē. Tane nherē, a norĩ wa'wa hã 'Re ĩhâimana u'âsi mono te te 're asawi pese za'ra wa'aba mono zéb zarina, marĩ ĩwē na te te 're aipawaptob za'ra wa'aba mono zéb da hã, tãma asina 're uwaimrami u'âsi za'ra wa'aba mono wamhã, te za tō rowē hã te te aima 're pisutu u'âsi za'ra wa'wa, hãiwa hawi, ai'ãma 're

ĩpê'êzé za'ra wa'aba mono zéb zarina. Āne na tãma asina 're uwaimrami za'ra wa'aba mono õ wamhã, a norĩ wa'aba zama te za te te siwi 're aiwê'õ pese za'ra wa'wa, rob'rãi wede panhipti hã 're 'rã za'ra mono õ wa, da te 're ĩsi'ê za'ra mono ne.

²³ Duré zudezu norĩ hã Zezusihi zazei'õ'wa na 're ĩhãimana za'ra mono norĩ hã, 'Re ĩhãimana u'âsi mono u oto 're sipizari za'ra mono wamhã, te za oto apã ãma 're sib'a'uwê za'ra, ta norĩ ãma. Āne hã 'Re ĩhãimana u'âsi mono ma, waihu'u pese di, zudezu norĩ ma, apã te te 're ĩ'manharĩ wê za'ra mono zéb da hã.

²⁴ Āne na, wa za oto rowasu'u na aima 'rãsutu za'ra wa'wa, azeitona wede panhipti wasu'u na ãma ĩsimiré'ézém na hã. A norĩ wa'wa hã zudezu'õ na 're aihãimana za'ra wa'aba mono norĩ hã, a'ubuni wi azeitona wede panhipti, da te 'maiwê'êi wa, azeitona wede dama ĩ'madã'ã pese wede u, da te ãma ĩwede wasisi ne, te oto simisutu 're aihãimana za'ra wa'aba mo, zudezu norĩ me. Duré zudezu norĩ hã azeitona wede dama ĩ'madã'ã pese panhipti ne, te 're hãimana za'ra. Taha wede panhipti hã da te 're si'êi mono wa, da te 're ĩsãmra mono hã ĩ'madã'ã'wai ma, tãma wapure di, tã ĩwede na apã te te ãma 're ĩ'ato mono da hã. Tane duré, 'Re ĩhãimana u'âsi mono ma hã wapure di, zudezu norĩ ãma apã 're ĩsib'a'uwê za'ra mono zéb da hã, ta norĩ hã tiwi 're sipizari za'ra mono nherê, aré.

Zudezu norĩ hã, ahã na 'Re ĩhãimana u'âsi mono u, za apã 're ĩsipizari za'ra mono zé wasu'u

²⁵ ĩsisãnawã norĩ, zudezu'õ na da te 're aiwaptêrê za'ra wa'aba mono norĩ hã, marĩ aré dama ĩwaihu'u'õ na roti pire wasu'uzém na wa za

oto aima rowasu'u za'ra wa'wa, asimiza'rese ãna 're aihâimana za'ra wa'aba mono tã da. Zudezu norĩ upana, 'Re ãhâimana u'ãsi mono hã ai'ãma wa'aba si 're sib'a'uwẽ mono newa, 'rãwi asi'ãma 're aiwata za'ra wa'aba mono tã da, wa za oto ãne na aima rowasu'u za'ra wa'wa. Izarazéhé nhi-hudu norĩ hã 'Re ãhâimana u'ãsi mono wi, pẽ'ẽ tete uptabi na 're hâimana za'ra mono nherẽ, pẽ'ẽ tete u'ãsi, tiwi 're hâimana za'ra mono õ di za. Duréhã, 'Re ãhâimana u'ãsi mono te te sima ãpisutu sirõmo zéb zarina, zudezu'õ norĩ hã da'ahã uptabi na Cristu za da te 're ãsaze za'ra mono norĩ za'ratazé hã, oto ãwa waptã'ã wapsi, te za oto zudezu norĩ hã ahã uptabi na ãtẽme 're sipizari za'ra, õhõ ãma si oto 're nomro mono da.

²⁶ ãne 'Re ãhâimana u'ãsi mono te te 're ãsõ'reptu za'ra mono zéb da hã, Izarazéhé nhihudu norĩ hã. ãne na ma tã duréhã Iza'iza hã ãma rob'ui'ééré siro, ta norĩ ãma hã:

“Danho'reptui'wa da hã, Zeruzarẽ ãma Si'ã na sa'a nhisi ãma, dasiré za 're ãhâimana mono hã, tame.

Ta hã Zacoho nhihudu norĩ 're ãwasété za'ra mono zé hã te za te te tãma 're apari.

²⁷ 'Re ãhâimana u'ãsi mono hã ma tã ta norĩ ãma tinhimirosa'rada hã waihu'u siro, ãne: ‘Ta norĩ ma, te ãropisutuzé hã wa za tã tãma ãma uwaimrami za'ra, ãwasédé te tãma 're ã'apari mono zém na.’ ”

ãne Iza'iza hã ta norĩ ãma te te ãrob'ui'éérézé wasu'u hã.

²⁸ Zudezu norĩ hã Cristuhu wasu'uwẽ hã ma tã ahã na te te siwi 're wẽ'õ za'ra. Taha wa, te oto 'Re ãhâimana u'ãsi mono nhitob'ru ne 're hâimana za'ra. Taha wa'rãmi, ma tã ai'ãma 're siwadi za'ra wa'wa,

asiré zudezu'õ norĩ ãma hã. Tane nherẽ, ãsib'a'uwẽ 're nomro mono da, te te pisutu za'ra wa, te ta norĩ hã te te 're azawi pese u'âsi sima, ta norĩ hi'rata ma, te te sina ãropisutu za'ra zéb zarina.

²⁹ 'Re ãhâimana u'âsi mono te te sima 're da'apisutu mono nherẽ, duré marĩ ãwẽ na dama 're sõprub za'ra mono nherẽ, e te za tinhimirosa'rata na te te ãma 're saprĩ. Mare di. Misi haré, ãsimirosa'rada hã te tãma 're hâimana u'âsi.

³⁰ Duréihã, aihirata norĩ wa'wa hã 'Re ãhâimana u'âsi mono nhimiroti hã te te 're wapari za'ra mono ãna, ma tô aré 're hâimana za'ra, zudezu'õ norĩ hã. Tane nherẽ, zudezu norĩ hã 'Re ãhâimana u'âsi mono si te te 're sazei pese za'ra mono õ wa, ma tô oto ai'ãma 're pẽ'êzé za'ra wa'wa, ai'ãma 're sib'a'uwẽ za'ra wa'aba mono da, zudezu'õ 're aihâimana za'ra wa'aba mono nherẽ.

³¹ A norĩ wa'wa hã aré asimipari ãna 're anomro aba mono nherẽ, ai'ãma 're ãpẽ'êzé za'ra wa'aba mono ne, te za oto duré zudezu norĩ ãma zama 're pẽ'êzé 'Re ãhâimana u'âsi mono hã, po're ãna duré ta norĩ hã tiwi 're hâimana za'ra mono nherẽ.

³² 'Re ãhâimana u'âsi mono wi, danhimipari ãna 're danomro mono wa, ma tô te te siwi 're da'awẽ'õ pese, dawasédé hã te te da'ãma 're ã'ab'madã'ã mono hawi. Dazazéb 're, da te 're danheme mono wa, apã dasi'uihã na 're ãdawairébé waihu'u mono õ ne, dawasété hawi 'rãwi 're dasisõ'reptui waihu'u za'ra mono õ di. Taha na, dasi'uihã na da te dasina 're waihu'u za'ra mono da, ma tô te te siwi 're da'awẽ'õ. Uburé da'ãma 're pẽ'êzé mono da, ma tô ãne hã te te dama 're apisutu, 'Re ãhâimana u'âsi mono hã.

Ãwaihu'u pese na 'Re ãhâimana u'âsi mono wasu'u

³³ 'Re ãhâimana u'âsi mono hã uburé da'ãma 're ãsiwamri mono zé hã tãma sa'êtê uptabi di, te te dama 're ã'ab'manharĩ wê mono zéb da hã. ãwaihu'u pe hã tãma sa'êtê uptabi di duré. E 'wa hã te za marĩ hã te te sima 're ã'apisutu mono zé hã tiwi waihu'u. E 'wa hã te za duré tiwi waihu'u, uburé marĩ hã te te 're ã'ab'manharĩ mono zé hã.

³⁴ Duréihã Iza'iza hã ma tô âne na âma rob'ui'ééré: “E 'wai ma, Wanhib'apito nhimirosa'rada hã waihu'u pese di.

E 'wa hã roti na tãma ãwa'rãmi'wa da hã, te 're hâimana. Robaba di.”

³⁵ Wahi'rata hãiba amo hã ma tô duré âne na âma rob'ui'ééré, Zo na ãsisi hã:

“'Re ãhâimana u'âsi mono si, roptede'wa 're hâimana mono nherê, e niha te za ni'wa hã marĩ hã tãma tisô, ãwa'rãmi marĩ na te te tãma ãwa'âbã da hã. ãne hã robaba uptabi di, tãma hã.”

ãne ma tô Zo hã rob'ui'ééré, duréihã.

³⁶ 'Re ãhâimana u'âsi mono si ma tô uburé te te aropoto, sima. Taha wa, te uburé marĩ hã te te 're ab'madâ'â, tiwaihu'u pese na. ãne wa, 'Re ãhâimana u'âsi mono ãma, aihĩni, ãma 're wawata u'âsi za'ra wa'aba mono za. Tane tô.

12

'Re ãhâimana u'âsi mono ma, 're ãdasisômri za'ra mono zé wasu'u

¹ ãsisânawã norĩ, 'Re ãhâimana u'âsi mono hã e wa'ãma 're pê'ézé mono ô di, wa'ãma 're ãsiwãrĩ mono zéb da hã. Wa'ãma 're ãpê'ézé mono zé hã, tãma sa'êtê uptabi di. Taha wa, wa za oto aima roti pese za'ra wa'wa, ãne na hã. 'Re ãhâimana u'âsi mono ma si, te za 're asisômri u'âsi za'ra wa'aba

mo, tiwi 're asisawi za'ra wa'aba mono ãna. Taha ma si, te za aiwẽ uptabi na tãma 're aihâimana za'ra wa'aba mo, te te 're ai'madâ'â wẽ u'âsi za'ra wa'aba mono da. ãhã zarina, ãma 're anomro wẽ u'âsi aba mono wamhã, taha si tô sena, ãma 're ï'aiwata za'ra wa'aba mono zé hã.

² Ti'ai ãma dahâimana wasété na 're ïdanomro mono norĩ ãma hã, 're sasômri za'ra wa'aba mono õ di za. 'Re ïhâimana u'âsi mono wi si, te za 're ïrowaptẽrẽ u'âsi za'ra wa'aba mo, asimirosa'rata wẽ na si, aipẽ'e 're, 're aihâimana za'ra wa'aba mono zé hã te te aima 're pisutu za'ra wa'aba mono da, 're aihâimana za'ra wa'aba mono zép tém na si, oto 're anomro aba mono da. Tawapsi te za 'Re ïhâimana u'âsi mono, te te aima 're ïpisutu za'ra wa'aba mono hã asina 're ïwaihu'u pese za'ra wa'aba mo, marĩ ïwẽ si tãma 're ï'manharĩ za'ra wa'aba mono zém na hã.

³ 'Re ïhâimana u'âsi mono hã tinhimizawi pese zéb zarina, ma tô ïpisutu, ïsadawa wasu'u'wa na oto 're ïhâimana mono da. Taha wa, wa za oto ãne na aima roti pese za'ra wa'wa. Dama aipire na, duré dama aiwẽ na 're aihâimana za'ra wa'aba mono õ nherẽ, 'rãwi aipire na 're asi'madâ'â za'ra wa'aba mono õ di za. 'Re ïhâimana u'âsi mono, ma tô te te sima 're aipisutu za'ra wa'wa, õhõ ãma si oto 're anomro aba mono da. Tane nherẽ, aihĩni ïsazei'wa, asiré 're anomro aba mono nherẽ, ni'wam norĩ si te ïsazei pese 'wa hã 're hâimana za'ra. Duré ni'wam norĩ hã ïsazei prã'i 'wa, te 're hâimana za'ra. ïsazei prã'i 'wa norĩ hã 're sazei pese za'ra wa'aba mono newa, 'rãwi asi'ãma 're rosa'rata za'ra wa'aba mono õ di za, 're sazei pese za'ra wa'aba mono õ nherẽ.

4 Dahâiba misi nherẽ, dahâiba na hã marĩ hã dama 're ãhâimana za'ra mono hã ahâ di, tite mono bâ te te 're ãromhuri za'ra mono zéb da hã, dapara hã duré danhib'rada hã, duré dato hã, uburé ãré 're ãdahâimana za'ra mono hã.

5 Tane hã wa oto wa norĩ hã wasiré ãsazei'wa norĩ hã Cristuhu ãma, wa'ahâ nherẽ, 're wahâimana za'ra, simisutu. Dahâiba misi nherẽ, dahâiba na marĩ hã ahâ na dama 're ãhâimana za'ra mono hã, tite mono bâ te te 're ãromhuri za'ra mono ne, wa oto wa norĩ hã wasiré ãsazei'wa norĩ hã wanhimiromhuri mono bâ sipu'u pese na, wa te 're romhuri za'ra, 'Re ãhâimana u'âsi mono ma, dahâiba misi 're ãdahâimana za'ra mono ne, simisutu wasiré 're wahâimana za'ra mono wa oto.

6 Taha wa, 'Re ãhâimana u'âsi mono hã simizawi pese uptabi wa, romhuri te te wama 're ã'apisutu mono zéb zarina, wasipu'u pese na, wa za wa te tãma 're romhuri za'ra, wate mono bâ, ãma 're ãwasipawaptob za'ra mono zéb da hã. 'Re ãhâimana u'âsi mono zadawa wasu'u na, sena na ãsazei'wa norĩ ma si te te ãma 're ãrowasu'u za'ra mono zéb da, te te sima 're wa'apisutu mono wamhã, taha zarina si, wa za tô ãma 're wasipawaptob u'âsi za'ra. ãsimiroti zarina si, wa za wa te 're sadawa wasu'u za'ra, wasiré ãsazei'wa norĩ ma.

7 Duré ni'wam norĩ hã ãsazei'wa norĩ pawapto'wa da, te te sima 're apisutu mono wamhã, ta norĩ zama te za tô taha zarina si te te tãma 're dapawaptob u'âsi za'ra. Duré 'Re ãhâimana u'âsi mono nhimiroti na dama rowahutu'wa da, te te sima 're ã'apisutu mono norĩ hã te za tô ta norĩ zama ãsarina si te te ãma 're dapawaptob za'ra.

8 Duré ni'wam norĩ hã 'Re ãhâimana u'âsi mono hã te te sima 're apisutu mono wamhã, te za

ĩsazei'wa norĩ ma, ĩsimiroti zarina si te te 're rowahutu za'ra, te te 're wapari za'ra mono wa, pẽ'ẽ toi u'âsi, âma 're hâimana za'ra mono da, siptete sina. Duré ni'wam norĩ hã tinhibrom na dama 're sôprub za'ra mono da, te te sima 're apisutu mono wamhã, te za tô ta norĩ hã dawĩ 're sôti za'ra mono âna, dama âma 're sôprub za'ra, sa'ẽtẽ na. Duré ni'wam norĩ hã ĩsazei'wa norĩ 'madâ'â'wa da, te te 're apisutu mono wamhã, te za tô simi'ẽ na te te 're 'madâ'â u'âsi za'ra, ta norĩ zama. Duré ni'wam norĩ hã te te sima 're apisutu mono wamhã, ta norĩ zama te za da'âma 're pẽ'ẽzé za'ra, dahâzé ré norĩ âma, duré dawĩ 're ĩrobzei'õ za'ra mono norĩ âma. To sina, te za âne zarina te te 're dapawaptob za'ra, ta norĩ hã. Âne wa za wa te wasima 're rob'ma'wamarĩ, romhuri mono bâ, dahâiba hã misi nherẽ, dahâiba na marĩ hã ahâ na dama 're ĩhâimana za'ra mono hã tite mono bâ te te sima 're ĩromhuri za'ra mono ne.

⁹ Taré asimizawizé hã aima 're hâimana za'ra wa'aba mono tõe da, te za tô sena asimizawĩ pese zé hã aima 're hâimana u'âsi za'ra wa'wa. Uburé marĩ wasété nhiti, te za 're aihâimana za'ra wa'aba mo, asiwi 're wẽ'õ pese za'ra wa'aba mono sina. Uburé aihâimanazé ĩwẽ na si te za oto 're aihâimana za'ra wa'aba mo.

¹⁰ Dasisânawãĩ uptabi hã 're ĩdasisawĩ pese za'ra mono ne, te za a norĩ wa'wa hã 're asisawĩ pese za'ra wa'aba mo, Cristuhu âma asisânawã oto asiré 're aihâimana za'ra wa'aba mono wa. Te za duré 're asiwazé pese za'ra wa'aba mo.

¹¹ Aiwa'a âna, te za duré 're ĩromhuri pese za'ra wa'aba mo. Wanhib'apito ma si, te za asimi'ẽi uptabi na 're ĩromhuri u'âsi za'ra wa'aba mo, aihâiba tiwi 're sawĩ za'ra wa'aba mono âna.

12 Uburé marĩ ĩwě hã 'Re ĩhâimana u'âsi mono, za te te wama 're ĩ'apisutu mono zéb zô, wa za sô 're wanhimipari za'ra mono sina, 're wahâimana za'ra, wato sina. Zezusihi zazei'wa oto 're anomro aba mono wa, da te 're ai'ruiwapari za'ra wa'aba mono nherě, te za asiptete sina âma 're anomro u'âsi aba mo. 'Re ĩhâimana u'âsi mono ma, te za 're aimreme zusi u'âsi aba mo.

13 Asiré ĩsazei'wa norĩ wi, marĩ zô tiwi 're ĩrowaptâ'â za'ra mono zéb zarina, te za asimarĩ na 're ĩpawaptob za'ra wa'aba mo. Duré darob amoi hawi atěme 're sihotu aba mono wamhã, te za sô 're atob'uzu za'ra wa'aba mo, asiré ĩsazei'wa norĩ zô hã, asõrõwa u 're 'mazasi za'ra wa'aba mono da.

14 Duré Zezusihi zazei'wa 're anomro aba mono 'ru te, da te 're ai'ruiwapari za'ra wa'aba mono wa, da te aima 're rob'manharĩ wasété za'ra wa'aba mono wamhã, âne wamhã, 'Re ĩhâimana u'âsi mono ma, 're dahâiba 'ru za'ra wa'aba mono õ di za, te te 're da'ahâ za'ra mono da. Rowě hã te te tãma 're ĩ'apisutu mono da si, te za da'ãma tãma 're aimreme zusi aba mo.

15 Ni'wam norĩ hã toi uptabi na 're hâimana za'ra mono wamhã, ĩsine te za 're atoi uptabi za'ra wa'aba mo, ĩsiré. Duré ni'wam norĩ hã pě'ězé uptabi na 're hâimana za'ra mono wamhã, ĩsine te za duré aipě'ězé uptabi na ĩsarina 're aihâimana za'ra wa'aba mo.

16 Duré simisutu te za asimirosa'rata na 're asisazei pese za'ra wa'aba mo, asiré ĩsazei'wa nherě, asisada 're rosa'rata wasété za'ra wa'aba mono tõ da. Duré aiwě na 'râwi asina 're ai-wata za'ra wa'aba mono õ di za. Duré dama ĩpire norĩ zapari, marĩ na romhuri wapu na da te dasima 're ĩromhuri za'ra mono zé hã asiwi 're

wě'õ za'ra wa'aba mono õ di za, 're 'manharĩ za'ra wa'aba mono tõ da, ta hã wapu nherẽ. Duré asiré norĩ nhipai u aiwaihu'u pese na 'rãwi asi'ãma 're rosa'rata za'ra wa'aba mono õ di za.

¹⁷ Duré da te aima 're rob'manharĩ wasété za'ra wa'aba mono wamhã, asa dama ãma 're wa'rãmi wasété za'ra wa'aba mono õ di za. Marĩ ãwě si 're ã'manharĩ za'ra wa'aba mono na si, te za asima 're asõpré u'ãsi aba mo, ãsazei'wa 're anomro aba mono wa, da te ai'ãma 're rosa'rata wasété za'ra wa'aba mono tõ da.

¹⁸ Asada 're dahãimana za'ra wa'aba mono nherẽ, rowě na si dasiré 're aihãimana u'ãsi za'ra wa'aba mono da, te za asina 're ãrosa'rata wě u'ãsi za'ra wa'aba mo.

¹⁹ Duré nimahã na, da te aima 're rob'manharĩ wasété za'ra wa'aba mono wamhã, 'Re ãhãimana u'ãsi mono upana asi'uihã na 'rãwi 're asi'ruiwa'ãbã za'ra wa'aba mono õ di za. Taha si, tinhimihãzém na te te 're ai'ruiwa'ãbã za'ra wa'aba mono da, te za õhõ si 're ã'madã'ã za'ra wa'aba mo. Duréihã ãne na ma tõ Wanhib'apito mreme na rob'ui'ééré, Mozési hã:

“Wa hã ãsiwaprosi, wa za te 're da'a'ruiwa'ãbã.

¹ ãwétési, wa za te dama ãma 're awa'rãmi, marĩ, da te 're ã'manharĩ wasété za'ra mono zém na hã.”

² ãne duréihã Wanhib'apito mreme na rob'ui'ééré wasu'u hã, ãbaihã na hã.

²⁰ Duré ãne 'Re ãhãimana u'ãsi mono nhimiroti amo na rob'ui'ééré wasu'u hã:

“Asitob'ru norĩ hã mra te te 're sépata za'ra mono wamhã, ãsa na te za 're ãpawaptob za'ra wa'aba mo. Duré 'rubu wamhã, te za tãma 're ã'õb za'ra wa'aba mo. ãne zarina,

asitob'ru norĩ ma, 're 'manharĩ wẽ za'ra wa'aba mono wamhã, ta norĩ hã 'rãwi 're siwaihu'u za'ra mono wa, te za aima 're siséb za'ra wa'wa.”

Ãne duréihã 'Re ìhâimana u'âsi mono nhimiroti na rob'ui'ére wasu'u hã. Ãhã zarina si te za dama 're ì'manharĩ wẽ u'âsi za'ra wa'aba mo. Taha wa, a norĩ wa'wa hã 'rãwi asi'uihã na 're asi'ruiwa'âbã za'ra wa'aba mono õ di za.

²¹ Ãhã wasu'u na, wa za oto ìnhimirowasu'u na hã aima 'rãsutu za'ra wa'wa. 'Rãwi dasi'uihã na 're ìdasi'ruiwa'âbã za'ra mono zém na hã da'ãma 're sasômri za'ra wa'aba mono õ di za. Marĩ ìwẽ si te za dama 're ì'manharĩ wẽ u'âsi za'ra wa'aba mo, taha na dahâimana wasédé hã dawĩ 're uprosi za'ra wa'aba mono da, duré taha zarina, tô sena oto ai'ãma 're dasiwadi za'ra wa'aba mono da.

13

Ti'ai ãma dama ìpire norĩ nhimiroti, da te 're ìwapari pese za'ra mono zéb da na rowasu'u

¹ Ti'ai ãma dama ìpire norĩ hã, roti'wa norĩ hã si'uihã na 're sipisutu za'ra mono õ di, dama 're si'apito za'ra mono da hã. 'Re ìhâimana u'âsi mono te te 're ì'apisutu mono zarina si, te dama 're hâimana za'ra uburé. Taha wa, te za uburé aihĩni 're ìwapari pese za'ra wa'aba mo, ìsimiroti hã.

² Ni'wam norĩ hã dama ìpire norĩ nhimiroti te te siwi 're wẽ'õ za'ra mono wamhã, taha si te te siwi 're wẽ'õ za'ra mono õ di za. Ì'u'âbã te za duré 'Re ìhâimana u'âsi mono te te 're ì'apisutu mono zé hã te te siwi 're wẽ'õ za'ra. Ãne hã ni'wam norĩ te te 're 'manharĩ wasété za'ra mono wamhã, 'rãwi te za si'uihã na te te sisada 're sani za'ra, ti'ai ãma dama

ĩpire norĩ nhimihâzé hã, 'Re ãhâimana u'âsi mono zadawa para.

³ ãne, marĩ te te 're ã'manharĩ wasété za'ra mono norĩ si, te za dama ĩpire norĩ nhimihâzé ma, 're pahĩ za'ra. Tanei õ di, marĩ te te 're ã'manharĩ wẽ za'ra mono norĩ hã. Dama ĩpire norĩ ma, 're pahĩ za'ra mono õ di za. Taha wa, te za ĩwẽ si 're ã'manharĩ za'ra wa'aba mo, dama ĩpire norĩ ma, tãma 're aipahĩ za'ra wa'aba mono ãna, 're aihâimana za'ra wa'aba mono da. Tawapsi te za te te 're aiwẽsãmri za'ra wa'wa, ti'ai ãma dama roti'wa norĩ hã.

⁴ Ta norĩ hã te 'Re ãhâimana u'âsi mono zadawa para, te te 're romhuri za'ra, ĩwẽ na si te te 're aipawaptob za'ra wa'aba mono da, taha zarina, rowẽ na 're asimroi wa'aba mono da. Tane nherẽ, marĩ ĩwasété si 're 'manharĩ u'âsi za'ra wa'aba mono wamhã, te za tãma 're aipahĩ za'ra wa'aba mo. E marĩ wa. Dama ĩpire norĩ hã tã sena siptete uptabi wa, te te 're ĩdahã za'ra mono zéb da hã. 'Re ãhâimana u'âsi mono zadawa para, te ĩsimipari'õ norĩ hã te te 're hã za'ra.

⁵ ãne wa, te za uburé ti'ai ãma dama roti'wa norĩ nhimiroti hã 're ĩwapari pese za'ra wa'aba mo, asimipari õ wa, 'Re ãhâimana u'âsi mono te te 're aiwẽ'õ pese za'ra wa'aba mono zéb zarina, te te 're aihã za'ra wa'aba mono tã da. Duré 're aihâimana wẽ za'ra wa'aba mono zém na, 'Re ãhâimana u'âsi mono ma, tãma ãma 're ĩ'uwaimrami za'ra wa'aba mono na, aipẽ'ẽ 're asimirosa'rata na asina 're waihu'u pese za'ra wa'aba mono da, te za ĩsarina dama ĩpire norĩ nhimiroti hã 're ĩwapari pese za'ra wa'aba mo.

⁶ Taha wa, dama ĩpire norĩ nhimipisutuzéb za-

rina te za duré rob'uiprazé hã syry na tãma 're ãpo'o za'ra wa'aba mo, ti'ai ãma dama ãpire norĩ ma. E marĩ wa. Dama ãpire norĩ hã 'Re ãhãimana u'ãsi mono zadawa para, te te 're romhuri za'ra mono wa.

⁷ Taha wa, te za tô ãsarina tãma 're ãpo'o za'ra wa'aba mo, aipawa'ãbãzé hã duré uburé marĩ uiprazé hã. Te za duré tãma 're aihãimana prãdub za'ra wa'aba mo, dama roti'wa norĩ ma.

'Re ãdãsisawi pese za'ra mono zé wasu'u

⁸ Wa'ãbã ãna, dawi 're ãrowaibui wa'aba mono zém na hã, taré dama 're ropisutu za'ra wa'aba mono õ di za. Te za dama ãma 're ãuwaimrami za'ra wa'aba mo, dama 're ãropisutu za'ra wa'aba mono zéb zarina. Asimizawizém na si te za 're ãdazawi pese za'ra wa'aba mo. 'Re dazawi pese za'ra wa'aba mono wamhã, uburé 'Re ãhãimana u'ãsi mono nhimiroti 'rata na Mozési te te ãrob'ui'érézém na te za asina tãma ãma 're ãuwaimrami za'ra wa'aba mo.

⁹ Duréihã 'Re ãhãimana u'ãsi mono, Mozésihi ma, te te ãwaihu'uzéb zarina te te ãma dama ãrob'ui'érézé hã, ãne:

“Aimro na asiwi 're asipsaihuri za'ra wa'aba mono õ di za. Duré 're danhimroi wa'aba mono õ di za. Duré dawi 're asipsaihuri za'ra wa'aba mono õ di za. Duré marĩ ãwẽ hã dawi 're ruiwaparĩ za'ra wa'aba mono õ di za.”

Ãne duréihã 'Re ãhãimana u'ãsi mono nhimiroti hã, dahãimanazé mono bã. Ã norĩ hã, duré aimawi hã ãsimiroti hã ahã uptabi nherẽ, simisutu haré te wasu'u ãsimiroti hã, ãne:

“Te za 're ĩdazawi pese za'ra wa'aba mo, duré aihâimanazé hã 'râwi asima 're ĩsawi pese za'ra wa'aba mono ne.”

Ãne ĩsimiroti hã sa'ětê uptabi nherẽ, misi ĩsimiroti hã te wasu'u, simisutu haré.

¹⁰ Ni'wam norĩ hã te te 're dazawi pese za'ra mono wamhã, marĩ hã ĩwasédé hã te te dama 're 'manharĩ waihu'u za'ra mono õ di za. Taha wa, ni'wam norĩ hã te te 're dazawi pese za'ra mono wamhã, ta hã uburé 'Re ĩhâimana u'âsi mono nhimiroti 'madâ'â pese 'wa, te za 're hâimana za'ra.

¹¹ Zezusi hã we apâ wazô ĩmorĩzéb u hã romhuture di oto, te te ĩwanho'reptu za'ra zé hã te te oto wama ĩ'rãsutu za'ra da hã. Cristu hã duréi, wa te wasina 're ĩ'umnhasi na'rata za'ra mono hawim nherẽ, romhuture di oto, wama hã. Taha wa, te za oto asimiza'rese 're aihâimana za'ra wa'aba mo, darési ãna 're ĩdanhotõ za'ra mono ne, asimiza'rese ãna 're aihâimana tõ za'ra wa'aba mono da. Ãne na ti'ai ãma 're ĩwahâimana hutu za'ra mono zé hã aima waihu'u pese za'ra wa'aba di. Ãne wa, te za 're ĩdazawi pese za'ra wa'aba mo.

¹² Robra ĩsi'utõrĩzéb u hã romhuture di oto, ti'ai ãma ré dawasédé, da te 're ĩ'manharĩ za'ra mono hã. Tâibâ za oto. Cristu hã we apâ morĩ wapsi, rowa'a si te za oto 're hâimana u'âsi, robra wa'râmi. Taha wa, robra 'rowi dawasédé, da te 're ĩ'manharĩ za'ra mono ne, 're wanomro mono õ di za oto. Wawasédé hã wa za oto wa te 're sahâri pese za'ra. Duré Zezusihi nhimirowa'a na si wa za 're wanomro, robra wi wanhiptete sina ãma 're ĩwahâimana za'ra mono zéb da hã, danhimnhi'âsi na dawĩ 're ĩdasisõpa za'ra mono ne.

¹³ Wawasété ãna, wa za oto 're wanomro wẽ,

rowa'a na 're ĩdanomro mono ne. Âzé wa te dame 're âhuri mono ò di za, dato ĩwasété u 're dasi'rã' òtò mono wa, siwa'ru da te 're ĩ'âhuri mono ne, 're wa'rã siwamnarĩ tò za'ra mono da. Duré siwa'ru wahâimanazé ĩwasédé hã wa te 're 'manharĩ u'âsi za'ra mono ò di za, pi'ò na aibã na zama. Duré marĩ na 're ĩwasiwẽ'ò za'ra mono hawi, wa te wasima 're nharĩ za'ra mono ò di za. Duré marĩ na 're wasi'ruiwapari za'ra mono ò di za.

¹⁴ Siwa'ru 'rãwi asima ĩwězéb zarina, aipẽ'ẽ 're asimirosa'rata wasété aba na ãma 're rosa'rata za'ra wa'aba mono ò di za. Wanhib'apito Zezu Cristu 're ĩmorízém na si te za oto 're aihâimana za'ra wa'aba mo, ĩsine.

14

Īsazei'wa nherẽ, sib'uware na 're ĩnomro mono norĩ wasu'u

¹ Īsazei'wa nherẽ, sib'uware na 're ĩnomro mono norĩ zò, te za asitẽme sò 're aihãsi aba mo. Īsimirosa'rata za'ra hã aimawi nherẽ, aiwab ò nherẽ, tãma 're nharĩ wasété za'ra wa'aba mono ò di za. Tane nherẽ, te za sò 're atob'uzu za'ra wa'aba mo.

² Ni'wam norĩ hã Īsazei'wa norĩ hã uburé tisazéb zò te 're sòpré, te te 're huri mono da, romnhi zò zama, 'Re ĩhâimana u'âsi mono te te tiwi 're ĩsawi za'ra mono ò na, 'rãwi 're ĩsisaze za'ra mono zéb zarina. Tane nherẽ, ni'wam norĩ hã Īsazei'wa nherẽ, te za romnhi hã te te siwi 're wẽ'ò za'ra, te te 're huri mono tò da, 'Re ĩhâimana u'âsi mono te te tiwi 're sawi za'ra mono newa.

³ Taha wa, ni'wam norĩ hã uburé romnhi te te 're ĩhuri mono norĩ hã te te siwi 're wẽ'ò za'ra mono ò di za, romnhi na dame 're ĩsaihuri mono ò norĩ hã. Duré ni'wam norĩ, romnhi na dame 're ĩsaihuri

mono õ norĩ zama, te te siwi 're wẽ'õ za'ra mono õ di za, uburé siwa'ru romnhi te te 're ãhuri mono norĩ hã. E marĩ wa. 'Re ãhãmãna u'ãsi mono hã ma tô te te 're awẽsãmri õ norĩ hã, romnhi na dame 're ãsãhuri mono õ norĩ me.

⁴ E a norĩ wa'wa hã ãsib'apito za'ra wa'aba bã, te za marĩ tiwi 're ãwẽ'õ za'ra wa'aba mo, ãsib'apito upana. Taha si te za te te 're waihu'u za'ra, ãhãmãna wasété na, duré ãhãmãna wẽ na zama. Tawamhã ãsazei'wa norĩ hã te za siptete u'ãsi 're hãmãna za'ra. E marĩ wa. Wanhib'apito 'Re ãhãmãna u'ãsi mono hã tiwaihu'u pese na te te 're siptete u'ãsi za'ra mono wa.

⁵ Ni'wam norĩ hã ãsazei'wa norĩ hã te 'rãwi te te si'ãma 're rosa'rata za'ra, nima hã bãdã hã romhuri'õzé hã ãwa 're ãrere'e mono sidãpãsi, bãdã dama 're ãpire za'ra mono zém na hã. Duré ni'wam norĩ, ãsazei'wa norĩ hã te te da'ãma 're rosa'rata za'ra asa, aiwapsi bãdã hã uburé dama 're hãmãna za'ra mono nherẽ, ãma 're ãdahãmãna za'ra mono zéb da hã. Taha wa, ate wa'aba mono bã romhuri'õzé bãtã mono na asimirosa'rata mono bã te za asiptete sina ãma 're aihãmãna za'ra wa'aba mo, tô õhõ na si.

⁶ Ta norĩ hã nimahã bãdã hã romhuri'õzé hã dama 're ãpire za'ra mono zém na te te si'ãma 're ãrosa'rata za'ra mono norĩ hã, Wanhib'apito ãma 're wata za'ra mono da, te ãne te te 're 'manharĩ za'ra. Duré ni'wam norĩ hã uburé siwa'ru romnhi te te 're ãhuri mono norĩ hã te ãne te te 're 'manharĩ za'ra, Wanhib'apito 'Re ãhãmãna u'ãsi mono ãma 're wata za'ra mono da, dasa na dama 're sõpru mono wa. Duré ni'wam norĩ hã romnhi na dame 're ãsãhuri mono õ norĩ hã, te ãne duré te te 're 'manharĩ za'ra aiwa, 'Re ãhãmãna u'ãsi mono ãma

're wata za'ra mono da, waihu'u pese wa, duré sōprub uptabi wa.

⁷⁻⁸ Wasi'uihâ na 'râwi wahâiba misire nherë, wasina 're wahâimana za'ra mono õ di za. Wanhib'apito te te wama 're ï'apisutu mono zéb zarina si, wa tâma 're wahâimana za'ra. Duré wasi'uihâ na bâdâ hã wadâ'âzé hã wa te wasima 're pisutu waihu'u za'ra mono õ di za. Wanhib'apito te te waãma 're ï'apisutu mono zéb zarina si, wa za 're wadâ'â za'ra, õhõ ma. Taha wa, wahâiba ré 're wahâimana za'ra mono ré, duré oto 're wadâ'â za'ra mono wamhã, ïsib'a'uwẽ, wa za 're wahâimana u'âsi za'ra, simisutu.

⁹ Cristu hã dâ'â nherë, ma tô apâ hâiwa'udu, hâiba ré 're ïhâimana za'ra mono norĩ nhib'apito da hã, duré 're ïdâ'â za'ra mono norĩ nhib'apito da zama. Uburé ïsazei'wa norĩ nhib'apito da, ma tô hâiwa'udu apâ. Taha wa, wa ïsib'a'uwẽ 're wahâimana u'âsi za'ra oto, simisutu.

¹⁰ Tane nherë, e marĩ wa, te bété asisãnawã norĩ hã 're ïwẽ'õ za'ra wa'aba mo, asiré ïsazei'wa 're anomro aba mono nherë. E marĩ wa, te 're ï'ruiwapari u'âsi za'ra wa'aba mo, asisãnawã nherë. Niwapsi wa za uburé 'Re ïhâimana u'âsi mono nho're aimasam ni, te te wa'awaihu'u da, wahâimana wẽ na, wahâimana wasété na zama. Tamep si za te te da'awẽ'õ na dâ'âsina, asi'uihâ na 're asiwẽ'õ pese za'ra wa'aba mono õ di za, ti'ab ré.

¹¹ Duréhã 'Re ïhâimana u'âsi mono zadawa wasu'u'wa, ma tô ãne na ãma rob'ui'ééré, ïmreme na:

“Wa hã uburé Danhib'apito, tô sena 're ïhâimana mono zé hã aima waihu'u pese za'ra wa'aba di. Duré tô sena aima ïsiwasu'u za'ra wa'aba zéb zarina, wa duré tô sena

aima ropisutu za'ra wa'wa. ãne, wa aima ropisutu za'ra wa'wa. Niwapsi te za a'uwe mono bâ dahi'râtitõ ïnho're ïma ana ni, dama ïpire uptabi wa. Tawamhã tame dapoto mono bâ te za ïnhisi za'ra ni, ïnhisi na 'Re ïhâimana u'âsi mono na."

Ãne ma tô ïbaihã na ãma rob'ui'ééré, 'Re ïhâimana u'âsi mono mreme na rob'ui'ééré'wa hã.

¹² Tamep si, wa za oto wasi'uihã na tãma wasiwasu'u za'ra ni wahãiba mono bâ, ti'ab ré wahâimanazém na, uburé marĩ hã wa te 're ï'manharĩ za'ra mono zém na hã.

¹³ Taha wa, wasiré ïsazei'wa nherẽ, 're ïwasiwẽ'õ za'ra mono zé hã wa za oto rême pese za'ra ni. ãne zô si, te za asina 're asõpré wa'aba mo, marĩ ïwẽ hã 're ï'manharĩ za'ra wa'aba mono zéb zô. Marĩ hã 're 'manharĩ za'ra wa'aba mono ré, asiré ïsazei'wa norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marõpãrĩ tõ za'ra mono da, te za marĩ ïwẽ si 're ï'manharĩ u'âsi za'ra wa'aba mo.

¹⁴ Wa hã Wanhib'apito Zezusihi ãma 're ïhâimana mono wa, wa tô ïsina waihu'u sena na, uburé dasa hã ïwẽ na hã, duré ïwasété õ na si. Tane nherẽ, ni'wam norĩ hã te za ãne hã te te ãma 're rosa'rata upa za'ra: "Ã hã romnhi hã, wasétére di. 'Re ïhâimana u'âsi mono ma hã wẽ õ di, wa te 're ïhuri mono da hã." ãne hã ni'wam norĩ hã te te ãma 're rosa'rata za'ra mono wamhã, õ norĩ ma si, romnhi hã wasété di tô. Tane nherẽ, te te siwi 're wẽ'õ za'ra mono nherẽ, te te 're huri mono wamhã, dawasédé te wasu'u.

¹⁵ Ãté marĩ dasa hã te za 're ïhuri aba mo, asiré ïsazei'wa norĩ te te siwi 're ïwẽ'õ za'ra mono hã.

Tawamhã, 're huri aba mono wamhã, 'Re ãhãmãna u'ãsi mono te te dawĩ 're awẽ'õ mono newa, ãté te za ãne na tiwi 're ãrobzei'õ za'ra wa'aba mo, tô õ norĩ wi hã. ãne wamhã, asimizawi pese zé hã tãma ãma 're uwaimrami za'ra wa'aba mono õ di za. Tãma sawĩ uptabi za'ra wa, ma tô Cristu hã sada tidã'ã za'ra. Taha wa, romnhi hã asiré ãsazei'wa norĩ te te 're ãwẽ'õ za'ra mono hã, 're huri aba mono õ di za, 're huri aba mono wa, ta norĩ hã asa na tiwi 're ãrobzei'õ za'ra mono zéb zarina, tiwasété na 're ãsi'marõpãrĩ za'ra mono na 're si'utõrĩ tô mono da.

¹⁶ ãne hã marĩ hã aima wasété aba õ nherẽ, 're 'manharĩ za'ra wa'aba mono õ di za, da te 're aiwasu'u wasété za'ra wa'aba mono tõ da.

¹⁷ E marĩ wa. 'Re ãhãmãna u'ãsi mono hã ãsazei'wa norĩ ãma 're ãsib'a'uwẽ mono zé hã, dasa hã da te 're ãwẽ'õ za'ra mono zé, te te wasu'u õ di. Uburé marĩ hã da te 're ã'huri mono zéb zama te te wasu'u õ di duré. E marĩ te wasu'u tawamhã, 'Re ãhãmãna u'ãsi mono, da'ãma 're ãsib'a'uwẽ mono zé hã. Ta hã 'Re ãhãmãna u'ãsi mono nhimiroti zarina 're ãdanomro wẽ mono zé, te wasu'u. Duré 'Re ãhãmãna u'ãsi mono, Tipẽ'ẽzani na te te 're ãda'apawapto mono zéb zarina, rowẽ uptabi na 're ãdanomro mono zé, te wasu'u, dato sina.

¹⁸ ãne na ni'wam norĩ hã Cristuhu ma, te te 're romhuri wẽ za'ra mono wamhã, 'Re ãhãmãna u'ãsi mono ma, te za te te sina 're rowẽ zani za'ra, uburé 're ãhãmãna wẽ za'ra mono zém na. Tawamhã te za duré da te 're wẽsãmri za'ra, ti'ai ãma ré.

¹⁹ Taha wa, rowẽ na wasiré 're ãwahãmãna za'ra mono zéb zõ si, wa za wasima 're wanhopré. Wanhib'apito ãma wahãmãna nhiptete u'ãsi 're wanomro mono da, 're ãwasipawapto za'ra mono

zém na, wa za duré 're wanomro u'âsi.

²⁰ Tawamhã dasa siwa'ru 're huri aba mono wa, 'Re ãhâimana u'âsi mono, danhiptete sina âma 're ãdanomro mono zéb da, te te da'âma 're ãromhuri wê mono zé hã tiwi 're uprosi za'ra wa'aba mono tó da, âté 're huri aba mono ô di za, siwa'ru dasa hã, romnhi hã. Tô sena uburé dasa hã ãwê si da te 're ãhuri mono da hã. Tane nherê, dasa hã siwa'ru 're huri aba mono ré, asiré ãsazei'wa nherê, sib'uware na 're ãnomro mono norĩ hã te te 're ai'madâ'â za'ra wa'aba mono wa, asarina wa'aba tiwasété na 're si'marôpãrĩ za'ra mono wamhã, tawamhã, aiwasédé te za tô 're ãmanharĩ za'ra wa'aba mo.

²¹ Taha wa, romnhi hã siwa'ru 're huri aba mono ô di za, duré uwa 'rã wa'u ãsé hã 're âhuri aba mono ô di za, taha zarina asiré ãsazei'wa norĩ hã tiwasété na apã 're si'marôpãrĩ tó za'ra mono da. Duré siwa'ru marĩ aimawimhã 're 'manharĩ za'ra wa'aba mono wa, ni'wam norĩ hã tiwasété na apã 're si'marôpãrĩ tó za'ra mono da, 're 'manharĩ za'ra wa'aba mono ô di za.

²² 'Re ãhâimana u'âsi mono si te te âma 're awaihu'u mono da, te za 'rãwi asima si âma 're ãrosa'rata za'ra wa'aba mo, siwa'ru romnhi 're huri aba mono wa, âma 're ãupa za'ra wa'aba mono ô zém na hã. Ni'wam norĩ hã uburé siwa'ru, tisa te te sima 're ãwê uptabi za'ra mono zéb zarina, te te 're ãhuri mono na, 're siwê'ô za'ra mono ô wamhã, ãpê'ê 're tãma 're rowê uptabi za'ra mono di za. Duré ni'wam norĩ hã siwa'ru dasa hã te te siwi 're ãwê'ô za'ra mono zéb zarina, te te 're ãhuri mono ô na, 're siwê'ô za'ra mono ô wamhã, ãpê'ê 're tãma 're rowê uptabi za'ra mono di za duré, âne hã aiwa.

²³ Tane nherê, ni'wam norĩ hã romnhi siwa'ru te te 're huri mono nherê, 'rãwi âma 're siwawã

za'ra mono wamhã, 'Re ãhãmãna u'ãsi mono hã te za te te 're wẽ'õ za'ra, tisa na 're ãsiwawã za'ra mono zéb zarina. Tane hã marĩ hã wa te 're 'manharĩ za'ra mono nherẽ, 'rãwi ãma 're wasiwawã za'ra mono wamhã, taha na wa za wawasédé hã wa te 're 'manharĩ za'ra.

15

Ïsazei'wa norĩ, prédup sina 're ãsipawaptob za'ra mono zé wasu'u

¹ Wa norĩ hã wanhiptete sina, Wanhib'apito ãma, wa te 're ãsasõmri u'ãsi za'ra mono norĩ hã, marĩ, wa te wasima 're ãwẽ za'ra mono zéb zarina si, wa te 're 'manharĩ za'ra mono õ di za. Wasiré ãsazei'wa nherẽ, hãmãna nhib'uware na 're ãhãmãna za'ra mono norĩ hã, wa za wa te 're pawaptob za'ra, hãmãna nhiptete na wasiré ãma 're hãmãna u'ãsi za'ra mono da.

² Wasiré ãsazei'wa norĩ hã marĩ te te sima 're ãwẽ za'ra mono zéb zarina, wa za wa te ãma 're sazei pese za'ra, marĩ ãwẽ na si, wa te ãma 're pawaptob u'ãsi za'ra mono da, hãmãna prédup sina oto ãma 're hãmãna u'ãsi za'ra mono da.

³ Cristu hã bété, ti'ai ãma 're morĩ ré hã, e sima si ma tô tihãmãnazéb da hã 're si'madã'ã. Mare di. 'Rãwi tihãmãnazém na si, 're si'madã'ã mono õ di. ãne na duréihã ma tô ni'wa hã ãwasu'u na ãma rob'ui'ééré siro:

“Ïmama, ni'wam norĩ hã te te ai'ãma 're ãwasété za'ra mono norĩ hã ma tô ai'u'ãbã ã'ãma zama te te 're wasété za'ra. Tane nherẽ, aimawi 're ãhãmãna mono zéb da hã, te ãsima pisutu õ di, ãsi'uihã na hã.”

ãne na ma tô duréihã ãbaihã na ãma rob'ui'ééré, ãwasu'u na hã.

⁴ Uburé 'Re ìhâimana u'âsi mono nhimiroti 'rata na rob'ui'ééré hã, e taré ma tô tinhimiroti hã te te dama 're apisutu, da te âma 're ìrob'ui'ééré za'ra mono zéb da hã. Mare di. Taré te te dama 're apisutu mono õ di. Ìsimiroti hã wa te 're waihu'u pese za'ra mono da, ma tô âne hã te te dama 're apisutu. 'Re ìhâimana u'âsi mono nhimiroti 'rata na rob'ui'ééré hã wa te 're sôré u'âsi za'ra mono wamhã, wanhiptete sina wa za âma 're wahâimana u'âsi za'ra, marĩ na uburé wa te 're robzépata za'ra mono nherê. Wa te 're sôré u'âsi za'ra mono wamhã, te za wama 're rowê za'ra, wawi 're robzei'õ za'ra mono âna, 're ìwahâimana za'ra mono zéb da hã. Ôhõ umnhasi sina, wa za tô âhã zarina si 're wahâimana za'ra, 'Re ìhâimana u'âsi mono 'rata 're ìwahâimana u'âsi za'ra mono zéb zô, wasina 're wanhimipari za'ra mono sina.

⁵ 'Re ìhâimana u'âsi mono si dapisutu'wa hã, uburé marĩ na da te 're robzépata za'ra mono nherê, danhiptete sina âma 're ìdahâimana u'âsi za'ra mono da hã. Taha si te te sina dama 're ì'arowê zani mono hã, dawi 're robzei'õ za'ra mono âna, âma 're ìdahâimana za'ra mono zéb da hã. Taha wa, wa tô te ìsima 're aiwê za'ra wa'wa, ta hã aihĩni te te 're aipawaptob za'ra wa'aba mono da, asiré ìsazei'wa norĩ hã simisutu asimirosa'rata na 're asisazei pese za'ra wa'aba mono da oto, Cristu Zezusi 're ìmorĩ wê zéb zarina.

⁶ Asimirosa'rata na 're asisazei u'âsi za'ra wa'aba mono wapsi, te za 'Re ìhâimana u'âsi mono âma Wanhib'apito Zezu Cristuhu mama âma simisutu u'âsi, âma 're aiwata za'ra wa'aba mo.

Zudezu'õ norĩ hã, Cristuhu wasu'uwê te te oto ìwaihu'u za'ra zé wasu'u

7 Cristu hã sitēme te te 're ĩ'aiwaibui wa'aba mono ne, te za aihâiba zô asisô 're atob'uzu za'ra wa'aba mo, 're asisawi pese za'ra wa'aba mono sina. Taha zarina, 'Re ĩhâimana u'âsi mono âma 're dawata u'âsi za'ra mono da, te za âne asima 're ĩ'manharĩ wẽ u'âsi za'ra wa'aba mo.

8 Cristu hã ma tô we ti'ai u datēme mo, zudezu norĩ hã te te 're apawapto mono da, duréihã zudezu norĩ hi'rata ma, dama ĩpire za'ra norĩ ma, 'Re ĩhâimana u'âsi mono te te tãma 're ĩropisutu za'ra mono zéb zarina, te te dama âma 're a'uwaimrami mono da, duré uburé 'Re ĩhâimana u'âsi mono te te dama âma 're ĩ'a'uwaimrami mono zém na, tô sena na da te âma 're waihu'u pese za'ra mono da.

9 Duré zudezu'õ norĩ hã 'Re ĩhâimana u'âsi mono, da'âma 're ĩpě'ézé mono zé hã te te oto sina 're waihu'u za'ra mono wa, âma 're wata za'ra mono da, ma tô we Cristu hã zudezu norĩ u satõ, 'Re ĩhâimana u'âsi mono hã. Duréihã âne rob'ui'ééré na ĩwasu'u hã:

“Wa hã zudezu'õ norĩ siré 're ĩhâimana mono ré, wa za ĩsiré za'ra, ai'âma 're ĩwata u'âsi.

Īnho're na zama, wa za duré ai'âma 're ĩwata u'âsi.”

10 Duré rob'ui'ééré amo na ĩwasu'u hã, âne:

“A norĩ wa'wa hã zudezu'õ na 're aihâimana za'ra wa'aba mono norĩ, ma'âpé simisutu asiré atoi uptabi na, âma 're aihâimana za'ra wa'aba mono, 'Re ĩhâimana u'âsi mono nhib'a'uwẽ norĩ me.”

11 Duré rob'ui'ééré amo na ĩwasu'u hã, âne:

“Zudezu'õ na 're aihâimana za'ra wa'aba mono norĩ, ma'âpé Wanhíb'apito âma si 're aiwata u'âsi za'ra wa'aba mono, uburé aipoto mono bâ 're aihâimana za'ra wa'aba mono norĩ hã.”

12 Iza'iza hã ma tô duré ãne na ãma rob'ui'éré siro:

“Niwapsi te za Zéséhé nhihudu hã we datēme wi, apito Dawihi mama nhihudu hã.

Wei wisi wapsi, te za 'Re ãhâimana u'âsi mono hã tâma pisutu, zudezu'õ norĩ nhib'apito, 're hâimana mono da oto, daro mono bâ.

Tawamhã ta norĩ hã te za te te siwi 're umnhasi, marĩ ãwē hã te te tâma 're ãpisutu za'ra mono zéb zarina, za te te tâma ãma 're ã'uwaimrami za'ra mono zém na hã.”

Ãne duréihã Iza'iza hã te te ãma ãrob'ui'érezé hã, 'Re ãhâimana u'âsi mono nhimiropisutuzém na. ã hã, 'Re ãhâimana u'âsi mono te te dama ãropisutuzém na, ma tô oto dama ãma uwaimra.

13 'Re ãhâimana u'âsi mono hã waihu'u pese wa, te za te te 're wa'apawaptob u'âsi, marĩ ãwē hã te te wama 're ãpisutu za'ra mono zéb zarina, za te te wama ãma 're ã'uwaimrami mono zéb zô, wa te wasiwi 're umnhasi za'ra mono sina, sô 're wanhimipari u'âsi za'ra mono da. Taha wa, wa ai'ãma tâma 're ãmreme u'âsi za'ra wa'wa, atoi uptabi na 're aihâimana u'âsi za'ra wa'aba mono da, duré rowē si te te aima 're pisutu za'ra wa'aba mono da, asina 're umnhasi za'ra wa'aba mono wa. ãpē'ēzani nhimipawaptobzéb zarina, marĩ ãwē uptabi hã 'Re ãhâimana u'âsi mono, za te te aima 're ãsômri za'ra wa'aba mono zéb zô, asiwi 're umnhasi za'ra wa'aba mono sina, sô 're asimipari za'ra wa'aba mono zém na, 'rãwi asima ãma 're sa'ētē za'ra wa'aba mono da, wa tô te ãsima 're aiwē za'ra wa'wa.

Paru hã, 'Re ãhâimana u'âsi mono nhimipawapto-bzém na te te 're ãda'apawapto mono zé wasu'u

14 Īsisānawā norī, wa hā wa tō ai'āma waihu'u pese za'ra wa'wa, asimizawi pese sina oto 're anomro wē wa'aba mono zém na hā. Duré aima waihu'u pese za'ra wa'aba di oto, 're aihâimana wē za'ra wa'aba mono zéb da hā. Āne hā wa tō duré ai'āma waihu'u pese za'ra wa'wa, Wanhīb'apito nhimiroti na oto asima 're ĩroti waihu'u pese za'ra wa'aba mono zém na zama.

15-16 Tane nherē, āhāna ĩnhimi'ui'éré na, wa tō sō'awi aima rowasu'u za'ra wa'wa, ĩsina ĩpahi āna, rowasu'u ahā na te āma aipo're pu'u za'ra wa'aba da. Te aiwi udā waihu'u za'ra wa'aba āna, wa tō ĩnhimi'ui'éré na hā aima rowasu'u pese za'ra wa'wa, 'Re ĩhâimana u'âsi mono hā sōprum na te te ĩpisutu wa, Cristu Zesusihi ma si te oto 're romhuri mono da, zudezu'ō norī hā te tāma 're apawapto mono da. Sasedoti norī hā 'Re ĩhâimana u'âsi mono ma, te te da'āma 're ĩromhuri za'ra mono ne, wa duré wa hā zudezu'ō norī āma te 're romhuri u'âsi, 'Re ĩhâimana u'âsi mono ma, Zesusihi wasu'uwē na te 're pawaptob za'ra mono wa, te te 're ĩsaze za'ra mono zéb zarina, 'Re ĩhâimana u'âsi mono te te 're wēsāmri za'ra mono da. 'Re ĩhâimana u'âsi mono pē'ēzani nhimipisutuzéb zarina, ta norī hā ĩsib'a'uwē oto 're nomro mono wa, 'Re ĩhâimana u'âsi mono te te 're ĩwēsāmri za'ra mono zéb da hā, wa āne na hā te tāma 're romhuri u'âsi.

17 Cristu Zesusihi āma si oto 're ĩhâimana mono wa, wa 're ĩsi'uze, 'Re ĩhâimana u'âsi mono ma si, te 're ĩromhuri mono zém na hā oto.

18 Te 're ĩrowasu'u wē mono zéb zarina, duré te 're ĩromhuri wē mono zéb zarina ma tō zudezu'ō norī hā te te 're wapari pese za'ra, 'Re ĩhâimana u'âsi mono hā. E tawamhā ĩsi'uihā na ĩwaihu'u pese na te 're ĩ'ab'manharī wē mono na, wa za dama

ĩsina 're ĩwata. Mare di. Āne hã ĩ'uwaibaba õ di. Cristuhu nhimipawaptobzéb zarina si, wa tô te tãma 're romhuri u'âsi za'ra, ĩwasu'uwẽ na hã.

¹⁹ 'Re ĩhâimana u'âsi mono pẽ'ẽzani hã tiwaihu'u pese na te te 're ĩpawapto mono zém na si, wa tô marĩ dama ĩ'manharĩ waihu'u'õ hã te dama 're ab'manharĩ, zudezu'õ norĩ hã tô sena te te 're saze za'ra mono da, ta norĩ hã. Zeruzarẽ hawi, Iririza u 're ĩmorĩ ré, wa tô daza'rui mono bâ te dama 're rowasu'u, Cristuhu wasu'uwẽ na hã.

²⁰ Wa hã wa tô āne hã te ĩsima 're rosa'rata u'âsi, Cristuhu wasu'uwẽ hã zahadu dapo're na da te 're ĩwari za'ra mono õ norĩ u si, 're ĩmorĩ da, daza'rui mono bâ ĩwasu'uwẽ na te āma 're da'apo're pu'u mono da. Wanhĩb'apito wasu'uwẽ na danhĩmi'u'ẽi 'rata u 're ĩzasi tô mono da, wa tô āne na te ĩsima 're rosa'rata u'âsi.

²¹ Duréihã Iza'iza hã ma tô āne na Cristuhu āma rob'ui'éré:

“Ni'wam norĩ ma, ĩwasu'uwẽ hã da te tãma 're ĩwaihu'u za'ra mono õ norĩ hã te za oto ta norĩ hã 'rãwi āma 're siwaihu'u za'ra, ĩwasu'uwẽ hã da te oto tãma 're wasu'u za'ra mono wa.

Te te 're wari za'ra mono āna, aré 're ĩhâimana za'ra mono norĩ hã te za oto 'rãwi si'āma te te 're waihu'u pese za'ra, 're ĩhâimana wẽ za'ra mono zém na hã.”

Paru hã, timreme te te sisõwa ĩsõmrizé wasu'u, Roma u morĩ da

²²⁻²⁴ Wa hã wahub ahã na, wa tô te ĩsima 're rosa'rata u'âsi, te ĩsima 're ĩrowẽ mono zéb uwaibaba, atẽme ĩmorĩ za'ra wa'aba da, te asabu za'ra wa'aba da. Tane nherẽ, zahadu āmemhã ĩma romhuri ahã di. Taha wa, nimahã na hã āma atẽme

ĩwatobro waihu'u aba õ di. Tane nherẽ, ãhãna hã ĩnhimiromhuri hã ãmemhã te oto 'rãsutu wamhã, atẽme ãma ĩmorĩ aba da si, wa tũ ĩsima waihu'u. Taha wa, wa tũ ĩsima pisutu pese, Esipãna na romnhisi u ĩmorĩ ré, te asabu za'ra wa'aba da. ãne wa tũ duré ĩsima rosa'rata, atẽme ãma ĩwisi za'ra wa'aba wamhã, niha bãtã na a'ã ai'rata ĩnhamra za'ra wa'aba da, ĩma ĩrowẽ zarina, duré marĩ na asiwi ĩpawaptob za'ra wa'aba da, Esipãna u ĩmorĩzẽb da hã. Taha parip si, wa za oto aihawi ĩmorĩ 'wa.

25 Tane nherẽ, wa za a'ã Zeruzarẽ u si mo, ã awa'awi hã, tame 'Re ĩhãimana u'ãsi mono nhib'a'uwẽ 're ĩsi'ubumroi mono norĩ hã te duré pawaptob za'ra da a'ã.

26 Masẽdoniza na danhipti'a nho'õmo nhisi ãma, duré Ataza na danhipti'a nho'õmo nhisi ãma, zudezu'õ na ĩsazei'wa na oto 're ĩhãimana za'ra mono norĩ hã ma tũ sima wẽ za'ra, rob'uiprazẽ hã te te siwi ubumro da, Zeruzarẽ ãma ĩsazei'wa norĩ te te siwi ãma pawaptob za'ra da, simarĩ ãna 're ĩhãimana za'ra mono norĩ hã, zudezu norĩ hã. Ta norĩ nhoprub za'ra zẽ hã, ĩsi'uihã na te tãma ãri za'ra da Zeruzarẽ u, taha da, wa za a'ã tamomop si mo.

27 Ta norĩ hã zudezu'õ na ĩsazei'wa norĩ hã si'uihã na ma tũ sima pisutu za'ra, te te siwi ãma ĩpawaptob za'ra zẽb da hã, zudezu norĩ hã. ãne hã tũ ĩ'uwaibaba ma tũ siwi ãma pawaptob za'ra. E marĩ wa. Durẽihã zudezu norĩ ma, ma tũ 'Re ĩhãimana u'ãsi mono hã tiwasu'uwẽ na tãma si-waihu'u na'rata za'ra, tipẽ'ẽ na robzei u'ãsi ãma 're nomro mono da. Taha na ma tũ zudezu'õ norĩ hã te te siwi ãma 're pawaptob za'ra ĩwasu'uwẽ na,

aiwapsi oto ðhõ ãma si 're hâimana za'ra mono da. ãne wa'rãmi, te za tô zudezu'õ norĩ hã tinhimarĩ na te te siwi 're pawaptob za'ra, zudezu norĩ hã, tô ĩsarina si.

²⁸ Tawamhã ãme ĩnhimiromhuri te 'rãsutu parimhã, rob'uiprazé, da te dasiwi ĩ'ubumro hã ubuni na ĩsazei'wa norĩ ma, te ãwisi wẽ parip si, wa za oto mo, Esipãnha u ĩmorĩ da hã. Tawapsi, wa za aiwa'wai baba ĩmorĩ aba ré, asabu za'ra wa'wa oto.

²⁹ Tawamhã, atẽme ĩwisi za'ra wa'aba wamhã, Cristuhu nhoprubzém na, sa'ëtẽ uptabi na te za aihĩni wama ãma tirowẽ za'ra.

³⁰ ĩsisãnawã norĩ, wa za oto aiwi rowaptêrẽ za'ra wa'wa ĩsi'ãma, 'Re ĩhâimana u'âsi mono ma, asiptete sina ĩ'ãma 're aimreme zusi aba mono zéb da hã. Wanhíb'apito Zezu Cristuhu zazei'wa, wasiré oto 're wahâimana za'ra mono wa, duré 'Re ĩhâimana u'âsi mono pẽ'êzani nhimipawaptobzéb zarina, oto 're wasisawi pese uptabi za'ra mono wa, wa ãne na aiwi rowaptêrẽ za'ra wa'wa.

³¹ E marĩ da. Zudeza na danhipti'a nho'õmo nhisi ãma ĩsazei'õ'wa norĩ 're ĩhâimana za'ra mono norĩ hã, niha te te ĩma rob'manharĩ za'ra tô da, te za ĩ'ãma tiwi ĩrowaptêrẽ u'âsi za'ra wa'aba mo. Duré Zeruzarẽ ãma 'Re ĩhâimana u'âsi mono nhíb'a'uwẽ 're ĩhâimana za'ra mono norĩ hã, ta norĩ hã zudezu na ĩwamri za'ra wẽ te, zudezu'õ norĩ nhoprubzẽ hã za te ãma ĩ'ári hã te te siwi wẽ'õ za'ra tô da, te za duré ta norĩ ãma zama ãma aimreme zusi u'âsi 'wa.

³² ĩtoi uptabi na ãma atẽme ĩwisi za'ra wa'aba da, te za ĩ'ãma aimreme zusi u'âsi 'wa. 'Re ĩhâimana u'âsi mono, ĩmorĩzé hã te te ĩma pisutu wapsi, wa za tô ãma atẽme ĩwisi 'wa. Tawapsi ĩma rowẽ up-

tabi di za, wasiré ãsazei'wa norĩ hã 'rãwi wasisabu za'ra wẽ te. Te ãma wazere wamhã, wa za a'ã ai'rata ãwa'utu za'ra wa'wa.

³³ 'Re ãhãimana u'ãsi mono hã wama rowẽ nhomri'wa hã 'rãwi asiré 're hãimana u'ãsi za'ra wa'aba mono da, wa tô te ãsima 're aiwẽ u'ãsi za'ra wa'wa. Tane tô.

16

Paru, tisiwadi norĩ te te ãazawizé wasu'u

¹ ãne, wa za aima wasu'u za'ra wa'wa, wahidiba Pebi na ãsisi hã. Ta hã simizawi pese di. Sõtireza na 'ri nho'õmo nhisi ãma, te ãsazei'wa norĩ hã te te 're apawaptob u'ãsi.

² Da'ahã na ma tô te te 're da'apawapto pese. ãzama te duré te te 're ãpawapto. Taha wa, ma'ãpé asiwi ãri wẽ wa'aba za, wasiré Wanhib'apito zazei'wai wa, 'Re ãhãimana u'ãsi mono nhib'a'uwẽ, 're ãsiwaibui wẽ mono zém na. Marĩ zô tiwi rowaptã'ã wamhã, te za duré marĩ na asiwi ãpawaptob za'ra wa'wa.

³ Ma'ãpé, duré ãma sawi za'ra wa'aba, Prisira norĩ hã Atiraha me, te ãma ãsawi zahuré zéb zarina, rob'ui'ére na.

⁴ Ta norĩ hã ãsiré te te 're ãromhuri zahuré mono, Cristu Zezusihĩ wasu'u na. Ta norĩ hã da te pãrĩ da nherẽ, ma tô sisawi ãna te te 're ãpawaptob u'ãsi zahuré, pahi ãna. Taha wa, te te 're ãpawaptob zahuré mono zém na, wa tô te 're uzei u'ãsi zahuré. Tane nherẽ, ãwétési te ãma 're uze zahuré mono õ di. Uburé zudezu'õ norĩ hã ãsazei'wa norĩ hã te duré te te ãma 're uzei u'ãsi za'ra, daro mono bã siré 're ãsi'rã'õtõ mono norĩ hã.

⁵ Ma'ãpé, duré uburé ãma sawi za'ra wa'aba, Prisira norĩ nhorõwa u ãsazei'wa norĩ, siré 're ãsi'rã'õtõ mono norĩ hã, rowahutu u.

Duré asiwi ãma sawi za'ra wa'aba, ãsiwadi ãma ãsawi pe hã, Epenetu na ãsisi hã. Ta hã ma tô saze na'rata Cristu hã, Azi'a na danhipti'a nho'õmo nhisi ãma.

⁶ Duré Mariza hã asiwi ãma sawi wa'aba. Ta hã te te aima 're romhuri pese za'ra wa'wa, simi'ëi uptabi na.

⁷ Duré asiwi ãma sawi zahuré wa'aba, ãdoronitu norĩ hã, Zuni'asihi me. Ta norĩ hã ãsiré zudezu norĩ, ma tô ãsiré tihãimana zahuré, dazazéb 'remhã. Cristuhu zadawa wasu'u'wa norĩ siré te te 're romhuri zahuré mono wa, tâma waihu'u pese za'ra di, ãsiré romhuri'wa norĩ ma hã. Ta norĩ hã ma tô ãwana saze na'rata zahuré, Cristu hã.

⁸ Ma'ãpé duré asiwi ãma sawi wa'aba, ãsiwadi uptabi hã, ãprizatu na ãsisi hã. Ta hã te Cristu ãma si 're hãimana.

⁹ Duré Ubanuhu zama asiwi ãma sawi wa'aba, wasiré romhuri'wa hã Cristuhu ma. Esitati hã ãsiwadi zama te za duré asiwi ãma ãsawi wa'wa, ãma ãsawi pe hã.

¹⁰ Ma'ãpé duré asiwi ãma sawi wa'aba, Aperi hã. Ta hã marĩ na da te 're pibui ahã mono nherë, niwa Cristuhu wi sipi'rai waihu'u õ di. Duré asiwi ãma sawi za'ra wa'aba, Arisitoburuhu nhorõwa 're, 're ãhãimana za'ra mono norĩ hã.

¹¹ Duré, Erodĩ'ã hã asiwi ãma sawi wa'aba, ãsiré zudezu hã. Duré wasiré ãsazei'wa norĩ hã Nasizuhu nhorõwa 're, 're ãhãimana za'ra mono norĩ hã asiwi ãma sawi za'ra wa'aba duré.

¹² Tiripena norĩ hã te za duré asiwi ãma ãsawi

zahuré wa'wa, Tiripozaha me. Ta norĩ hã te Wanhib'apito ma, te te 're romhuri zahuré. Duré wahidiba hã ĩma ĩsawi pe hã asiwi ĩma sawi wa'aba, Pezidi na ĩsisi hã. Ta hã simi'ẽ na te duré Wanhib'apito ma, te te 're romhuri pese, wa'a ãna.

¹³ Ma'ãpé duré asiwi ĩma sawi wa'aba, Rupu hã. Ta hã te duré te te 're romhuri pese, Wanhib'apito ma. ĩna zama te za duré asiwi ĩma ĩsawi wa'wa. Ta hã ĩna õ nherẽ, ma tõ te te 're ĩpawapto pese, dana hã ti'ra te te 're ĩpawapto pese za'ra mono ne.

¹⁴ Asĩtiti norĩ hã te za duré asiwi ĩma ĩsawi za'ra wa'wa, Predotihi me, duré Emesi, duré Patorobasi, duré Emasi hã. Duré uburé ĩtẽme 're ĩsi'rã'õtõ mono norĩ hã asiwi ĩma sawi za'ra wa'aba, ĩsazei'wa norĩ hã.

¹⁵ Ma'ãpé duré asiwi ĩma sawi za'ra wa'aba, Pirorodu norĩ hã, Zurizaha me, duré Nere'u norĩ hã ĩhidiba me, duré Orĩpasihĩ zama. Duré ta norĩ siré 're ĩsi'rã'õtõ mono norĩ hã te za asiwi ĩma ĩsawi za'ra wa'wa, 'Re ĩhãimana u'ãsi mono nhĩb'a'uwẽ norĩ hã.

¹⁶ Uburé asiré ĩsazei'wa 're aihãimana za'ra wa'aba mono wa, te za asõ'utu na asisawi sina 're asitob'rata hãrã za'ra wa'aba mo.

Ãmemhã uburé Cristuhu zazei'wa norĩ hã, ĩ'upsãtã mono bã sitẽme 're ĩsi'rã'õtõ mono norĩ hã te duré ãma asawi za'ra wa'wa.

Paru hã, roti na za oto te te ĩrãsutuzém na rowasu'u

¹⁷ ĩsisãnawã norĩ, wa za oto ĩnhimiroti na aima 'rãsutu za'ra wa'wa. Ni'wam norĩ hã te aimawi tinhimirosa'rata na te te ãma 're 'wa'rutu za'ra, ĩsazei'wa norĩ wi. Te te tiwi ãma 're 'wa'rutu za'ra mono wa, te ĩsazei'wa norĩ hã ĩmreme hã te te 're

wapari za'ra. Taha zarina, te duré sima ãma 're siwanhizari. Ta norĩ nhimirob'manharĩ wasété zéb zarina, te ãsazei'wa norĩ hã 're si'marõpãrĩ za'ra, tiwasété na. Zezusihi nhimiroti na, da te aima 're ãroti za'ra wa'aba mono zéb upana, te ta norĩ hã te te dama 're roti za'ra, aimawĩ na si. Taha wa, te za tiwi 're asisawi pese za'ra wa'aba mo, ta norĩ siré 're aihãimana za'ra wa'aba mono tõ da.

¹⁸ Ta norĩ hã Wanhib'apito Cristuhu ma, te te 're romhuri za'ra mono õ di. Te te sima 're ãwẽ za'ra mono zéb zarina si, te marĩ ãwasété zõ si 're sõpré. Ta norĩ hã sadawa nhipese nherẽ, te ãsimiroti hã sena newa da te 're wapari ze za'ra, danhimirosa'rata nhib'uware na 're ãdahãimana za'ra mono norĩ hã. Mreme wapari ze wa, duré asa ãmreme hã da te dasima 're wẽ za'ra mono da, te taré timreme amo na te te dama 're rowasu'u za'ra, da'ãma 're wata za'ra mono sina. Tawamhã taha zarina, te za awa'awi ãmreme na da te 're saze za'ra.

¹⁹ Tanei õ di, a norĩ wa'wa hã. Zezusihi wasu'uwẽ 're ãwapari pese za'ra wa'aba mono zém na, ma tõ daro mono bâ ãsazei'wa norĩ hã aiwasu'u za'ra wa'wa hã te te 're wapari ze za'ra. Taha wa, ma tõ ãma asina ãma 're ãrowẽ zani za'ra wa'aba mo.

Ãne wa, wa za duré aima roti za'ra wa'wa. Asimiza'rese sina, te za marĩ ãwẽ hã 're ãmanharĩ za'ra wa'aba mono zéb da si, asina 're asõpré wa'aba mo. Marĩ ãwasédé hã 're 'manharĩ za'ra wa'aba mono da, asima 're 'madã'ã za'ra wa'aba mono õ di za. Te za tiwi 're asiptete za'ra wa'aba mo, aiwasété wi hã.

²⁰ Rowẽ na 're ãdanomro mono zé hã, 'Re ãhãimana u'ãsi mono hawimhã. Ta hã te za rowézé hã te te

aima 're anhomri 'wa. Wahi hã dapara na da te 're ãwati'i za'ra mono ne, te za Satanasihi nhiptetezé hã romhutu na te te tiwi 're a'uprosi 'Re ãhãimana u'ãsi mono hã, tô õ hã Satanasi hã asahãpã 're hãimana za'ra wa'aba mono da oto.

Wanhib'apito Zezusihi wi, wa wa te tiwi 're rowaptêrê u'ãsi, tinhimipawaptobzé hã te te aima 're sômri za'ra wa'aba mono da, ai'rata 're hãimana u'ãsi za'ra wa'aba mono da.

²¹ Timotiu hã, ãme ãsiré romhuri'wa hã te duré ãma asawi za'ra wa'wa. Duré ãsiré zudezu norĩ te duré ãma asawi za'ra wa'wa, Rusizu norĩ hã, Zasãhã me, duré Sosipaturu hã.

²² Wa hã, Tési'u hã wa duré ãma asawi za'ra wa'wa, Wanhib'apito ãma wasiré 're wahãimana za'ra mono wa. Wa hã Paru te te ãma ã'awaihu'u mono zéb zarina, wa tô rob'ui'éré, ã ãbaihã na hã.

²³⁻²⁴ Wa hã Paru, ãne wa za duré ãma aima waihu'u za'ra wa'wa. Da'izu hã tinhorõwa u te te ãmazébré hã, te duré ãma asawi za'ra wa'wa. Taha nhorõwa ãma, te wasiré ãsazei'wa norĩ hã 're si'rã'õtõ u'ãsi. Duré Erasitu hã ãme 'ri nho'õmo ãma danhib'apito ma, rob'ui'prazé za'rata na romhuri'wa hã, te ãma asawi za'ra wa'wa. Wasisãnawã Tu'atu na ãsisi zama, te duré ãma asawi za'ra wa'wa.

Paru hã, 'Re ãhãimana u'ãsi mono ãma ãwatazé wasu'u

²⁵⁻²⁶ 'Re ãhãimana u'ãsi mono ãma si, wa za 're wawata u'ãsi za'ra. Taha ma si, tãma waihu'u pese di, te te 're ãwa'apawapto mono zéb da hã, Zezu Cristuhu wasu'u'wẽ hã wa te 're ãsaze za'ra mono zé hã wa te 're rẽme za'ra mono ãna, wanhiptete u'ãsi ãma 're ãwanomro mono zéb da hã. Taha wasu'u'wẽ hã wa tô te dama 're wasu'u u'ãsi. Duréihã

ĩwasu'uwẽ hã, 'Re ãhãimana u'ãsi mono te te dama 're awaihu'u mono õ di. Ĩwasu'uwẽ hã dama sa'rese ãna, ma tã aré 're danomro. Tane nherẽ, ma tã 'Re ãhãimana u'ãsi mono hã ĩwasu'uwẽ hã dama waihu'u oto, ĩsadawa wasu'u 'rata 'wa norĩ nhimi'ui'ére hawimhã. Taha wa, te oto ĩsimiwada'urizéb zarina si, da te 're waihu'u za'ra daro mono bã, da te ãma 're ĩsazei pese za'ra mono zéb da hã, duré da te 're ĩwapari pese za'ra mono zéb da hã oto.

²⁷ 'Re ãhãimana u'ãsi mono hã misire te 're hãimana. Õhõ si siwaprosi uburé marĩ hã tãma waihu'u pese di, taha ma si. Taha wa, taha ãma si, wa za 're wawata u'ãsi za'ra, Zezu Cristu te te wama 're ĩ'ab'manharĩ wẽ mono zéb zarina si. Tane tã.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c